

بِسْمِ اللَّهِ الرَّحْمَنِ الرَّحِيمِ

ہو النور
چنہاں تے راوی دیاں لہراں

کتاب

تحفة الفقرا

قصہ

مرزا احصا صاحب

مصنف

ترجمان مجاز و حقیقت جناب ابوالتوقیر و التئویر

حضرت مولوی سراج القادری صاحب

بادشاہ پور می (بادشاہ پور) ضلع منڈی بہاؤ الدین

(8) لہراں ادبی بورڈ، 57/7 سوڈیوال کالونی، ملتان روڈ، لاہور - 54000

فون نمبر

ایس کتاب دے سارے حق
میرے وڈے پتر صاحبزادہ توقیر احمد فائق قادری سلمہ
دے نال راکھویں نیں
☆☆☆

کتاب دا ناں: تحفة الفقراء۔۔۔ قصہ۔۔۔ مرزا صاحب
مصنف: ترجمان مجاز و حقیقت جناب ابوالتوقیر والتویر
حضرت مولوی سراج القادری صاحب بادشاہ پوری

اٹھویں وار: مارچ 2003ء

گنتری: اک ہزار

مُل: پنج سو روپے (500) پاکستانی

امریکی ڈالر

برطانوی پاؤنڈ

سرورق: شاکر گرافکس، لاہور

کمپوزنگ: شہزاد شاہ کراٹور

☆☆☆

مالی مل ورتن: ایس کتاب دی اشاعت وچ حکومت پنجاب دے محکمہ اطلاعات، ثقافت اتے امورِ
نوجوانان دا جزیوی مالی تعاون شامل اے۔ ایس مالی مل ورتن لئی لہراں ادبی بورڈ محکمے دا شکر گزار اے۔

☆☆☆

ڈاکٹر سید اختر حسین اختر، سیکریٹری جنرل، لہراں ادبی بورڈ، لاہور نے اشتیاق اے مشتاق لاہور توں چھپوا
کے 57/7 سوڈیوال کالونی، ملتان روڈ، لاہور 54500 توں ورتائی

بِسْمِ اللّٰهِ الرَّحْمٰنِ الرَّحِیْمِ
اپنی سوہنی تے سلکھنی دھرتی دے ناں

العشق

متاب از عشق روگرچہ مجازیت
کہ ایں بہر حقیقت کارسازیت



چنہاں تے راوی دیاں لہراں

کتاب

تحفة الفقراء

قصہ

مرزا صاحب

از ترجمان مجاز و حقیقت جناب ابوالتوقیر و التئویر

حضرت مولوی سراج القادری صاحب بادشاہ پوری

بادشاہ پور۔ ضلع منڈی بہاؤ الدین

تصویر

حضرت قبلہ علامہ مولوی سراج الدین المعروف مولوی سراج القادری بادشاہ پوری

کچھ لہراں ادبی بورڈ لاہور ولوں

ایہہ کتاب لہراں ادبی بورڈ لاہور ولوں چھاپے چڑھن والی اٹھویں (8) کتاب اے۔ جہڑی مارچ 2003ء وچ چھاپے چڑھی اے۔ ایڈول پہلاں لہراں ادبی بورڈ لاہور ولوں گنجد رنکھ جی دی انقلابی شاعری دا پراگا ”سورج تے خالصتان“ کینیڈا وسدے لہراں دے سجن محترم جناب ترلوچن سنگھ گل دی جی کتاب ”سکھ تواریخ“ انگلینڈ وسدے محترم جناب گوردیو سنگھ مٹھاڑ جی دی گورکھی لپی وچ لکھی گئی کتاب ”فرید اولی“ دا محترم سورن سنگھ سنگھ جی ولوں شہ مکھی لپی وچ، لپی انترکیتا گمیا ایڈیشن چھاپیا گیا۔ پنجابی کلاسیکی شاعراں بارے (حضرت بابا فرید گنج شکر توں لیکے حضرت خواجہ غلام فرید تیک) محترم جناب پروفیسر صدیق کلیم جی (سابق پرنسپل گورنمنٹ کالج لاہور) ولوں لکھی گئی انگریزی وچ تنقید نوں کتابی صورت وچ چھاپیا گیا۔ ایس کتاب دا ناں ”The Song of a People“ اے۔ سیدہ کلثوم اختر دی کتاب ”مقصود ناصر چودھری حیاتی فکر تے فن“ راقم (ڈاکٹر سید اختر حسین اختر) دی کتاب ”پنجاب کی لوک ریت (اردو) توں اڈاک کتاب سندھی زبان وچ وی لہراں ادبی بورڈ ولوں چھاپے چڑھی۔ اہ مسعود کھدر پوش ہوراں دی مشہور ہاری اختلافی رپورٹ اے جہڑی انگریزی تے اردو وچ چھپ چکی اے۔ اہ اسدھی زبان وچ پروفیسر اعجاز قریشی ہوراں ولوں کیتا گیا ترجمہ لہراں ادبی بورڈ نوں چھاپن دا اعزاز حاصل ہویا۔

ہتھلی کتاب پنجاب تے پنجابی زبان دے اک بڑے وڈے اتے قادر الکلام شاعر حضرت مولوی سراج القادری بادشاہ پوری ہوراں دا شاہکار قصہ ”مرزا صاحب“ اے۔ جس دے ایڈول پہلاں ست ایڈیشن چھپ چکے نیں اتے ہر خاص و عام وچ اہ کتاب پہلاں ہی بڑی مقبول ہو چکی اے۔ ایس کتابی سلسلے توں اڈ لہراں ادبی بورڈ مارچ 1965ء توں مہینہ وار لہراں بڑی باقاعدگی نال شائع کر رہیا اے۔ دعا اے جے اللہ تعالیٰ لہراں ادبی بورڈ نوں پنجابی دے نال نال ساریاں پاکستانی زباناں دی راج راج کے سیوا کرن جوگ کر دیوے۔ آمین ثم آمین۔ ایس کتاب دی تیاری وچ پروفیسر عاشق رحیل جی، طالب حسین باجوہ جی، محمد انور ناز جی، سیدہ کلثوم اختر جی، سید علی عرفان اختر جی، نکلے ویراقتدار جاوید جی، مسعود خان ارحم جی تے سید کامران عباس جی نے کسے نہ کسے طرح میرا ہتھ وٹا دیا۔ میں لہراں ادبی بورڈ دے اہناں سارے کامیاں دا شکر گزاراں۔

یکم مارچ 2003ء ڈاکٹر سید اختر حسین اختر، سیکریٹری جنرل۔ لہراں ادبی بورڈ لاہور

عشق حقیقی

عشق تجلا ذات دا عین العین عیان
پیغمبر مرسل اولیا ثابت قدم جوان
عشق حقیقی بام دا مجازی نردبان
عشقتوں مکھ نہ موڑیے بھاریں آون لکھ طوفان
عشقتوں باجھ عبادتاں کھوٹی رقم پچھان
باجھ عشق نہیں رکھدا یارو کوئی قدر ایمان

خاص امانت یار دی حملہلا الانسان
اہ سارے مہرے عشق دے حسب مراتب جان
انالحق تم باذنیایا ایہہ سبھ عشق دی شان
سرجیا آدم حق نے عشق کماون کان
جج نمازاں ساریاں چڑھن نال عشق پروان
جس عشق سراج و ہاجیا ہو گیا مسلمان

اللہ تعالیٰ دی تعریف تے حضور محمد مصطفیٰ صلی اللہ علیہ وسلم دی نعت تے عشق دا بیان

قدرت کاریگر دی ہر ہر طرف عیان
دھوں تارے چن سرجیا وچ نور ظہور نشان
وہی دھرتی کعبیوں کھنڈی کل جہان
تاں پر بت میخاں ٹھوکیاں حق اللہ سبحان
آہی گن تھیں پہلے عارفا قدرت سرگردان
گنت کنزاً مخفیاً تاں کر دا کون پچھان
نہ دن رات نہ چانناں صرف ہنیر مکان
کَانَ اللہ فی عماء کتھے کون و مکان
کھیڈاں کھیڈیاں نور نے اوہ لگا رنگ دکھان
حکم کیتا رب قلم نوں لکھ کلمہ ذی شان
مَن کے امر حضور تھیں لایا قلم تران
اگوں فیر حضور تھیں ہو یا ایہہ فرمان
سن کے نام حضور دا قلم ہوئی قربان

اُس کھیڈ اپائی عشق تھیں کر کے کن فرمان
پانی اُتے پر تھی تے باجھ تھیں اسمان
تھر تھر خونوں ڈولدی جیوں بیڑی وچ واہن
اُس فلک سہائے تاریاں تے دھرتی نال انسان
نہ آدم نہ جن سی نہ فرشتے جان
لوح قلم تے عرش فرش اہ جتنا کون مکان
ڈانواں ڈول حیران سی ہو دا اک میدان
تاں شعلہ نور رسول دا چمکیا چڑھ پروان
کائنات اُپا کے کیتا پیچ احسان
اُتے لوح قلم محفوظ دے بسم اللہ الرحمن
لکھیا لا الہ الا اللہ سر جملہ عنوان
لکھ محمد مصطفیٰ دو جگ دے سلطان
اُدا پھٹیا سینہ لکھدیاں سر دفتر عرفان

رب خلقے نوری نور تھیں حور ملک رضوان
بت آدم دا سر جیوس حکم کیتا یزدان
مٹی ہفت اقلیم دی جبرائیل لیان
پھر ہتھ قدرت دا پھیریا خود اللہ سبحان
حکم ہو یا پھر روح نوں بت وچ ہو روان
میں پنچھی آزاد تے اہ پنجر بندوان
تاں وچ پیشانی چمکیا نور محمدؐ جان
اہ پنچویں قدرت اپنی چا خالق کیتی وان
شرع طریقت معرفت حقیقت تے عرفان
پنچھی بولن بولیاں دُھمدی دے عنوان
شیر بگھیلے بار دے تے ساگر دے حیوان
جایا بی بی آمنہ نام محمدؐ جان
آون کرن زیارتاں حور ملک رضوان
حوراں کرن پابوسیاں ملک تھیون قربان
پڑھاں درود حضورؐ تے ہر ساعت ہر آن
عرشاں اُتے شادیاں فرشاں تے دھرسان
زور ترٹا گُفر دا دین اسلام جوان
لے نذراں دربار تے ڈگے خانی خان
جھک گئے سنے ریاستاں ایران و توران
زینت پائی مسجداں بت خانے ویران
جد نازل ہو یا عرش تھیں تحفہ پاک قرآن
بھل گئے منتر باہنناں لے آئے ایمان
چار یار حضورؐ دے باقدر ذی شان

خاکوں آدم سرجیا تے آتش وچوں جان
نیاں امر فرشتیاں اُوہ لگے بت بنان
چار عنصر دا پُتلا اٹکل تھیں اُسران
جویں خَلَقْتُ پیدہ آیا وچ قرآن
روح تھر ہر کنیا سُن شاہی فرمان
اہ سخت ہیری کوٹھری مینوں مولا بخش امان
روح آیا وچ بت دے تک جلوہ تابان
و نفخت فیہ من روجی رکھیا بھیت نہان
ایہہ سارا بھیت رسول دا بے شک بے گمان
حق محمدؐ مصطفیٰؐ روشن زمن زمان
جتنی جیا جُون ہے ساری تسبیح خوان
دائی حلیمہ سعدیہ پایا گود پچھان
حضرت عبداللہ دی ذات تے پڑھ صلوة سنان
میں ظاہر باطن اپنی کر کے ستھری جان
کی مدنی ہاشمی قرشی جبلی جان
دھروئی احمدؐ پاک دی گھڑیاں بھیراں زمین آسمان
قدمی لگے شہنشاہ آن من سلطان
آکڑٹ گئی آکڑاں نیوں نیوں سمیس نوان
جد آیا سچے رب تھیں جاء الحق اعلان
پتھر دیہن گواہیاں پڑھن درود حیوان
تاں چھڈ گئے کوڑ کہانیاں سارے قصہ خوان
کلمے طیب آ کے کیتی پاک زبان!
صدیقؐ فاروقؐ عثمانؐ تے حیدر شاہؐ مردان

آقا کملی والا مصطفیٰ ضامن دو جہان قیدی کیتا دلاں نوں نال پیار احسان
دو جگ دیاں لاجاں پالدا گنہ گاراں داماں پکڑ سراج رسول دا ونج محکم داماں

☆☆☆

سیدنا حضرت حسین علیہا السلام

بچڑے نبی کریم دے حضرت حسن حسین لختِ جگر بتول دے حیدر دے نور عین
ثابت راہ رضا دے پاپے وچ کونین تاجِ اُمامت سرے تے دو جگ وچ نعلین
یارو جہڑے دوش رسول دے چڑھ کے جھوٹے لین ایہہ کدھی نہر فرات دی تے کھٹے ویہن!
قاسم اکبر جیہے نوجوان کھا کھا برچھیاں ڈھین کوئی پیش نہ جاندی مالکا بھیناں ساہمنے تکر دیاں رہن
شدیاں کیتے کوفیاں ٹنگ نیزے سیس حسین ہو قیدی زہرا دیاں جانیاں پیاں شام ولایت ویہن
تیریاں توہیں جانے مولیا نہیں روندے رجدے نین کیوں نہ ٹکڑے ہو گیا آسمان سُن زینب دکھی دے وین
سیس نیزے تے ویکھ کے رُنی جنت دی سین رکنگرے عرش مجید دے سُن سُن موہندے ڈھین
اُہناں چھڈے بیڑے صدق دے وچ عشق دے ڈوگے ویہن اُ تارو آہے تر گئے ہن رَج رَج جلوے لین
صلواتاں شاہ حسین تے پڑھدے وچ دارین بے حیا یزید تے دو جگ لعنتاں پین!
پیتے جام شہیداں صابراں ہوئے اصل عین العین دس گئے حد سراج پیار دی سرور دے سبطین

☆☆☆

حضرت جناب دستگیر پیراں دا پیر

ساقی مئے عرفان دا غوث الاعظم پیر میرا دوہیں جہانی آسرا میری دوہیں جہانی دھیر
سید یارھویں والڑا نسل شبر شبیر اولاد علی المرتضیٰ آل بشیر نذیر
چڑھیا سورج شرع دا شب ظلمت نوں چیر گھیاں ہٹ تاریکیاں صادق صبح منیر
صدقے آمد غوث دے شان اُہدی تطہیر بچپن وچ رمضان دے منہ نہ لایا شیر
کیٹی قصر دین دی نوں سروں تعمیر ڈنکے وچ گئے نام دے محی الدین امیر
ڈبے بیڑے کفر دے کدھے گھت زنجیر رَج گئے جگ رجا گئے اُسدے دامن گیر

یا میراں لکھ داتیا! توں پیراں دا پیر
رکھ نگاہاں والیا! روشن رہے ضمیر
تیرے کول خزانے معنوی فقر تیری جاگیر
توں سونا کرنا نئیں خاک نوں نظر تیری اکسیر
جگ جیون نال وقار دے تو قیر اتے تنویر
پا جھولی خیر سراج د صدقہ انور میر

☆☆☆

میرے راہنما حضرت محمد انور میر گیلانی بھیروی

نیوں نیوں بزم غوث نوں سجدے کراں سلام
آ میخانے غوث دے پی عقیدت جام
حضرت انور میر دا کیا مبارک نام
والی فقر اقلیم دا میرا پیش امام
بخشے میری جان نوں اوس ہزار انعام
کتیا زندہ قلب نوں جیوں صیقل مصمام
دے سینے لا کے مخفی بھیت تمام
زندہ سنگت قادری روشن نام مقام
حشر تلک وت عارف رہی نہ تروٹک نام
نور اکھیں دل چانناں روح تسکین آرام
رُخ وجہ اللہ اوس دا قول اُہدا الہام
میں پڑھاں کلاماں اُہدیاں ہر صبح ہر شام
ہن ہوری پاسے ویکھناں مینوں ہو یا حرام
بس بچ گئی آس سراج دی رہس اقبال مدام

☆☆☆

کتاب دے لکھنے دا سبب

اک نگری گوندل بار وچ چک عالم نکیوں پٹھ
کوئی قید آہی ان جل دی آوے یاد تے پون ولہیٹ
میری جمدیاں آتشی طبع نوں ہر ویلے سوز لپیٹ
پیا دورہ عشق مجاز دا رُت آہی بلد جیٹھ
اک بلی موچی قوم دا دانا سگھر سو چیت
میں ختم کیتا تفسیر نوں افسانہ سوز سمیت
میں چھیڑیا خامہ مضطرب اہ اگے آتشی ٹھیٹ
چھڑی انحد تار رباب دی کسے مستی لیا لپیٹ
اوتھے آئی جال فقیر دی جیوں یونس مچھی پیٹ
کوئی چلہ سی گردش فلک دا میں کٹیا اوتھے بیٹھ
نت نویں پواڑے عشق دے نت سحری درد جھلیٹ
میں اوتھے لکھی صاحبان اک بیٹھ ونوٹے پٹھ
اُس نام غلام رسول سی میرا واقف محرم بھیت
اُس آکھیا لکھو صاحبان درداں دے خرمن کھیت
اس دھرے شرارے اگ دے کاغذاں وچ لپیٹ
جیوں نیندر آوے غضب دی لوے حواس سمیٹ

ملی بانگ میں سُتا جا گیا اُس خوابوں اُچن چیت
وہ مولیٰ تیری قدرتاں تیرے ہتھ نہ آون بھیت
میں بچوں کھویوں ویکھیا پئی رات کالی ہر جہت
کوئی پے گئی داتری موت دی بنے وڈھالے کھیت



غلام رسول

غلام رسولا بیلپا اُج چرکا یاد پیوں
اُوہ سنگت شعر و شہاب دی بھُل جاسی مینوں کیوں
اُوہ حسن دیہاتی قدرتی بھُل جان مناظر کیوں
اُوہ ٹھنڈے کھوہ ہٹھاردے ہر ویلے دی رَو رَو
سرگی کال کلچیاں سد مارن سُتیاں نوں
مینوں جھکھڑ آہن مجاز دے چڑھ آون کٹک جیوں
اُوہ بھوراں پھلاں دوستی اُوہ چناں ورگے منہ
کوئی کٹک چڑھے از غیب دے گھل جان ولوہنے جیوں
ہائے توبہ اکھیں ویہندیاں اُوہ رُتیں گتیاں بھوں
مینوں یاد اے ایس کتاب دے تینوں آہے چال چوں
آدیکہ اُج ایس کتاب دے دنیا تے وَج گئے ڈوں
گھر پا پواڑے لمڑے خود نِکے چڑھ گیوں
مینوں دے جگراتے عمر دے خود منہ لپیٹ پیوں



چک عالم

کتھے گئیں مجلساں کتھے گئے اُہ یار
 اُوہ رنگ برنگیاں جوڑیاں اُہ وَن پونے یار
 آئیاں ملک عدم تھیں جویں کونجاں بنھ قطار
 کوئی پیا شکاری موت دا ترکھا دھاڑے مار
 جھٹ ہک چوگاں چک گیا اُہ کونجاں دا ڈار
 ٹھلپا پتن موت دے پور گیا لنگھ پار
 واہ قدرتاں تیریاں مالکاندیاں دے واہن اُلاں
 کرماں نوں رون حویلیاں سائیاں نوں رون پسار
 ہلا بھلا اس نگر تھیں لنگھ ویساں بکل مار
 ہن کس نوں ہو سی پنڈ وچ میرا انتظار
 کتھوں ڈھونڈاں جا کے اُہ چال اُہ پیار



بھولیا پنچھیا

اُڈ وُج بھولیا پنچھیا توں اپنی جان بچا
 اتھے دے دوپہریں لوٹیاں کیتی گئے ٹھگا
 اتھے وا ولہونے مکر دے جاندا سر چکرا
 اُج صدی نبی دی چوہدویں اُڈ گیا شرم حیا
 اتھے رہندیاں تہمتاں لگدیاں کوڑوں سچ بنا
 بد معاش چکان پنچائتاں چُپ کر گئے شرفا
 جے ہئی پنچاں تاں اس باغ وچ چپ کیتا وقت لنگھا

اتھے گھر گھر پھایاں لگیاں وچھے فی دام ریا
 اتھے رولے پے گئے کوڑ دے لوکاں چھڈیا سچ دفنا
 کر توبہ ایس بازار تھیں ٹوٹ اکھیں لنگھ جا
 اتھے زن زیناں واسطے بھائی کردے قتل بھرا
 اتھے باجھ گناہ قصور دے پھایاں دیون لا
 اتھے سچے موتی کوڈیاں وکن ہکے بھا
 اتھے جنہاں سچ سنایا جھپیاں گئے کٹا

ایہہ دنیا نگری ظلم دی ایہہ نہیں انصاف دی جا
 اتھے کھوتے بدھے تھان تے بیگن زیناں پا
 اتھے سید نسل رسول دی کردی پھرے گدا
 اہناں دنیا داراں ظالماں کیہ کیتا کر بلا
 وچ کر بل جو جو ورتیاں بھلا سکے کون سنا
 اتھے منبراں تے چڑھ مولوی نچن حلوے کھا
 اہناں دین رسول کریم دا اکھاڑا لیا بنا
 سر روڈے لمیاں دا ہڑھیاں بھروٹے بد نما
 ایہہ آپ نہیں عمل کماوندے لوکاں نوں سمجھا
 اتھے لکھاں پیر بھروپے پھر دے نی دیں وٹا
 ایہہ لوکاں دا جن کڈھے فند پکھنڈ جگا
 ایہہ بڑے فریبی مکرے گلے لین ولا
 کر توبہ بھولیا پنچھیا ایس دیسوں اڈ جا
 جتھے چشمے ہون عرفان دے خُلق پیار وفا
 اتھے بھرے ہوئے ناز غور دے پھرں حاجی الحاج
 پائے ہوئے بانے صوفیا پر ڈاڈھے بد مزاج
 حاجی نہیں جہاجی آکھو مارے رسم رواج
 زیور خُلق ایمان دا مومن دا معراج
 ہو ہو جاسن غافلا اگے ہو ہو گئے بڑے
 منہ پر نے وچ سامیاں انج ڈھٹھے گھوڑ چڑھے
 ایس فضا وچ غافلا اگے گڈے کئی چڑھے
 اتھے رنگ رنگ سہیلیاں تے رنگ رنگ گھڑے
 توں نہیں ہوناں غافلا انجیں ہوسن باغ کھڑے

اتھے رجیاں دیکھ نہ سکدے بھکھیاں دیہن نہ پا
 تازی ہٹھ پلاناں زخمی پھرں لنگا
 بیٹھے گئے گدیاں مل کے گل پٹے سنہری پا
 اہناں گٹھی لتاں دے کے تسی آل عبا
 اتھے ولیاں دی کیہ گٹھری روندے گئے انبیاء
 گٹھرن جھپیاں قینچیاں ایماناں نوں پا
 دل درودوں خالی قالیاں جیوں طبلے دی دھا
 ایہہ بڑے بے ادب رسول دے شوخے بے حیا
 پان تنازعے وسدیاں مسئلے گھروں بنا
 گل موتی منے رائگے تسبیاں لین سجا
 پر اپنا جن نہ نکلیا لالچ حرص ہوا
 ربا روشنی بخش عوام نوں پاوَن راہ صفا
 کتے دور سہانے باغ وچ آہلنا ونج بنا
 اتھے پنچ سراج حضور دا کلمہ پاک الا
 آئے پار سمندروں فخر غرور و ہاج
 مست مئے پندار تھیں روگی لاعلاج
 دھو آئے کھارے پانیوں خُلق مروّت لاج
 ایہو جیسے حج تھیں منگ پناہ سراج
 اوڑک کھنیاں پہن کے ونج گستان وڑے
 پرت نہ خبراں گھلیاں ونج کھڑی جوہ وڑے
 موت کماناں تروڑیاں ڈوراں کھچ کھڑے
 پر بھریا اُسدا جانینے جسدا توڑ چڑھے
 گیت سراج پیار دے اج گا ونج درد بھرے

کھول اکھیں تک سُتیا ایہہ دنیا کوٹ مکان
ایتھوں ٹُر گئے پلے جھاڑ کے مکاں دے سلطان
ایہہ دنیا دھوکا خواب دا فرضی سب سامان
ایتھوں دعویدار خدائیاں ٹُر گئے کفنیاں تان
کتھے بھوء سکندری کتھے دارا تے خاقان
بہ بہ گیاں مجلساں لال لا گئے دیوان
سجے کجے سُتیا جاگ اٹھ مار دھیان
ایتھوں ہوسیں اک دن غافلا راہی جھاڑ دامن

کیوں دیس بیگانے جان کے بیٹھوں تنہو تان
چڑھ دیکھ پٹے تے غافلا بھرے پئے گستان
توں ایس سراں مسافرا جھٹ پل دا مہمان!
کتھے آج انہاندڑا لعنت باجھ نشان
اُوہ تخت سلیمان نہ رہیا نہ اُوہ ماہ کنعان
آج قلعے اُہناں دے آہلیاں کھنڈر قبرستان
کتھے نی سگی نال دے کتھے شاہی شان
پڑھ سراج حضور دا کلمہ راہ روان



دریا چنہاں نال دوترے گلاں

وگدیا وہن چنہاں دیا کوئی پچھلی گل دسال
دُئی وَنچ مسافرا سفر اپنے دا حال
تیرے وانگن مینوں بھی درپیش اک سفر جنجال
تیرے پیلے وہن چنہاں دیا کوئی چگا گئے مال
اتھتھے بھن بھن گمیاں بوکراں کئی کڑیاں جُنڈیاں ڈال
تیری من تے کپڑے دھو کے گئے کئی نہا گئے ماہ جمال
اُوہ جھنگ دیاں ساویاں جھنگیاں اُہ پپلی ٹیشی نال
اتھتھے رانجے ہنری پریت دی پئی پھوکی رتجھاں نال
جد تیری پارلی من تے جھگی پائی سی مہینوال
جد عاشق تیری ہک تے ملے گلوکڑی ڈال
کھیویوں ٹریا کھرل رنگیلڈا لے صاحبان نوں نال
پھر واہرو ڈھول دگا کے چڑھے ہاٹھاں بنھ سیال

تینوں کئی زمانے بیت گئے چلدیاں ایسے چال
توں ٹریاں کہڑے دیس تھی کدے چلیاں کیہ خیال
آرل دونویں ورتیاں دسیے بن کے محرم حال
کئی چھیڑو جھگیاں پا گئے تے بن بن گئے چروال
اتھتھے کئی پٹو پلے پٹ دے اُجے اڑے ہوئے کچھی نال
توں لکھاں دیاں میلاں لاہیاں تیرے وچ نہیں میل روال
جتھے پینکھاں ہیر پنکھائیاں سیاں سنگ جُنڈیاں ڈال
اس پیلے بھتہ یار دا پیا آندا ہیر سیال
وَت کچے بھار اڑتوں سوہنی ماری چھال
اُوہ کتھے سٹے نی روہڑ کے کجھ دس انہاندا حال
اُہناں راوی آہا جاوناں توں بدھے سنگل ڈال
تیرے ساہمنے دونویں گس گئے لگیاں پریتاں پال

توں جتنیاں کھونیاں لاہیاں ہوں شمار محال
وسدیاں جھوکاں آہلیاں کئی بیڑے گئے پتال
میں آج بیٹھاں تیری من تے قلم دوات سنبھال
آج کانگاں چھڈیاں اکھیاں رو رو ہوئیاں لال
میں مُنشی انور میر دا اُہ تپے دا ابدال
تیریاں لہراں وچ سما گئے کئی ماواں دے لال
تینوں منکھ نہ لگے دھندیاں پیا چلنا کیں او سے چال
آج یاد کسے بے درد دی میرا چھڈیا سینہ بال
پیاں رل دیاں اتھروں میریاں تیریاں لہراں نال
آئی آج دی رات سراج نوں گھر خضر ولی دے جال

☆☆☆

چنہاں دا جواب

سُن میر انور دیا منشا سفر میرے دی گل
میں کٹیاں کئی منزلاں شکلاں بدل بدل
پھر سرگردان فضا وچ جیوں سودائیاں جھل
توں اک سوہنی دے چھیڑ کے مینوں یاد کراویں گل
میں ڈٹھے ڈھیریاں ہووندے کئی وسدے رنگ محل
کئی چھیڑو سٹ گئے سوٹیاں میرا بیلا مارو جھل
بَن وارث میری من تے کئی گئے نی ملاں مل
ایتھے نقشے رہندے بدلے جھل بریتی تھل
ایتھے میرے اکھیں دھندیاں کئی گئے پچھاویں ڈھل
ایتھے فجری غازے سرخیاں شامی دھوڑاں رل
نہ چھیڑ نہ پچھ اس دیس دی بس چپ چپاتا چل
ایتھے آپ لہراں اٹھدیاں آپے جان دیاں رل
میں چلیا اپنے مرکزوں تے ولیا او سے ول
پہلوں اڈے میرے بخرے سوز کنوں جل جل
میں کئی وٹائیاں صورتاں بھاپ برف تے جل
ایتھے لکھاں سوہنیاں شیرنیاں گیاں رٹھ لے دے ول
ایتھے رہندیاں ڈھاہیں لگدیاں ہر ویلے ہر پل
ایتھے کھوجی آپ کھڑاچ گئے کوئی خبر نہ گھلی ول
میں روہڑ جاگیراں رکھیاں اپنی وچ بغل
ایتھے آج گداگر ہو گئے جھڑے راجے آہے گل
جنہاں کل چڑھائیاں چوڑیاں آج رون پیاں ہتھل
ایتھے فجری گندیاں مینڈھیاں دن ڈھلدے لٹاں گل
انجیں ڈھاہندے بن دے رہن دے میرے بیلے جھل جنگل
اِہ سفر سراج چروکناں اِہ کار میری منزل

☆☆☆

چنہاں دا دیس

دیس چنہاں دا رانگلا جگاں وچ مشہور
سہرا ملک پنجاب دا پابلا نیڑے دور

چھاواں بوہڑاں ٹاہلیاں کیف وجد سرور
پائے ہوئے بانے قدرتی ہر ہر قسم طیور
رُت ہمیش بسنت دی دھرتی مثل کافور
ٹھنڈے کھوہ ہٹھار دے رونقاں تھیں معمور
کیا خوش کدھیاں واڑے دیکھن ٹھلدے پور
مٹھے لوک چنہاں دے نہیں رکھدے فخر غرور
منڈی حسن شباب دی عاشقاں دا کوہ طور
برگ جلا جل رات دن قدرت دے طنبور
پئے پڑھن وظیفے آپنے خالق دے مشکور
سیراں لیاں پھلیاں رتا چٹا بُور
اراڑ چوپترا مینیاں میتھڑے سونف مسور
کئی ٹھلن بھار سناہیاں کئی آپے کرن عبور
خلق مہمان نوازیں کدھیاں دا دستور
بہندال سراج چنہاں نوں جے گھروں ہوندا مقدور



شہر کھیوہ

نیں چندل دے کاچھلے اک کھیوہ نگر کمال
شاناں شرماں واڑے جیوں ساڈواں دی چال
رونقاں داریاں بٹھکاں رہندیاں ہاڑ سیال
پُتر کھیوے خان دے میر شمیر دو لال
ہانیاں وچ نتاریں میر شمیر کمال
وانگ نواباں چڑھتلاں رعب جاہ جلال
داریاں وچ پنچایتاں بہندے پڑھے ڈال
کھیوے گھر گھر جوتاں جگیاں دتے جو بن دیوے بال
سیالیں عمر اداخلاں مست جوانی نال
زلفاں کنڈلاں والیاں سجدیاں بُندیاں نال
نوں گوتاں کھیوے خان دیاں کوئی نہ جھلے جھال
بڑی رُت کوئی کھیوے جٹ تے عزت تے اقبال

بیلہ کدھی ڈیک دی وسے قوم سیال
کھانے دیہن مسافراں کھاوَن نگ کنگال!
چودھری کھیوے خان سی نگری دا پرہیال
بھین اُنہاندی صاحبان ماہ رُخ ماہ جمال
بڑے بہادر پہلوان وانگر رستم زال
سانگاں برچھے رائگے لٹکن پھمن نال
مشکی نقرے تھان تے رکھن گھوڑے پال
عشق دیوانہ ڈیک تے بیٹھا جھگیاں ڈال
لگ لاپے پیریں جھانجراں چلن موراں چال
جیویں چنن رُکھ تے ناگناں لٹکن جیہ نکال
نوکر کامے ٹہلینے گھوڑے منگو مال
پرسدا وقت سراج خدادے اُہدے ہتھ کمال زوال



صاحبان دی پیدائش

دُھمدی ویلے صاحبان جنم لیا خوشحال
دائیاں مائیاں شکل نوں ہوئیاں ویکھ نہال
گود مائی دے آگیا اک لٹ لٹ کردا لال
سُندر روپ انوکھڑا دلکش خط و خال
کن اذان پڑھاوندے منہ وچ زمزم ڈال
صدقے ونڈے ماییاں لے گئے نگ کنگال
آئے صاحبان واسطے کئی روح استقبال
جی آئیاں فی صاحبان ودھی شرف اقبال
تینوں ملیا در جناب تھیں مرزا خان کمال
توں ہیرا کنی چنہاں دی اُہ راوی دا لال
وچ جھولی ہیر بہا کے پئی چمدی متھا وال
میں آپ ازمایا صاحبان اہ پینڈا عشق محال
دے دعائیں ٹر گیا اُہ ٹولہ محرم حال

روشن شعلہ حسن دا قدرت ذی الکمال
سجدے اندر جا پیاں واہ قادر جل جلال
نہاتی دھوتی مورتی مورتی ماہ جمال
بور معبر بودیاں متھا مثل ہلال
کلمہ پڑھیا مومناں ہو گئے سہاہ حلال
اُہدا نام نکایا صاحبان صاحب حسن جمال
لیلی بدیع جمال تے شیریں ہیر سیال
تیرا اُج دنیا وچ آوناں بڑی مبارک فال
تساں کھیڈنی کھیڈ پریت دی سراں دھڑاں دی چال
جوڑ دوہاں دا جوڑیا قادر جل جلال
میں اپنی توڑ نہا گئی توں اپنی وار سمہال
پر لاج نہ لاویں پریت نوں جاویں لگیاں پال
آمین سراج ہر حال وچ رہے عشق نہا ہوناں

☆☆☆

ایضاً

وچ پنگھوڑے ناز دے صاحبان پلدی پئی
دیہی لچھا ریشمی متھا بدر صحی
صاحب نظر ویہندیاں شکل پیچھان لئی
جلوہ حسن طور دا کوئی خان کھیوے دی دھی

جیوں جیوں وڈی ہووندی جگدی جوت گئی
کنڈلاں والیاں بودیاں کستوری دھم پئی
فیر اکھاڑے عشق دے کوئی سگری کھیڈ پئی
بلی شمع سراج تے آگئی بس موت پتنگاں دی

☆☆☆

ایضاً

دائیاں نفران مائیاں نفران خدمت گار
پیریں کلیاں جھانجراں گل ہیریاں دا ہار
جد ہو پئی تن سال دی ٹردی موراں ہار
دل موہندیاں سرتے سوہندیاں بودیاں تلے تار
اُہدیاں سُن سُن مٹھیاں بولیاں پیا خوش ہووے پروار
بھرن شاہزادی صاحبان چائی نال پیار
کناں وچ سہاندیاں بُندیاں کنیاں دار
ماپے ونڈن شریںیاں ہوندے پئے بلہار
پئے عقدے کھلدے چبھ دے مٹھی گل گفتار
کرن صلاح سراج پڑھان دی ہُن علم اہدے درکار



صاحبان دا پڑھن بہاوناں

جدوں صاحبان گلاں سکھیاں اُہ دیندے پڑھن بہا
اُہدی خدمت دے وچ لے گئے نذرانہ تے سروپا
مولوی نال اخلاص دے منگی خیر دُعا
پڑھ بسم اللہ قاعدہ دتا ہتھ پھڑا
صاحبان بسم ہو گئی بسم اللہ الف آ
اک آہا اک رہیگا اکو الف بقا
اک دیاں گل تجلیاں ظاہر تے اخفا
مولوی عالم دین سی اک عالم با صفا
عرضاں کرن اُستاد جی اہنوں دیہو علم ہدا
آمین سارے آکھدے دونویں ہتھ اُٹھا
اہ تک کہو ہک ہے اُہناں دتا الف دکھا
بے بیگانی جان کے اُوہ بیٹھی الف پکا
بے بناوٹاں ساریاں جا سن ہو فنا
جہاں اک سراج پہچانیا عارف مرد دانا



صاحبان دا پڑھنا تے جو بن دی شان

نت مسیتی صاحبان جاندی نال دھیان
شرم حیا ہدایتاں جھڑے دھتیاں دے ارکان
پنج بنا اسلام دے خوب لئے اوس جان
اُس اُچا کدی نہ بولیا رکھدی نرم زبان
کر سلام اُستاد نوں بہندی پھول قرآن
ماپیو بھیناں بھائیاں بولے جی زبان
پڑھے نمازاں ساریاں عمروں اُجے نادان
ماپیو ویکھ ہدایتاں صدقے وارے جان

جس راہ صاحبان جاوندی شایس دیہن جہان
 پیا بُورے نخل شباب دا پئے ہوندے شریان
 مینڈھیاں لشکر نادری فاتح ہندوستان
 وچ زلفاں بوندے چمکدے رُخ زیبا دی شان
 جیوں ساون بدلیاں کالیاں اُگے بگے اُڈدے جان
 لوکی جو بن جس نوں آکھدے اُہ آ گیا مہمان

بھولی بھالی شکل دی دل جاناں قربان
 آ کڈھے منہ شگوفیاں سو حشر دا مان
 جیوں کعبے گرد طواف وچ حاجی مسلمان
 جیوں تارے راتاں کالیاں پئے ڈلکن جگمگان
 یا ٹوپی پوش فرنگیاں دی فوج قواعد دان
 جگ پئی جوت سراج جمال دی تھیاروشن جہل جہان



شاعر دامتقولہ

جد لکھے لیکھ جہان دے قدر جلال جلال
 سیتے سوئی امر دی دل دلاندے نال
 ونھ ونھ نگاں موتیاں رکھے آپ سمہال
 واہ واہ لکھن والیا تیری قلم کمال
 اتھے کم نہ دیندیاں انگلاں توبہ کدھی مجال
 پئے جاگن رشتے ازل دے قدرت ذی الجلال
 جس جھلکے وچ لکھی ہوئی جس کسے دی جال
 صاحبان کھیوے شہر وچ روشن شمع کمال
 ہُن بنھ لے کمر مسافرا وگ گیا گھڑیاں
 لے آ ساندل بار تھیں مرزا پک کنگال
 کر اکھیاں طالبان وچ درس مجاز بہال
 پہلی بھت پریم دی ہوندی دید جمال
 پھولن مصحف عشق دا صدقوں وضو نال
 وت صاحبان چڑھ جائے بیل تے خان کھل دینال
 ونج پیٹھ جنڈورے آخری پین شراب وصال

اوس چُن چُن جوڑیاں رکھیاں لوح محفوظ سمہال
 وت لکھ کرے کوئی انگلاں ہوون جدا محال
 اُہ سر پر اوتھے پُریگا جس لڑی دا لال
 تیرے وچ حساب دے فرق نہ آوے وال
 اس باغوں پھل نہیں لہدے جھونیاں جھانجیاں نال
 جویں شگوفے کونپلاں منہ کڈھن رتی نال
 اُوہ اوس مواتے سڑے گا ہر صورت ہر حال
 اتھے جلنائیں مرزے کھل نے اُہدی اتھے موت حلال
 کوئی نگری دانہ باد دی ونج راوی دیسوں بھال
 اگے تیر انداز چہاں دا بیٹھا تیر کمان سمہال
 پڑھن فنادیاں پٹیاں چھڈ کے قال مقال
 لکھن لوح قلب تے مشق وال رے وال
 پھر بیٹھ پکاون صورتاں تک تک نقطے خال
 وت واہرو ڈھول وگا کے چدھر چڑھن سیال
 آج لکھ سراج اُنہاندڑی بیتی لکھ دسال

راوی دادیس تے دانہ باددی نگری

گل چھڑ پئی دانہ باددی ذراسن میتھوں کن دھر
رجواڑہ کھرا لاں ساہیاں قطعہ ارم قدر
واہ گھبرو راوی دیس دے گھڑ چڑھے بہادر نر
جد چڑھدا سیر شکار تے ساہیاں دا لشکر
راء رحوں پرہیوں دیس دی جگ منصف دانش ور
کھرا لاں دیاں اکی موہیاں سارے با قدر
راء ونجھل ساہی کھرا دا اک جگیں پاہلا گھر
وچ دلی اکبر بادشاہ مغل طاقت ور
اہ واقعہ اٹھویں صدی دا جیوں راوی دیہن خبر

اُہ تپہ نیلی بار دا تے جگ مشہور نگر
پئی دسدی کدھی ڈیک دی کھوہ رونقاں دولتاں زر
وچ کٹکاں پاہلے چونویں رو نیلے طاقت ور
جیویں دلیوں فوج سلیم دی چڑھ آوے دھائی کر
اُہدی پئی پئی وچ جٹا تراں چودھری با اثر
پر کھونڈی رحوں راء دی سب من متھے دھر
اُہ موہری اپنی ونڈ دا تے پتی دا برسر
تے پرگنہ سی ملتان دا صوبے دار ظفر
آج چودھویں صدی سراج نے وت پھولیا اہ دفتر



مرزے خان دی پیدائش

راء ونجھل ساہی کھرا تے پُج اللہ دا احسان
نوکر کاے آبرو عزت شوکت شان
دو پتر گھر اُسدے گل پھل کھو ہان
ترجی جانی بھین سی چھتی نام پچھان!
ماں نصیاں اُنہاں دی نگری دی پردھان
ٹبر ونجھل خان دا سارا خوش عنوان
جس دن مرزا جمیاں سرو سہی بستان
سُدر جہی مورتی نور ظہور نشان
دیہی کلڑا نور دا تک سورج چن شرمان!
جھنڈ معبر عنبری بخت اقبال عیان

کھوہ جوہ ڈیرہ وکھرا وکھرا دُدھ پتر رنگ جہان
سجن ساک قبیلوے باہیں مان تران
وڈا سر جا خان سی نکا مرزا خان
بانکیاں جہیاں صورتاں ناز چڑھن پروان
سیال اُنہاں دے نانکے ماماں کھیوے خان
پر صورت مرزے خان دی چن چودھوین آسمان
دائیاں مائیاں شکل نوں ویکھ ہوئیاں قربان
واہ خالق سرجن ہاریا حق اللہ سبحان
اکھیں گاہریاں مست الست تھیں محویت وچ غلطان
اُہدے متھے اُتے لکھیا حسن عشق بیان

کوئی سُچا موتی حسن دا صدفوں تھیا عیان
دھمیاں خوشیاں شادیاں عشقے دے دیوان
مسجدوں عالم دین نوں عزت نال بلان
دائیاں عشق اخلاص دی گرہتی گھول پلان
جگ دیوے پیا مبارکاں اللہ جوڑے دا نگہبان
اوس پنج بلائے پنڈ دے راء چودھری خانی خان
گر شکر کھنڈ دیاں بوریاں ان منیاں پئے ورتان
سُن مانت ڈھاڈیئے دوارے تے ڈگے آن
جیوں جمدے مرزے خان دی پئے سائی خوشی منان



مرزے دا بچپن

بچپن مرزے خان دا کیا خوش بخت نشان
اُنہوں وچ پنگھوڑے رائگے پیاں دائیاں نفر کھڈان
پیریں پوئیئے تھیں کنگنیاں تے کنین دُرس مسان
اُہ گلاں کرے پیاریاں پیاں دل نوں بھان سکھان
تک عشقا تیرے واسطے پیا پلدا مرزا خان
اُہ پُتلا حسن شباب دا ہوسی پاہلا وچ جہان



راء و نجھل دی موت

مرزا سی پنج سال دا راء و نجھل پیا بیمار
آڈھکی ساعت اجل دی ملک الموت شوکار
اُہدے کو لے بیٹھے رہ گئے سجن رشتہ دار
کیتے بہوں علاج معالجے کوئی نہ آیا کار
جندڑی و نجھل خان دی پئی ترلے لوے ہزار
پڑھ کلمہ پاک رسول دا و نجھل لنگھ گیار پار

خالی چھوڑ حویلیاں محل مکان پسار
جا سیں اک دن غافلہ سٹ سرے تھیں بھار
اوڑک اس شطرنج دی جا سیں بازی ہار
کدی سراج نہ ٹلے گا جو لکھیا لکھن ہار

☆☆☆

مرزے دانانکے جاناں

مرضی اللہ پاک دی ونجھل مر گیا
جیوں دستور جہان دا بیٹھے بھورا پا
ما تم ونجھل کھل دا سارے دیں کہا
پر بہندے ساک قبیلے کد تک ڈیرہ لا
کھیوے آکھیا بھین نوں وکھریاں سد بہا
اوتھے اگے ہانی ایس دے دونوں میر شمیر بھرا
نالے پڑھسی وچ مسیت دے دیوں علم خدا
کہے نصیبیاں روکے اہ پائے وخت خدا
ایہہ جھگی اپنی بھین دی جویں و سدی آتویں وسا
گل لگ مرزے خان نوں وداع کریندی ماں
لے گئے مرزے خان نوں مامیاں چا

کٹھے ہوئے قبیلے سجن ساک بھرا
سجن پار اورار دے پوتے سُن سنا
بھاجی دار برداری لنجواں تے آشنا
گھر آپو آپنے ٹر گئے قل شریف پڑھا
میں مرزے نوں لے جا وناں آپنے نال رلا
رل نال اہناں دے کھیڈی سانوں بھی چال چا
گوشے بیٹھ صلاح پکا وندے دونوں بھین بھرا
میں راضی ویرا میریا تیری جویں رضا
ایہہ بچے تیرے آپنے رکھ اتھے یا لے جا
چاچے منہ سر چمدے لین کلجے لا
دیکھ سراج ہن عشق دا چلن لگا دا

☆☆☆

مقولہ شاعر

عشق شکاری آپنے خوب وچھاوے جال
ملیا اس فن کار نوں حربہ حسن جمال
آپ رہے وچ گھات دے زلف کمنداں ڈال
دانش منداں عاقلان دیوے جنہوں سکھال
دینا آپنے قیدیاں مئے تسلیم پیال

مرغ دلاندے پکڑ ناں ایس وچ فن کمال
رکھے نیناں بانکیاں سوداگر وچ دلال
بھولے پنچھی پھس ونجن تک دانے تل خال
اُوہ عقل فکر دے آہلنے ہتھیں چھڈن بال
وت ہوگ رہائی اُنہاندی لاجواب سوال

ایسے حیلے ساز کے ڈھب لیاوے ڈھال
ہن مرزے نوں ٹور کے لے آیا نہال
مرزا آیا نانکے مامے ماسیاں نال
چڑھ گئے چال عشق نوں مارے پیا دھال
پہلی واری نانکے آیا مرزا لال
گھر گھر پھر دا مہکدا کھیڈ دا ہانیاں نال
مامے مامیاں ماسیاں تک تک ہون نہال
کھیوہ میر شمیر تھیں رکھے ودھ خیال
کھیوے گھر گھر چال خان دے جیوں مومنّاں عید ہلال

اگ برساوَن رسلے ایسے فتنے دیندا ڈال
ویکھیں ہُنے لیاوسی کھیوے شہر بھونچال
شادیاں ساری ٹاہری خوشیاں کرن سیال
ڈوں ڈوں ڈونگے وچ گئے نوبتاں تے گھڑتال
منہ متھا سر چمدے سارے نانک وال
پرہیوا راوی دیس دا سونہیاں بودیاں وال
اُہدیاں گلاں سنن پیاریاں جھولیاں وچ بہال
آکھے ہینی ہو گئی بھین دا رہے سلامت لال
معلم حال سراج خدا نوں ہوسی کوں مال



بیو مرزے دی ماسی

ماسی مرزے خان دی بیو اوسدا ناں
اُہ رنڈی پہلی عمر دی دھی پتر کوئی ناہنہ
بیو بیٹھ رنڈیا کٹیا بہہ خاوند دی تھاں
اُہدی عزت پیکے پنڈ وچ سرمہ کھیوے دی چھاں
جد مرزا آیا نانکے بیو عرض کریندی تاں
میں پتر سمجھاں ایس نوں اہ مینوں سمجھے ماں
کھیوے جاتا بھین دے اگے نہیں ہوندی ناہنہ
بیو مرزے خان نوں چُم لایا نال ہیاں

اُہ پرنی سی گھر کھچیاں اپنے وچ گراں
اُہدا خاوند کچھی مر گیا صوبہ اُسدا ناں
چودھرائی کھیوے نگر دی بہہ پرہیوں کرے نیاں
ہر کم وچ سا جھن ویر دی دانت پت گراں
جے آکھیں تا کھیویا میں مرزا سانہ لوواں
رہی ٹھنڈی بچیاں والیا میری بچیاں والی تھاں
اوس بیو ہتھ پھڑایا پھڑ مرزے خان دی بانہہ
لج پت سراج اکیل نوں ماسی بھی ہوندی ماں



مرزے دا ماسی دے گھر رہناں

لے آئی گھر اپنے بیو مرزا خان
آکھے دیہو مبارکاں میری آس ہوئی پروان

ہر ویلے مرزے لال دا رکھدی بڑا دھیان
ساویاں پیلیاں لنگیاں ریشمی تے حلوان
گٹ گٹ دیندی چوریاں کھا لے میری جان
پیو جاتا وس پیا میرا جگ جہان
مرزا میر شمیر سن تنے ہو بان!
وار مبارک ویکھ کے اکدن کھیوے خان
لگ آگ بارود نوں اپنی ہتھیں لان
دھو دھو مکھن بودیاں رہے بناندی شان
جوڑی رکھے مملماں لٹھے نینوے تھان
دھیاں دودھ پراوٹھے گھیو کھنڈ تے پکوان
پئی لاہوے سدھراں ساریاں پتراں دے ارمان
پھر دے گلیاں ٹہلدے تراوے ویر پٹھان
مسجد مرزے خان نوں لے گیا پڑھن بہان
ویکھ سراج ہن عشق دا ہوندا گرم میدان



مرزے دامسیت وچ پڑھن جاناں تے صاحبان نوں ویکھنا

جس مسجد وچ صاحبان پڑھدی سی قرآن
کر تاکید اُستاد نوں کہندا کھیوہ خان
علم پڑھاؤ اس نوں نال خلوص دھیان
کول اُستاد بہا لیا مرزا نال احسان
دی کنجی علم دی بسم اللہ الرحمن
دو تن وار اکھوا کے صاحبان نوں فرمان
زیراں زبراں ساریاں دسیں جوڑ بنان
صاحبان نظر اٹھا کے ڈٹھا مرزا خان
جلوہ حسن شباب دا چوہدویں چن اسمان
شوکت وانگ شہزادیاں بخت اقبال نشان
اوسے وچ مسیت دے لے گئے مرزا خان
اوہ دوہتر ساڈا راویوں اسان آندا پڑھنے کان
باجھوں علم خدا دی ہوندی نہیں پہچان
شفقتاں برخورداریاں قاعدہ ہتھ پھڑان
فیر بتایا الف نوں اچھی طرح پہچان
توں دکھا ہن ایس نوں نقطے حرف نشان
تسی رکھو دور ہمیش دا رہی سبق روان
لے پتلے قد دا اک صورت مند جوان
مست شرابی اکھیاں کیف پیاں برسان
گھنگھریالیاں مینڈھیاں پیاں پیچ دلاں نوں

پان

غنغوان شباب دا سو حشر دا مان
طاق محراب مسیت دے نور ظہور عیان
لجوتی وانگن صاحبان لگ پئی جھٹلان
آ گیا یاد الست دا عہد میثاق پیمان!
عاشق بسمل ہو گیا صدقے کیتی جان
عاشق نقشہ یار دا کر دا پیا سنجھان
میوے نخل شباب دے من للچایا کھان
اُتر گئے وچ داندے دو قالب اک جان
شاں شاں چنگاں اڈیاں جدوں لگی سٹ ودان
وچھڑے روز بلی دے میلے پل وچ آن
مل گئے دل سراج اُنہاندے جیوں دوندیاں مل جان

ادھر صاحبان جلوہ طور دا یا حور جویں رضوان
مرزا ویکھ تجلی نور دی ہو گیا حیران
مرزا نیڑے جا رہیا اپنا سبق پکان
اک دوجے ول ویہدیاں لیا دل نوں دل پچھان
بسم اللہ صاحبان آکھیا جس دم کھول زبان
صاحبان حرف دکھاوندی انگلیاں رکھ نشان
رکھ اکھیاں وچ اکھیاں پئے دونویں سبق پکان
مرزا اوس دا ہان سی اُہ مرزے دی ہان
ذوق دوہاں نوں جھونیاں شوق چلائے بان
صفناں پڑھن خدا دیاں اللہ تیری شان
پہلے ہی دن دوہاندا انج ہو یا سبق روان



ایضاً

پئے پکاون رات دن اپنا سبق پریت
سجدے شکر بجاندیاں گئے زمانے بیت
اک دوجے دے گل دے ہو گئے ہار تویت
ہٹناں نہیں پیار تھیں ہار ہووے یا جیت
لیا سراج مجاز نے دوہاں دلاں نوں جیت

پڑھدے مرزا صاحبان دونویں وچ مسیت
کر وضو صدق صفا دے لین نمازاں نیت
تن طنبورے رات دن دم دم گاون گیت
رکھ کے ہتھ قرآن تے کر لیندے اجمیت
ہک ترکڑ ٹل گئے جیوں عشقے دی ریت



ایضاً

جوت جگا پریم دی ساری رات پڑھن
نوک زبان سناوندے نہ اک حرف اڑن

بپو دے گھر ڈیگری بستے چک کھرن
سبق آگے اُستاد دے کر کے یاد کھرن

اک پل جدا نہ ہووندے نہ جھٹ وساہ کھڑن
ہُن تینوں شرماں وڈ کئے قدماں وچ جھڑن
استھہ پنج پنج رہناں بچوگل حاسد چک کھڑن
اُہ ہر گردان سمندریں خیریں پار چڑھن
وکیہ سراج ہلاریاں ہن لگ پئی پینگھ چڑھن

بھٹھی وچ پریم دی پئے تن بدن سڑن
محرم کر کے بھیت دا بیو دے پیر پھڑن
سن بیو کہندی لگے ہو تیغاں دی واہڈ وڑن
کرو تکیہ حضرت پیر دا جہڑے اوسدا لڑ پھڑن
میں سنگی رہساں توڑ دی توڑے لکھ سیال لڑن



مرزے دا جو بن

نہ کوئی فکر خیال اندیشہ زری ہنڈا وے پٹ
جھٹ نوکر گھل بلاوندے جے اوہلے ہووے جھٹ
اُہدے کنیں والے پلمدے جیوں لال کرن لٹ لٹ
پئی بھجیدی مس گلاب تے جیوں پوے تریل اُلٹ
تک آکھن گل سیالناں جٹ نرا شراب دا مٹ
خوشبو چھڈی جو بنے پوے شیشی عطر اُلٹ
لتھی تس سراج جمال دی تسے پین پئے گٹ گٹ

وچ کھیوے جو بن لدا پھر دا کھیوہ مرزا جٹ
اُہنوں ویکھ نہ رجدے نانکے کدی متھے پیا نہ وٹ
واہ سوہندیاں مینڈھیاں خان نوں چھلیاریاں کالیاں کٹ
سدھ سوہنا مکھڑا خان دا پر سونا اوس تھیں گھٹ
جیوں چین ہووے پڑ ملیا اُہدے کول سنگاں دا ٹھٹ
واہ دیہی کھل جوان دی جیوں سرونہ کھاوے وٹ
کھیوے جو بن مرزے خان دا کوئی کھل گیا لاکھی ہٹ



ایضاً

مرزا موہری کٹک دا ہتھ رانگی سانگ پھڑے
دیکھن میر شمیر بھی ہو حیران کھڑے
اُہدی پئی پئی وچ گھبراٹیاں ساہی کنوں شیر پھڑے
اُہ کرے نشانہ اڈدیاں پنچھی ترت جھڑے
آکھن پلہ اوکڑا ہووے مرزا جس دھڑے
جس تے کرم سراج خدا اکون اوس تھیں پڑ کھڑے

جدوں رل کے لشکر ساہیاں سیر شکار چڑھے
پیا لاہوے شوق شکار دا چترے چاڑھ رڑے
اُوہ اک اکل جھل وچ پاہریاں نال لڑے
مرزا تیر انداز بلا دا جد چتے چاڑھ جڑے
شیراں وانگر گج کے دلاں وچ وڑے
مرزا بڑا بہادر پہلوان من گئے بڑے بڑے

ایضاً

مرزا پڑھدا نانکے رل کے صاحبان نال
 جاندے اٹھ مسیت نوں نت اٹھ فجری نال
 آیا گھٹاں بنا کے عشق مبارک فال
 صاحبان کملی کر لئی مرزے جادو ڈال
 مرزا بھی لٹ باورا پی پی مئے وصال
 پینگھن پینگھ پریم دی جھولے جو بن ڈال
 عشق دے اگنی دیو نے دتے دونویں جال

بیو دے گھر رونقاں فجری تے تر کال
 پچھلا سبق سناوندے اگوں جوڑ نکال
 تختی دل تے پک گئی مشق دال رے وال
 سائے وانگن رات دن رہندی ماہی نال
 اُنہوں بھُل گیا راوی جاونان بیتے جاون سال
 بیو رہے سمجھاوندی سنبھل چلناں چال
 جل گئے سراج پریم دے ہتھیں بھانڑ بال



صاحبانِ داحسن

جٹی مٹی بھری شراب دی جٹ ویہندیاں پی گیا
 جٹ کھیوہ کھیوے شہر وچ پنگھاں رہیا پنگھا
 اودھر صاحبان حور چنہاں دی سر تاپا ضیا
 رکھے زلف معنبری ناگنیاں لٹکا
 جٹی دے رولے وچ جٹا تراں دیسیں پئی کہا
 پیا گجدا ٹھاٹھاں ماردا اُہدے جو بن دا دریا
 دیندا اے حسن تجلیاں نال نگاہ صفا
 حسن پار چنہاندی من تے اج بیٹھا جوت جگا

کوئی چڑھی خماری قہر دی لوں لوں گئی سما
 اُہدیاں مست شراب اکھیاں کیف رہیاں برسا
 راج بھلائے راجیاں اوتھے بیٹھے جھنگلیاں پا
 اُہدے اک اک ناز دے قدم تھیں سوسو حشر پیا
 اُج کھیوہ کھاوا حسن دا پار اورار ضیا
 بنھ منڈاسہ پریم دا جٹ مرزا ٹھل پیا
 جیوں ظاہر جلوہ نور دا رابعہ ویکھ لیا
 اٹھ چل سراج دیدار نوں تک نور ظہور لقا



ایضاً

صاحبانِ رانی دیس چنہاں دی کھیوہ راج محل
 جوت جوانی جو بنان سورج دا جھلمل

جدوں نکلے رنگ محل تھیں جیوں نکلے چن بدل
اُہدے گل وچ زہری ناگناں لکلیاں مار کنڈل
اُہدے نین دو جام شراب دے حوض کوثر ڈل ڈل
اُہدا جو بن غارت گرا ایمان دا ہاروت ماروت بابل
شمع جتھے دے پروانیاں جانائیں اوسے ول
اُہدا حسن لکھنڈیاں شاعراں آزمائی ہوئی گل
اِہ جلوے جلوے ایہنی جھل دیوانیاں جھل

☆☆☆

صاحبان دیاں ونگاں

صاحبان دی ہتھیں ونگاں سچیاں جویں قوس قزح آسمان
رَتیاں ساویاں پیلیاں نقرئی سنہری جان
کھنکن چھنکن چوڑیاں آپس وچ نکران
گنگا جمنی چوڑیاں لہراں چمک وکھان
اُہ ملدیاں جویں سہیلیاں وچھڑیاں ملن ملان
ونگاں تے ٹیارے نہ کر ایڈا مان
ٹر جا سی وِجارِا کر کے بند دکان

☆☆☆

صاحبان دا بھنڈار

جشن جویں جمشید دا صاحبان دا بھنڈار
پیڑھے چرنے رائگے صندل خوشبو دار
حلبی چینی آسنے جڑت مٹلا کار
ماہلاں پھمن ریشمی ڈوراں تلے تار

یا وچ کھیوے نگر دے اندر دا دربار
چڑھتل گھڑتل اوپری شیشیاں دے چکار
نقرئی اُتے زمردی چمکن زر نگار
کتن بیٹھ سہیلیاں چوڑے بانہہ اُلا ر

صاحبان کول سہیلیاں خوباں خوش رخسار
توبہ غارت گر ایمان دا شاہ پریاں دا ڈار
نین دو گاڑے برچھیاں پھر کجے دی دھار
لوٹی دھاڑے قاتلاں بے ترس قصائیاں ہار
عارض تابدار تے زلفاں مشکبار
مست نگاہ شباب تھیں جے تکن ہک وار
جنتول ہون چڑھائیاں فتنہ خیز جرار
اُہناں بے پرواہیاں سکھیاں چاڑے حسن خمار
ماہ پروین سہیلیاں اک تھیں اک سردار
باغ ارم ترنجاں اتن کتن کار
کہناں نول ول اوپرا تند کدھن تلے ہار
بانڑ بیڑا رکھدیاں ہتھی مئے استوار
کہناں کیتا بیٹھ کے نال دھیان پیار
کہناں چھابے بھر لئے کر لئے داج تیار
کہناں بھریاں جھولیاں ترنجن دے گلزار
جاتا جہاں سوچیاں ویلا مستعار
سدا نہ کھیوہ جو بنناں سدا نہ مکھ گلزار
سدا نہ ونگاں چھنکسن سدا نہ رت ٹیار
اچن چیتی لاگیاں آ جاناں اکا کار
تینوں ودعیا کرن گے ماپے پھیر پیار
اگے وس بیگانیاں ڈاڈھیاں ہتھ مہار
اساں کئی ڈھٹھیاں ڈھاہندیاں پینگھاں چڑھ ہلار
جھکھڑ گھلے پت جھڑے لے گئی وا اڈار

جویں دوالے چن دے تاریاں دا پروار
یا کافر کجے دلاں نوں کرن پئے مسمار
تیز نگاہیں ترکھیاں نکلن سینیوں پار
اوتھے گلیاں دے وچ رُل گئے جگراں دے لنگار
پان شفا ازار تھیں عمراں دے بیمار
بھلن زہد عبادتاں صوفی شب بیدار
فوج جویں سلیمان دی کر دی مارو مار
کر فناہ اک جھلک تھیں وت نہ لینی سار
پر صاحبان فلک جمال تے چوہدویں دے چن ہار
پا پا چھوپے کتدیاں صاحب حسن وقار
چُن چُن کھنچ مروڑیاں رکھن روں سنوار
ول ترکے ول کرن جاون ول لوہار
کہناں دی وچ غفلتاں ضائع گئی دهنوار
کہناں سگویاں پونیاں شامی شرم سار
ہک بیہوش کوچیاں ستیاں ہوئی نہ سار
رکھیا اُہناں رات دن کتن نال وہار
نت نہیں نال سہیلیاں بہناں وچ بھنڈار
اوڑک ڈھلنا جو بنے جاناں بازی ہار
اہ سر پر گڈھیں پونیاں جاناں ندیوں پار
لے جاسن ساہورے دیس نوں تیری ڈولی چک کہار
دت نہ پیکے آوناں رکھن سنگل مار
ڈالاں سنے زمین تے جھڑیاں منہ دے بھار
اج دے وچھڑے کد ملے توبہ کس نوں سار

اے جوانی جو بناں کوئی پل دا پل اُدھار
تلناں دے دے رکھنی ایں سترے صاف پیار
دُھک دُھک بہنی ایں چوترے بڑی سوچجی نار
تیریاں اے رنگلیاں گیٹیاں اٹیاں قبضے دار
نہ رکھ اسنوں بُورے انج سنوار سنوار
کڑیے کت اٹیر لے اے ویلا رات دہنوار
میں اکھیں ڈٹھے ہووندے کتنے سنج بازار
کر یاد انھیری کوٹھری جاسیں بکل مار
جنگل واسا ہوسیا تنے ہتھ پیار
ہکدن آپے انہاندا نکل جا سی لچکار
اس چرنے دی سمجھ لے تھوڑے روز بہار
وَت سراج نہیں لبھناں اے عملاں دا بھنڈا



پیو دامرزے واسطے کھیوے کولوں صاحبان دارشتہ منگناں

پڑھدے مرزا صاحبان دونویں ہکے جا
پین پریم صراحیاں حد حساب نہ کا
دوہاں بہہ کے وچ مسیت دے قسماں لیاں چا
رکھ کے ہتھ قرآن تے لئے اقرار پکا
رکھ حاضر رب رسول نوں لین گواہ بنا
رہن اکٹھے رات دن نہ جھٹ ہون جدا
پھر پیو اگے دوہاں نے دتی گل سنا
آکھن ہو گئی پیئے ہن ہاسیوں گل سجا
پیو سن کے دوہاں نوں لوے کلیجے لا
آکھے صدقے واریاں اے ہن ہی گئے گھبرا
اوکھا پنڈھ پریت دا گئے وڈے وڈے گھبرا
پر اللہ راکھا ہووسی میں کرساں کوئی اُپا
میں دیاں تہاڑے واسطے سر دھڑ دی بازی لا
پیو دل وچ آپنے اے لیندی متا پکا
پڑھدیاں سبق پریت دا عرصہ گیا وھا
جیوں جیوں جو بن جا گیا ودھدا عشق گیا
جان جاوے سو وار پر ہُن ہونا نہیں جدا
بیٹھ ترکڑ پریم دے ٹل گئے ہکی بھا
ہتھ ہتھاں وچ دے کے ضامن دنگیر لیا
رَچ گئے نشے مجاز دے سدھ بدھ رہے بھلا
کڈھ کلیجے آپنے دتے پیش ٹکا
ہن کوئی اللہ نام تے توں تجویز بنا
منہ متھا سر چمدی جیوں سکی ہووے ما
اس وادی دا بچو ہوندا ہر ہر قدم بلا
تسی رلن لگے سنگ وڈکیاں بھار امانت چا
سوئی صدق اخلاق دی دیاں تروپے لا
فرق نہ رکھساں آپنا اگوں ربدی جویں رضا
میں منگاں کھیوے خان تھیں رشتہ صاحبان دا

میں ڈگی بوہے مر کے چا خیر جھولی وچ پا
میں دھی پتر گھر رکھساں مینوں ہوسی چال چا
مینوں اوتر کوئی نہ آکھسی ایہہ جگ وچ رہسی بھا
آکھے پیو رشتہ منگدی اوس دتی کھول سنا
چا آریا کیتی ساریاں پھر دتے ہتھ اٹھا
گھر گھر چال ساک دے ہو گئی خیر دعا
پڑھن دوگانے شکر دے دونویں ماہ لقا
موہوں منگیاں صاحبان گئی مراداں پا
گاؤے گیت سراج سہاگ دے راوی دل ہتھ اٹھا

اکدن ونج ہکلیاں ویرنوں دیندی گل سنا
دیہ ویرا اللہ واسطے صاحبان دا ناٹھ چا
پئی عمر دعائیں دیوساں تیری رکھے شرم خدا
گل سُن دیاں کھیوے آپنا ٹبر لیا بلا!
اہ اوتر بھین غریبی بوہے تے ڈگی آ
ساک قبیلیاں ساریاں سبھ نگری سن لیا
خوشخبری مرزے صاحبان نوں دیندی پیو جا
سیاں دیہن مبارکاں صاحبان نوں گل لا
صاحبان وچ بھنڈا دے بہندی نال سہیلیاں جا

☆☆☆

صاحبان دے گیت

میں رانی جمنا پار دی توں غزنی دا سلطان
سیاں دیہن سراج مبارکاں میری آس ہوئی پروان
نگراں چھڈیاں ٹاہلیاں کرن پیاں شاں شاں
ہوئی بھڑی قبول سراج دی پئی سجدے شکر اواں
میں تیری روز میثاق دی دامن گیر جاگیر
جیوں قسمت نال سراج نوں مل گیا انور میر

وگدی راوی مرزیا لہراں ناز وکھان
جوڑ دوہاندا جوڑیا قادر رب رحمان
وگدی راوی مرزیا کدھی ٹھنڈی چھاں
میں کوئل تیرے باغ دی تیرے شوقوں گاؤں گاں
وگدی راوی مرزیا پیلے پھل پئی سیر
تینوں پایا دو جگ چھوڑ کے میرے بختاں کیتی دھیر

☆☆☆

پیو دادانہ باد سنیہا گھلناں

میں مرزا خان منگایا خان کھیوے دے دل
نی بھین نصیباں والے پئی مبارکاں جھل
میرے لائے ہوئے رکھنوں اللہ لاوے پھل

دانہ باد سنیہوڑا دتا پیو گھل
پنی دھی وھیہن دی من لئی بھائی گل
چال وچ برادری دیسیں ٹُر گئی گل

پڑھدے وچ مسیت دے مرزا صاحبان رل اپنا سبق پکاو دے ہر گھڑی ہر پل
ہو یا روشن تیرے لال تھیں میرا سُبھا رنگ محل اَج گھڑی سراج اقبال دی اللہ جانے کل

☆☆☆

مرزے دی ماں دا کھیوے آوناں

ماں مرزے دن سن کے خبر ہوئی شادان گھر گھر پھر دی ونڈ دی پنیاں تے پکوان
مینوں نو نہ دتی رب صاحبان لکھ شکر احسان اوس سدی گل برادری جیوں دستور جہان
آئی کھیوے شہر توں لے ورتن سمیان آئی کھیوے شہر توں لے ورتن سمیان
مونہ متھا سر چمدی لا گل مرزا خان دیوے دعائیں ویرنوں شالا رہی سلامت شان
گھر گھر ہو یاں ملنیاں پئے پیکے ملن ملان

پھرے مبارکاں جھلدی نگری دی پردھان مامے دے گھر منگیا میرا لاڑا مرزا خان
اللہ تیری شان تھیں میں صدقے قربان راء و نچھل دے گھر رونقاں بھاجیاں دیہن دوان
جوڑے صاحبان واسطے نرمے ریشمی تھان چھاپاں ونگاں صاحبان نوں پھپھی پائیاں آن
کج لیا ای بھین نوں تیری اُچی رہے کمان کجھ دن سراج گزار کے ہو گئی دانہ باد روان

☆☆☆

عاشقاں دے پیار دا ظاہر ہوناں

مرزا پڑھدا نانکے چال چا ہزار پیا لٹے نشے پریم دے جو بن دے بازار
دن رتیں لنگھدیاں کر کر رات دہنوار مرزا صاحبان پریت وچ حدوں لنگھ گئے پار
پیو گھر پریم دی چڑھ گئی پینگھ ہلار پھر ہولی ہولی اُنہاندی لگ پئی ہون وچار
عشق زور آور اوکڑا چھپے نہیں زنہار عطر نہ چھپیا رہیگا لکھ رکھے سانجھ عطار
کھکیں اگ نہیں چھپدی اُٹھی بھانڈ مار ہرگز رہن نہ گھیاں جد اکھیں ہو یاں چار
وچ مسیتی لڑکیاں کیتی شروع وچار دسن ونج اُستاد نوں جوڑا ہزار طومار
آکھن ایہہ اُستاد جی پڑھدے نہیں زنہار ایہہ ہس ہس وچ سرگوشیاں دیندے وقت گزار
اُٹھی گل مسیت تھیں گئی تندور بازار جد آئی منہ زنانیاں لگ پئے ہون لنگار

پھر دے مرزے صاحبان ہرن جویں ہر یار
وَنج صاحبان دی ماں نوں دسیاں جھولنار
گلاں تیری دھی دیاں دھمیاں نگر بازار
صاحبان سنگ منگیتر دے پھر دی پٹیاں دھار
جویں اگ چواہیں کپڑیں لگدی بھانڈ مار
کول سراج بہا کے لگی کہن دو ہتر مار

جوڑ کہانیاں جوگناں دتے بنھ گھو کار
جوڑیاں سچیاں کوڑیاں گُند پروکے ہار
سُن چودھرا نے سُنئے ویکھ نکل کے باہر
ہر گھر شروع کہانیاں لگ گئے اشتہار
سُن صاحبان دی ماں دے اڈ گئے ہوش قرار
بندہ گھل بلاوندی صاحبان نوں بیزار

☆☆☆

صاحبان نال ماں دا غصے ہووناں

وتیں وانگ سودائیاں گل وچ زلفاں گھت
کرماں ماریے تئیں تا چھڈے نی تت
اَن آئی مرسیں صاحبان تیری گتے پسن رت
ساڈے گھر کو لنگے کالے بھوئیں ہیر پیوں جم وت
لیک نہ لاویں تئیں کر کے کوئی کپت
چھکاندی وتیں جھانجراں تیری زمیں نہ آوے لت
رکھ ہوش ٹکانے دیوساں تینوں مار بھڑولے گھت
کیہ جہان اکھسیا انج نہ کملی وت
گل مکدی سمجھ سراج ایہہ توں پڑھن نہیں جاونان وت

ہنجے جانیے صاحبان ایہہ کیہ چائی آ ات
سُن گلاں تیریاں میرے جُسے سک گئی رت
کھول کناں دیاں کھڑکیاں سُن لے میری مت
تیرے پیر کوچے دسدے تیری گئی اے چال پرت
ٹکاں دیاں من لئی باپ تیرے دی پت
وچ گلیاں وتی ایں دوپٹے سنگ مرزے جُنڈیاں گھت
چا چا ٹرنی ایں لنگیاں کھول انگی دے نت
اُوہ منگیتر تیرا بورئے پر اتنی چا نہ ات
توں ہن پو گھر نہیں جاونان گھر بیٹھ کواریے کت

☆☆☆

صاحبان دا فکر

جان گئی عشق آ گیا اپنا آپ دکھان
ہائے توبہ کیہ ہووسی جے نہ ملیا مرزا خان
بھائی میر شمیر بھی کلنی دار جوان

صاحبان متیں ماں دیاں پئی سندی نال دھیان
اگے اہو دھروہ سی کھاندا رہندا جان
جگیاں دیسیں نیاں میرا بابل کھیوے خان

اک پاسے دانت دیس دی اک پاسے عشق امان
پئی بیڑی وانگن ڈولدی صاحبان نازک جان
عشق کنناں وچ پھوکیا صاحبان آج تیرا امتحان
اہ مارو وہن پریم دا پیماں لہراں شوک ڈران
گھر یار دا نیلے پارلے منزل لا مکان
وچ بدلاں کشتی مہر دی بن ڈنڈے تردے جان
جد صاحبان صورت یار دی سامنے رکھی آن
اوس ثابت کیتیا جیوڑا کر نال عشق پیمان
اس نویں سروں پھر سوریا لجونتا پیر پیران
میں کھڑی ڈھیری صاحبان ربا ثابت رہے ایمان
پے گئے وخت قضے کٹنے عمر اے نادان
اہ پہلا قدم مجاز دا تلکن باز میدان
اتھے کئی ڈٹھے نی ڈولدے بڑے بڑے بلوان
جہاں سر پر ہووے جاوناں ٹوٹ اکھیں چھال لگان
ونج آخر منزل پہنچدے چُج شامی شام منان
کوئی لذت آئیوس اوپری دھمدی گئی وچ جان
میں کدی نہ صدقوں ڈولساں بھائی آوے اُلٹ جہان
کدی سراج نہ ہار سی جہدی مدد شاہ مردان



صاحبان داماں نوں جواب

توبہ توبہ انہڑیئے مڑ توبہ لکھ وار
میں پڑھنی آن وچ مسیت دے تے کتنی آن وچ بھنڈار
میںوں آکھیا آپ اُستاد نے رکھ مرزے سنگ تکرار
اُسد میرا سبق بھی ہو دساں سچ نثار
فیر پڑھی نجات المومنین خوب سنوار سنوار
لوکاں کیوں سنائی ایں ایہہ تینوں اختیار
میں وت مسیت نہ جاوساں نہ جاساں بھنڈار
کیوں کرنی ایں شہریاں میںوں وچ سنسار
کجھ اکھیں تک کے کھندیوں میرے عیب نثار
اہ کیوں سنائے تده نوں جوڑ طوفان طو مار
جے میں تریجی جائی بیٹھی آں جاواں وانجھی ہر دربار
اسی رکھنے ہاں دور ہمیش دا پہلے پچھلے پاہر
اسی الحمدوں والناس تک پڑھ چکے کئی وار
ہن سبق ہے نور ایمان دا ہویا روشن دل ہنجار
میںوں آپے جمیونی امہڑیئے ہن اپنی ہتھیں مار
اندر و اندر تئے میرا کٹ کے گھٹ اچار
لاندا رہندا اے لوتیاں جگ فتنہ خیز مکار
مولا کجسی کج سراج دے اُدا نام ستار غفار



صاحبان دامت جاناں بند تے مرزے داناں کے

گھر آوناں تے مامی دامت مرزے نوں جھڑکناں

صاحبان نوں پھر ماں نے پڑھن نہ دتا جان
 جیوں پنجرے پر مار دا پنچھی بے زبان
 اودھر مرزا آیا وچ مسیت دے جد فحری ہوئی اذان
 اُہدی گل آ گئی جندڑی جیوں مچھلی ریگستان
 اوس دن لنگھایا روندیاں نین لہو برسان
 جد چھٹی ہوئی مسجدوں جیوں نکلے تیر کمان
 اگے مامی بیٹھی پلنگ تے نوکرانیاں وچ دالان
 مامی جس دم ویکھیا بوہیوں اودا مرزا خان
 گل سن نصیبو جایا میری نال دھیان
 تینوں رُلدیاں ویکھ کے پالیا کیتا پال کھوا جوان
 جے تے سُن پاوَن ایس گل نوں میرے میر شمیر پٹھان
 توں بنھ بنھ ٹرنا ہین لنگیاں لف ٹرنا کیں ساہن
 اے ویلائی ساڈے نگر تھیں ٹر جا ایسے آن
 چپ کیتا نانکے گھر تھیں ٹر آیا مرزا خان
 اُنہوں دنیا اُجڑی جا پدی جیوں چرخ چڑھے آسمان
 اج ڈول اوئی جا پدی بیو نکدیاں لیا پچھان

بلبل باغ پریم دی ہو گئی بندی دان
 اُہدے بھا اُنھیریاں کالیاں جگ سارا ویران
 نہ دسیا جلوہ یار دا پھر پھولے کون قرآن
 ٹھاہ ٹھاہ توپاں کھڑکیاں دلتوں پئی دھر سان
 بھکھا تے ترہایا دن سارا حیران
 آ وٹیا گھر نانکے ڈاڈھا نمہوں جھان
 اُنہوں نظر نہ آئی صاحبان کتے اندر باہر مکان
 بجلی وانگ وسا کھ دے لگی کڑک ڈران
 وت توں ساڈے گھر نہیں آوناں جے ہے لوڑ بندی جان
 ست پیڑیا دوہتر ویریا لگوں دانتی نوں ہتھ پان
 تیرے جیوندے دے کر ڈکرے کاواں کُنیاں پان
 پھریں وچ بھنڈاراں مستیا جیوں بھور بھنوالیاں کھان
 اسی کچھ نہیں تیرے لگدے نہ توں ساڈا مہمان
 اُنہوں کوئی جواب نہ آیا اُہدی ہو گئی بند زبان
 کھاندا گلیاں وچ بھنوالیاں گھر بیو ڈگا آن
 چُجھے گل سراج پیار تھیں دس میں صدقے قربان



مرزے دامت بیو نوں روکے دسناں

رو بیو نوں دسا مرزا ساری گل مینوں مامی مندیاں بولیاں بنیاں بڑا کول

اوس مونہہ در آئیاں کڈھیاں پئے کلجے سل
مینوں آکھے کرماں ماریا تینوں رُلدیاں لایا گل
مینوں نظر نہیں آئی صاحبان جیوں گئی نمائیں کل
میں ساڑیا اُہدیاں بولیاں ٹرویاں راوی ول
کوئی کرکھاں ڈھو ملاپ دا ہکاری پئے رل
کتے مونہہ کرویاں روندیاں ڈب مرویاں جل
میں چھوڑ جاگیراں ساریاں در یار دا ہساں مل

میں ماریا کسے لحاظ دا چپ کیتا آیا جھل
ہُن ٹنائیں دس دس آکڑاں کھا جوٹھ اساڈی پل
میں سڑدیاں دن گزاریا جیوں مچھلی بن جل
رکھے مامی اپنے دیس نوں وت کدی نہ آوساں ول
میں اُٹھ مہاجلے جاوساں لواں آخری ویکھ شکل
ہن میرا راوی جاوناں جاپدا اے مشکل
کعبہ گلی یار سراج دی میں ساڑاں رنگ محل

☆☆☆

بیو دی مرزے نوں مت

بیو کھندی صدقے مرزیا نہ ہوتا دل تنگ
اُوکھا راہ مجاز دا ایہو اس دے رنگ
جنہاں سچ سرہانے منگئے اُہ کیوں ہوون ملنگ
اُوکھا ہوندا اے پاناں ہتھ بیگانے لنگ
اپنی ہتھیں سٹی آ وِج بارود چنگ!
تکدا جا ہن مرزیا رب سچے دے رنگ
میں لے آواں گی صاحبان نال کسے بہانے ڈھنگ

لہدائے درشن یار دا سر سولی تے تنگ
جھل چپھڑاں چھیڑ کے نال شیراں دے جنگ
بن جان لئے نہیں چھوڑ دا اس عشق دا زہری ڈنگ
نال پھلاں دے دوستی پھر کنڈیاں تھیں نہ سنگ
ہن سڑ سن تیرے ساہنے راوی اتے چہنگ
اساں بیڑی اُٹھ چڑھاوناں چڑھسی کہڑے ڈھنگ
چھوڑ سراج اندیشہ رے فضل خدا دے منگ

☆☆☆

صاحبان دا مرزے کول بیو دے گھر آوناں

رکھ دلیری صاحبان گھروں نکلی بکل مار
لٹکن کالیاں ناگناں گل وراگناں ہار
اگے عاشق جاں بلب سی نزع جویں بیمار
دن سارے دے اودرے گل لگ لگ پئے یار

بیو دے گھر آ وڑی چن جویں چکار
اکھیں رو رو بُجیاں کرمائے رخسار
پیا تروکا روح نوں دلبر دا دیدار
درد ستائے بے صبرے روندے جا تکاں ہار

وصل بجھارتاں آتشاں سینے لیندے ٹھار
اس لکھاں جھگے وسدے کیتے پٹ خوار
کیتے اس قلوب دے کئی قلعے مسمار
تھیا تھئی نچاؤندائے صوفی شب بیدار
چُن چُن موتی رانگے اس کیتے خاک خوار
میں راوی ٹر چلیاں توں صدقوں جائیں نہ ہار
پھر نال نصیب زیارتاں کیہ زندگی دا اعتبار
بانجوں ہمت حوصلے مشکل لنگھناں پار
ہائے ٹر چلیاں بیلہ مینوں ہتھیں ونجیں مار
میں کرماں ماری صاحبان جھڑ پئی دندان بھار
میرے سجدے تیرے بُت نوں توں نور الابصار
کیا جاناں کد ملاں گے ہتھ تقدیر مہار
ناہی ایس ہنیر دی رُڑھ گئی نوں سار
پر رکھیں یاد سراج نوں چھڈ چلیاں شوہ وچکار

برہوں بھٹھ تپائے سن روم روم انگیار
ہائے توبہ اس عشق دا کتنا بڑا ازار
کردائے نازک دلاں تے دھاوے تے یلغار
تروڑ تکبر شوخیاں لیندائے خوب سنوار
کڈھ ستروں شاہزادیاں کردائے نشر بازار
مرزا کہندا صاحبان سُن میری گفتار
پائیاں پیش جدائیاں فلک کج رفتار
ایہہ مارو وہن پریم دا خطرے خوف ہزار
صاحبان جاتا انبر ڈولیا دلنوں پئی دھسکار
ادھ وچکاروں ترٹ پئی میری چڑھی ہوئی پیگھ ہلار
مینوں قبلہ کعبہ معنوی تیرا پاک دیدار
مرزا سمیں وصال دے لگھ گئے خواباں ہار
چھڈ چلیاں وچ دوتیاں سٹ سرے تھیں بھار
ہلا بھلا میں واریاں جاہ میرے دلدار

☆☆☆

کلام مرزا

میں جلدی واپس آوساں رکھ برابر نیت
بھل نہ جاوے جانیاں پردیسی دی پریت
توں کعبہ میری جان دا تیرا بُت مسیت!
رہسی زندہ عشق سراج دا صدیاں جاسن بیت

نہ گھبرا توں صاحبان رکھ نہچا اجمیت
رکھیں وچ دھیان دے عشق کھرے دی ریت
میں پڑھاں نمازاں تیریاں نیت تیرے ول نیت
میں بازی سَر سَر کھیڈ ساں ہار ہووے یا جیت

☆☆☆

کلام صاحب

جدوں بخرے ملے نصیب دے مرزا چہنوں لوک کہن میثاق
تتی ملیا تیرے بُت نوں وَت تیرا سوز فراق
جدوں وجی الست دی بنسری مست ہويا آفاق
لوکی رہے بللی بللی کو کینڈرے میں تیری مُشتاق
مینوں زہر وچھوڑا مرزا وصل تیرا تریاق
میرے لُوں لُوں دُھکھن دُھونیاں جیوں آتش چقماق
تیرا دامن کدی نہ چھوڑساں دیوے سارا چھوڑا آفاق
ہون سراج نصیب سنگ سبناں دے اتفاق

☆☆☆

صاحبان کولوں مرزے داود عیا ہوناں

ملیا دوہاں بچاریاں ڈاڈا تنگ میدان
وقت تھوڑا دُکھ ڈھیر سن رو رو پئے سنان
جاناں درد ستائیاں پیاں بیڑی وانگ ڈولان
مت ویری ایس گل نوں پاؤں شور مچان
پیا تسلیاں دیوندا مُڑ مُڑ مرزا خان
میں جلدی واپس آ وسوں نہ رو میری جان
صاحبان رہے نہ حوصلے رُنی نال ارمان
توں بھی چلیاں مرزیا گے چھٹ گئے دونوں جہان
میرا جگ ونجا کے مرزا چلیاں چھوڑ مکان
میں رہ گئی کسے نہ کم دی اللہ تیری شان
رہیں سلامت والیا توں میرا مان تران
تینوں لاج سراج دی توں لچال جوان

☆☆☆

وچھڑن لگیاں صاحبان دی فریاد

جاہ حوالے رب دے مرزا دانہ باد
توں ودعیا ودعیا ہو گئے میرے سکھ سواد
ونج سانجھ جاگیراں جا کے رہے دیس تیرا آباد
پر رکھیں چیتا چلیاں پٹ میری بنیاد
رکھیں صدقہ نام دا میں تڑی نوں یاد
میں دو جگ خادم تیری آں ضامن شاہ بغداد
تیرا اللہ حافظ مرزا شالا رہیں ہمیشہ شاد
تیریاں خبراں سُن سُن جیوساں کٹساں ہجر میعاد
بھیڑ پئی تے پُکڑناں لُج ونداں دا ارشاد
تینوں لاج سراج دی اوکھے وقت امداد

☆☆☆

مرزے داراوی پونچناں

رو لے راوی دیس تے گڑ گج ڈھولاں گھمکار
 ماں متھا منہ چمدی صدقے جاوے وار
 آ اسیساں دیوندے بھٹ بہمن جسدھار
 راء ونبھل دا لاڈلا نیلی دا اسوار
 دارے لایاں مجلساں پیو دادے دے ہار
 آئے چودھری دیس دے نذراں گئے گزار
 مرزا موہری کٹک دا کھیڈن بار شکار
 قبضے رکھے اپنے ہر دم پنج ہتھیار
 مرزا سد گویے دیس دے رکھدا شغل بہار

مرزا آیا کھیویوں خبراں پار اورار
 سر بے شکر گزار یا گل لگ ملدے یار
 جگ جگ آوے رانگلا کھراں دا سردار
 سہرا راوی دیس دا دھن داتا دا تار
 پیڑھے موہڑے رانگے نوکر خدمت گار
 وٹو بھٹی باجوے تارڑ ورک شمار
 ڈانگاں سانگاں برچھیاں ترکش تے تلوار
 دہت چنہاں تک نیا کھراں دا دربار
 خوش ظاہر وانگ سرانج دے پراندر عشق ازار



مرزے دا کھیوے دا حال ماں نوں دسناں

حال کھیوے دا ماں نوں دتا خان سنا
 مینوں آکھے کسے نہ گھرے دا مشنڈا بے حیا
 تینوں آملنے ڈھٹھیا پالیا ہن کھنڈ جمیں نی آ
 مائے سُن سُن گلاں اُہدیاں میرے ہو یا کیجے گھا
 باقی منگ اساڈی صاحبان جے تے دیہن کتے پرنا
 سُن ماں مرزے دی جاگ گئی اہ آیا گل ونجا
 میں سحری سانجھاں جا کے گل اٹھدی تے تا
 اُہ آئی کھیوے پنڈ نوں کجھ میلہ جوڑ بنا
 بہندیاں پیو ساریاں دتیاں کھول سنا
 دن دو جے جوڑ کے مشرے گھر پیکے وڑیاں جا

مینوں مامی لڑ کے کڈھیا ٹھمتاں بدراں لا
 کھا کھا جُوٹھاں ساڈیاں پھر دائے دھون اکڑا
 اتھے بیٹھائیں کہڑے آسرے اگاں چھڑ چگ کھا کما
 اساں وت نہیں نانکے جاوناں میں آیا سیر مکا
 سنے گڑماں دیس اجاڑ ساں پوسی جگ کہا
 میں جاواں پچھاں ساریاں آواں لگی اگ بجھا
 اہ ڈر دا نہیں فساد تھیں مرزا بڑی بلا!
 پیو دے گھر جاوڑی پیٹھیاں مل ملا
 ہن کوئی نہیں چارا دسدا ہو گیا ڈھیر ودھا
 ماں صاحبان ویہندیاں لیا سنگاں اُتے چا

جڑ گئی گل برادری سارے بھین بھرا
دوہاں بھیناں رو کے پیا کیتا ڈھیر اُپا
گل مکدی کھیوے خان نے دیتیاں بھیناں گھروں اٹھا
ٹر آئی دانہ باد نوں خان کھرل دی ما
مرزا سن کے آکھدا مائے نہ گھبرا
بس کھیوے دانہ باد دا ہو گیا مک مکا!
منگ کھرلاں دی کھس گئی جگاں سن لیا
ایدھر دھروئی اج مرزے خان دی اودھر میر شمیر کہا
مرزا دُنیا واسطے بہندا پرہیوں لا



مرزے دا شاہزادہ سلیم دی فوج وچ بھرتی ہوناں

سال گزاریاں خان نے بہہ کے دانہ بار
چت اُداسی ہويا بھل گئے سکھ سواد
طبع بہانے لوڑ دی دل ہويا ناشاد!
اُس سنگی کچھ بنا لئے اپنی حسب مراد!
ملدا شاہ سلیم نوں لے نذراں شاداں شاد
نسل بتائی آپنی کل آباؤ اجداد
تک مرزے دا جوہناں ہويا شاہزادہ دلشاد
مرزے پائیاں منگیاں وریاماں شوق جہاد

عشق زنجیراں تروڑیاں پائے شور فساد
نال ماہی دے بیتیاں اُنہوں گھڑیاں آیاں یاد
کسے وسیلے آسرے اہ کٹاں ہجر میعاد
رکھ اُمنگاں پہنچیا دلی جہان آباد
مینوں شوق ہے اکبری فوج دا بے ہووے ارشاد
رکھ حضور شاہزادیا میری اہو مراد
اُس بھرتی کیتا خان نوں وچ خاصے دی امداد
پئی قدر سراج جوان دی تک جوہر طینت زاد



مرزے اُتے شاہ سلیم دیاں مہربانیاں

اندر فوج سلیم دی مرزے پایا نام
کھرل بہادر سورماں منیاں ہند تمام

لکھی ہوئی جناب تھیں فتیا اُسدے نام
 رکھے اُنہوں اپنی خدمت وچ مدام
 بے تکلف دوستی سفر و حضر مدام
 شاہی وچ دربار دے عزت احترام
 نوکند ایرانی نسل دی نیلی اُسدا نام
 مرضی سمجھ اسوار دی ٹُر دی باجھ لگام
 پر وچ ہزاراں گھوڑیاں فتیا اُسدے نام
 دتی شاہ سلیم نے مرزے نوں انعام
 ہر مجلس وچ اُسدا امتیاز مقام
 کرے رب رسول سراج دا شالا نیک انجام

مرزے دی تحویل وچ لشکر اژدھام
 ویکھ شاہزادے کھل دی جرات پختہ کام
 مجلس وچ سلیم دے مرزا صبح و شام
 پائے شاہ سلیم تھیں تمنے تے انعام
 وچ شاہی اصطلد دے اک گھوڑی تیز خرام
 اُس چابک کدی نہ جھلیا نازک اُسدا چام
 ویکھن دے وچ جاپدی بہوں نازک اندام
 نیلی پری کوہ قاف دی آکھن خاص عوام
 کفنی طرہ دیں دا عزت احترام
 اڄ جگ وچ مرزے کھل دے بخت اقبال غلام



مرزے دی دانہ باد واپسی

پھر طبع اُداسی ہو گئی آندے عشق بھونچال
 کھچ لئی واگ پریم نے چل اپنا دیں سمہال
 چل سجنان دے در تے پیہ ڈیرے ڈال
 اہ کیوں سدھر چھوڑیے لینے چل نکال
 ہو ہک پکا کے دیئے دُوئی نکال
 رُٹھا یار مناویے چھڈیے غیر خیال
 بھل گئیاں سب لذتاں عزتاں تے اقبال
 آقا دیہو اجازتاں گھر دا ویکھاں حال
 گھوڑے جوڑے دولتاں جیوں سلطانی چال
 حاضر وچ دربار دے ہوویں سال بسال

وَسدیاں دلی خان نوں ہو گئے دو سال
 کدی آرام نہ آیا عشق جہانندے نال
 پیوں کھڑے دھندے مرزیا سٹ پٹے جنجال
 سمجھے کھیڈاں کھیڈیاں رہ گئی عشق دھمال
 کد مگن دنیا داراں نفس گتے دے جال
 کیتا قول الست دا لینے اپنا پال
 عشق ہوراں نے خان نوں دتے بھانبر بال
 کول شاہزادے آیا ہتھ بھجھ کے کرے سوال
 شاہ سلیم انعام تھیں کیتا مالا مال
 دَسدا رہویں بیلیا وقت ضرورت حال

میں پروردہ مغل دا رکھساں نمک حلال
کدی وقت ضرورت آوساں آپے لہیں سمہال
دیس اپنے وچ آ گیا گڑ گج گھرے گھڑیاں
نویں سروں پھر رونقاں و دھن رُعب کمال
شالارت نصیب سراج تے آج راضی جل جلال

خان دعائیں دیوندا تیرا ودھے شرف اقبال
مینوں آج درپیش ہے اک مہم محال
مرزا ودعیا ہو گیا شاناں عزتاں نال
وَت روئے راوی دیس تے گھر گھر وچ اقبال
کھراں دیاں اکی موہیاں آہندے پاویاں نال

☆☆☆

مرزے دا وچھوڑے وچ حال

آجس پڑھدے خان دا بھٹ جس دھاری میر
بھٹ دعائیں دیوندے راجہ کھریل امیر
پر اندروں ہو کے ہجر دے نکلن سینہ چیر
رہے کلیجہ سدا برہوں گجھا تیر
رہندی اکھیں ساہنے دلبر دی تصویر
جند کریرے تیری بار دے میرے بھادر دوس نظیر
دیکھاں ونج جھناں دے بیلے پھلی سیر
چا سنوار سراج دی یا قادر تقدیر!

دیسیں مرزے خان دی عزت تے توقیر
دیندا رہندا مانگتاں خلعتاں تے جاگیر
ظاہر فکر اندیشہ نہ کوئی دامن گیر
بہندا لا لا مجلساں ویلاں وارن پیر
کر کر یاد زمانے وصل دے اکھیں چوندا
پار جھناؤں وسدیا توں ماہ وش بدر منیر
دیوے جوش دیوانگی جاواں تروڑ زنجیر
چھوڑ جاگیراں یار دا ہوواں ڈیرے دار فقیر

☆☆☆

مرزے خان تھیں پچھے صاحبان دا حال

پچھے صاحبان واسطے سارا دیس ویران
مٹھ مٹی دی صاحبان بھل گئے نخرے شان
اک پیو دا آسرا دشمن گل جہان
سیاں گنیاں کتنوں وت نہ پیٹھیاں آن
تک کے اُسدے حال نوں ہتھوں ہون حیران

جس دن کھیوے نگر تھیں ٹر آیا مرزا خان
جیونکر روح دے نکلیاں بُت ہووے بے جان
اُہدے وسوسے پیگئے بھائیاں ماپے بدگمان
بھل گئے شوق جھنڈا دے رہ گئے چھو پے پان
رل مل جان سہیلیاں اُسدا من پرچان

پنی ہوئی رات انھیر ٹی جیوں راتی گستان
نی میں موئی پنی نوں کیوں ستاؤ آن
میرا پڑھو جنازہ ساریاں رل مل دیہو مکان
ہوندے جاندے اُسدے دُکھڑے باہریان
پنی! بلدی قلم سراج دی اکھیوں نیر روان

تیرے باجوں صاحبان پیا بھنڈار ویران
صاحبان رَو رَو آکھدی خونی اشک روان
کیوں ہوتی کریندیاں لاش میری ویران
ایہو اوس دا حال سی روگی بے درمان
توبہ! اُسدے درد دا لکھناں نہیں آسان

☆☆☆

ایضاً

رات دلیلیں دُھمدی گن گن دکھی ساہنہ
درداں لٹی صاحبان کھو پک گئی ناہنہ
کھائی تاپ و جھاپ نے سینے بھڑکن بھانہ
پھڑچھتے کھوہ دیاں ٹاہلیاں ٹانگوں دیندی راہنہ
پنی وقت سراج گزار دی پڑھ پڑھ باراں مانہ

صاحبان دا دن لنگھدا بھر بھر گجھیاں ہانہ
ڈھیر ولان سہیلیاں پھڑ پھڑ تھکیاں بانہ
دارو درل ٹونیاں ماپے لاون وانہ
گھروں نال بہانے نکلدی نظر بچا بد خوانہ
رہندی سدمر بندی شوق دے راوی ول کھیاں بانہ

☆☆☆

مرزے دا فرق۔۔۔ صاحبان دے باراں مانہ

چیترا

پالے ودعیا ہو گئے رتیں گھیاں بھوں
سٹ برہوں نچہ سراج نوں ٹرگیوں راوی نوں

چڑھیا چیترا مرزیا جلیں وج گئے دُون
تائے بھٹھ بھٹیاں بھجن لگ پئے جُون

وساکھ

تک تک تیری راہ نوں میں مرزیا تھک گئی
آمل سراج وچھوڑیوں میں ڈاڈھی اک گئی

وگ پئے ڈھول دے ہن ہاڑی پک گئی
سُن سُن مہنے تیرے پیار دے آجندڑی نک گئی

جیٹھ

جیٹھ جدو کا تپیا میری تائی جان لُوواں اندر باہر موڑے میں کبڑی گٹھ سواں
تیری راوی ساندل بارنوں مَن کر کے منہ بہواں آمل سراج یتیم نوں مت موئی ہوئی جی پواں

ہاڑ

ہاڑ ہجر دیاں لانبوواں میرا ساڑیا دیس چہاں ول پرتیں دوجی نیں دیا تیرا درشن ٹھنڈی چہاں
جتھے پھولاں دُکھڑے آپے مینوں کوئی نہیں دسدی تھاں جند جاندی نکل سراج دی سکھ پاندی خبرے تاں

ساون

ساون سنگتاں بہندیاں جیوں سنگتاں دی ریت گل پھل آہموں ساہمنے گاؤں سوہلے گیت
تیرے باجھ وراگن صاحبان گئے زمانے بیت اللہ چاہڑے توڑ سراج دی لئی نیت نماز پریت

بھادروں

بھدر دے کے بھار فراق دے مرزا پڑ پدیس گیوں مینوں ہجر چہاں وچ روڑھ کتے راوی بیٹھ رہیوں
میں تردی آواں بولیاں تارو تردے جیوں لُج وندا بانہہ سراج دی پھڑ چھوڑی جانا نیں کیوں

اسیں

اسیں آکے ویکھدوں میں جیوں درداں مار لئی پار دُراڈیا دسدیا توں چنگی سار لئی
مینوں مہنے دیہن سہیلیاں میں سُن مَن ہار لئی بودیاں نال سراج نے مَل موت ادھار لئی

کتیں

کتیں کرماں کنڈیں دیتاں جد کنڈیں دے گئے یار سمجھ گناہی چھوڑ گئے ٹُر گئے ندیوں پار
کہڑا دوس بیگانیاں جد اپنے پھرن بیزار ناہی کجھ سراج نوں ایس ظلم دی سار

مگھر

مگھر منگدی رہنی آں میں دن تے رات دُعا
میرے گل وِچ کھلیاں مینڈھیاں میں کردی پھراں گدا
کدی قسمت نال پوچا وندا مینوں دانہ باد خدا
میں جوگن یار سراج دی گھر گھر دیاں صدا

پوہ

پوہ پہاڑاں جیڈیاں راتاں ٹھنڈیاں ٹھار
مانن سیجاں ٹھنڈیاں کول جہاندے یار
میں رو رو بہہ بہہ کٹیاں تائیاں ہو کے مار
دُکھی جان سراج دی جیویں کباب انگیار

مانہہ

اگوں مانہہ مہینہ آیا رتیں ہوئیاں ہور
نزع برابر ہو گئی جان میری کمزور
سٹ گیوں مرزا جان کے میں جیوندی نوں گور
ماہی دے دیس سراج دی کھچ تقدیرے ڈور

پھگن

پھگن پھر سہاگناں لدیاں پھلاں نال
میرے چال چاء چروکنے ہو گئے خواب خیال
میں پھراں دوہائیاں دیوندی حال اوئے مرزا حال
اندر ہجر سراج دا سڑ دیاں لنگھیا سال

چٹا ہلے وِچ صاحبان دارشتہ ہوناں

وِچ چٹا ہلے چدھراں چودھری بابل خان
دیس اپنے وِچ نیا ساوواں وِچ نشان
کرماں بختاں واٹرا عزت دولت شان
اندر پتے چدھراں کوئی نہ اُس دا ہان
طاہر بیٹا اوسدا صورت مند جوان
ٹکھ کمیں گھل کے دس کے پتہ نشان
سیال برادری جوڑ کے اوس تے گل مکان
کرماں لٹی صاحبان اُس دے نال منگان
جوڑ سیالاں جوڑیا گھر ور اُجلا جان
اگوں غیب سراج پھر جانے رب رحمان

صاحبانِ داحال تے ماں دیاں مکتیں

رشتہ پکا کر کے چوہدویں کیتا وار
سن صاحبان دے دلوں انج پیا دھسکار
تک تک شکن ویاہ دے روندی زار و زار
میلے دیس وراگناں لٹاں جوگناں ہار
مرجھا گئے تھوڑے گرما گئے رخسار
گاؤں گاؤں خوشی دے رل کڑیاں مٹیار
چپ چاپتی وندی نگھی بکل مار
لان دھیان سہیلیاں ہس ہس جھجھ مار
مینوں کچھ نہ کہو سہیلیو میرے نہیں حواس قرار
میریاں نظراں لگیاں ہوئیاں دُور سمندروں پار
مینوں چاٹل راوی دیس دے کعبہ دانہ باد دی بار
جد صاحبان دی ماں ویکھیا اُہدا دن دن حال خوار
اُہ جانے مرض وجوگ دی صاحبان دا روگ ازار
نی توں کہڑی پیڑ پیڑی ایس میں ماں صدقہ بلہار
میں تیرا ور سہیڑیا طاہر راج کمار
توں کس نواڑے پئی ایس کون کھرل بھکھیار
بھکھ ولیا دانہ باد نوں چھڈ کے کل سنسار
ونج ویکھیں طاہر خان دے جنساں بھرے انبار
جھنگا واسہ ڈیک دا بھکھ ننگ مار و مار
توں جس اڑتن کھلی ایس اہ لٹکن سولی سار

جوڑ صلاحیں ہو گئے دونوں گھر تیار
ہائے میں اُجڑی آکھ کے جھڑ پئی منہ دے بھار
اُڈیاں بھکھاں نیندراں اُڈ گیا چین قرار
نخرے ناز شباب دے بھل گئے یک بار
بُجھ گئی لالی رُخ دی پیلا رنگ وسار
پر صاحبان موت وکھاڑی بُجھ گیا دل ہنجار
اُسدے مارو روگ دی کیہ کسے نوں سار
پر اُسدا چت نہ پاس سی پھر کیہی بُت دی سار
میں وتی آن گم چروکنی وچ تصویر یار
خبرے کہڑے ویلے آؤنائیں میرا نیلی دا سوار
میرے بھاگ سٹے تاں جاگسن جدوں نیلے چاڑھیا یار
اودھے نیڑے وار ویاہ دا ایدھے نڈھی پئی بیمار
سد نویکلے دھی نوں کہندی نال پیار
تینوں کہڑے جھورے کھا گئے اُڈ گیا رنگ ہنجار
توں رانی چدھڑاں دیس دی اُہ چدھڑاں دا سردار
بوہے بوہے وندا چائی پیٹ نگار
پھر دے ڈنگ ٹاوندے کھا کھا موٹھ جوار
چبارے پیٹھکاں ماڑیاں چادر چھت پیار
جیوں جن اُچلن موسی جاون سماں گزار
کوئی پتن بھال سراج توں جے چڑھنائیں پار

صاحبانِ داجواب

گھٹ نہ بھیجیں انہریئے کیتیاں جاویں پال
کیوں رکھنی اس لالچ ماڑیاں ونج پھوک انہاں نوں جال
توں کیہ جانے ہتیارئے درد منداں دے حال
دُنیا داراں منگیا دولت تے زر مال
جہڑے جل گئے جلوے یار تے پہلے جھلکے نال
میں ڈھٹی صورت خان دی شک وسواس نکال
توں جس دیاں گاویں پوڑیاں فجری تے ترکال
توں رنگ محل کیوں دسئی اس مینوں دو جہان وکھال
میتھوں مکدی سن لے جن دیئے پلے بنھ سمہال
میں صدقہ مرزے خان دا جاساں کھونیاں گال
چڑھ جاساں خان دی نیل تے بنھ لیس پکا ڈال

گھت ساڑنچے وچ دھی نوں بال مواتے بال
مینوں کعبہ کُلی یار دی اُدا دیں بہشت مثال
عاشق وسدے نیں وچ گلیاں جیوں گودڑیاں لال
عاشقاں درد وہاجیا ہور دیدار جمال
وت اُہنندی نظر وچ ایہہ بنگلے خواب خیال
میرے لوں لوں چھائیاں مستیاں ہن ٹنن کیف محال
کون کمینہ لالچی چدھر چٹھ چنڈال
میں اپنے مرزے خان دا اک نہ دیواں وال
میں کدی نہ چھڈ ساں خان نوں لاون زور سیال
توں سنے سیالاں چدھڑاں رکھیں داج سمہال
حامی دو جہان سراج دا شاہ میرا انور لچپال

☆☆☆

صاحبانِ دی ماں دے اندیشے

ماں صاحبانِ دی سمجھیا اہ نہیں جھلدی زور
مندا چتہ ایسا مندے اسدے طور
پرکیہ کرے گی دیوساں بنھ کے ڈولی ٹور
چپ کرگئی ماں جان کے جگ سنے نہیں شور

کت گن متیں میریاں ہو گئی ہوروں ہور
اہو جیہیاں کڑمیاں ہتھیں کھٹن گور
سمجھ جا سی جد آوسی ہتھ بیگانیاں ڈور
پر فکر سراج نہ بھلیا اندر وڑ گیا چور

☆☆☆

صاحبانِ دایو کول جا کے روناں

بپو دے گھر صاحبانِ جا کے رو پئی
ہائے نی تیتے پھہیے میں جیوندی مرگئی

میرا پڑھ جنازہ تیتے ہُن بیٹھی سوچیں کیہ
یا مارچھری شاہ رگ تے میں کدی نہ کرساں سی
گھل بندہ میرے خان نوں کوئی دس سناہ صھی
دن چڑھدے جُوہ سیال دی جاوئے ٹپ کدھی
گل مکدی باجھ سراج دے میں کدی نہ سکدی جی

گڈھیں پائیاں مایاں چوہدوین وار صھی
گھول پیالہ زہر دا تیرے ہتھوں جا ساں پی
میں کدی نہ چڑھساں جیوندی ڈولی چدھڑاں دی
یا ادھی راتی اُٹھے رل دونویں ماتے دھی
مکیاں کوڑ کہانیاں آیا سچ صھی



بیو دی تسلی تے دوہاں دی صلاح

میں واری لکھ واریاں بچے نہ گھبرا
عاشق نوں ہر قدم تے امتحان بلا
دور کنارا ایسا ڈونگھا بے بہا
استقلال نہ چھوڑیے کردائے فضل خدا
میں بھی اوسے وقت دی بیٹھی ہوش بھلا
پئی موت کھیوے تے کوکدی نقشہ دس گیا
پر رکھ دلیری صاحبان کیتیاں ونج نہھا
داج ملیگا لکھیا جاوئے بھاجی پا
ہو کے سر پر رہیگا ربدی جویں رضا
گھلینے دانہ باد نوں کرموں پنڈت را
جاسی ماریا طمع دا رکھی گل چھپا
اُہ بالکل ڈھل نہ لاوسی سُنیاں جاسی آ
کوئی ویکھ لوے نہیں آوندیاں ذرا آوے پیر بچا
دونویں لاڑے آوڑن دیوے جنہوں خدا
توں چڑھ جاخان دی نیل تے سچی بانہہ پھڑا
جنس ہوئی جد ساہمنے کٹیا جاسی بھاء

چھپی اُٹھ کے صاحبان لئی کلجے لا
اس منزل لکھ مصیبتاں ابے اِسدی ابتدا
توں سر پر صاحبان جھاگناں اہ عشقے دا دریا
بن دے رہن معاملے اہ دنیا ابتلا
سن بیٹھی آن کڑماں چاریاں گئے چدھڑ وار بنا
سیالاں مندا بچیا گڈیا لیسن چا
ہو گئی ہُن جاپدی ہاسیوں گل سبھا
اُسی نال سیالاں کھیڈیئے سر سر بازی لا
ہن تدیراں ساریاں گئیاں مک مکا
توں خط لکھ اپنے حال دا گل مضمون بنا
راتب اُسدے نفس نوں دیوئے لالچ پا
دسے جا کے خان نوں گل بنا سٹرا
چھتے تے چوہدوین چن دی آجاوے شام گھسا
چھتے کھوہ دیاں ٹاہلیاں آوے پک پکا
جد جنج چدھڑاں دی ڈھکسی ہوسی ہم ہما
جو کجھ پچھوں ورتیاں میں سر تے لیاں چا

دوہاں سچی نیت تھیں آکھی خیر دعا پک سراج اس گل تے ہو گیا مک مکا



صاحبان دا کرموں نوں گھر سداں تے عرض کرنی

صاحبان لکھے چٹھی کھل نوں گھت درداں دے عنوان
اوس بیو نال بنا لئی چھتے دی ارٹھ مکان
اوس گھر کرموں نوں سدیا گل لالو دائی جان
جد گھر والے گھر نہ رہے اوس ویلا لیا پچھان
گل پکھ کھلیاں مینڈھیاں ہتھ بدھے اٹک روان
جٹی ماری درد فراق دی رُنی دل دے کڈھ ارمان
کرموں دیکھدیاں گل پا گیا کوئی اتنا ناہ انجان
دس مطلب اپنا کھول کے کر چھیتی وقت سنجھان
صاحبان آہدی کرموں بابیا گل مکدی لا تران
توں یوگی گورو مہاتما دُھر ماتما مکتی بان
کرموں آہدا کڑیئے ہوش کر کیوں لگی اس ظلم و سان
میں نوکر تیری جد دا سیالاں دا کھونڈی دان
صاحبان لاه کے گانی گل دی کرموں نوں کیتی دان
رہساں گولی ساری عمر دی جے آس چڑھی پروان
اس لالچ وڈھی مار لئے کئی سورے مرد جوان
خط لکھدے اپنے حال دا ہور سناہ زبان
صاحبان کارا کیتا شام دا میں رکھساں بنھ سامان
صاحبان وچ رومال دے بدھے سانجھ نشان
شامی کرموں راء نوں صاحبان دتیاں آن

جیوں طالب اپنے پیرنوں پئے رو رو عرض سنان
گل مکدی چنوں چوہدویں آ جاوے مرزا خان
اُہ وڑ گئی اگلی کوٹھڑی چھڈ گئی پیار دالان
فاذا فرغت فالنصب عارفا اُنہوں یاد آہا فرمان
کرموں دی پیریں جھڑ پئی لئی عشق طوفان
جیویں ساون بدلیاں گاہریاں اُہدے نین لہو برسان
ہتھ پھیر سرے تے آکھدا اٹھ میری دھی دھیا ہن
میں جاناں تیرے حال نوں توں اپنی کھول زبان
ونج راوی لے آکھل نوں تیرا بھلساں نہیں احسان
میں گر منتر کچھنی آں پریم داتوں جانیں پریت گیان
کرسیں مینوں بھی جگ وچ شہریاں اپنا بھی جگ و نجان
بہوں لکھی تھوڑی رہ گئی توں لگی لیک لگان
اہ لے لے تیری نذر ہے وِت ہور بھی دیساں آن
کرموں لالچ دھن دا ماریا اُہدی ہو گئی بند زبان
اُس آریا کیتی جاوساں بھاویں ہوون لکھ نقصان
دیہہ ہور بھی جو کجھ دیوناں کوئی چھلا چھاپ نشان
توں کر تیاری اپنی ہور راتوں رات روان
خط چھاپ بھوٹا تنھلی دو مینڈھیاں حال ویران
دیویں جا کے خان نوں میری سانجھ امان

مُر مُر پئی پکاوندی تینوں رنج دیساں دان کتے گل نہ نکلے ویاہ تک اہ رکھیں بڑا دھیان
دیتیاں راء تسلیاں کڑیئے چھڈ سمجھان! ٹٹ جاسی جندرا بُت دا نہ ہوسی بھیت عیان
کیتے دُکھڑے اپنے صاحبان گل بیان لکھے خط سراج سنوار کے جانب مرزے خان



صاحبان دامرزے خان نوں خط

صاحبان آہدی کرموں باہمنّاں توں دیس کھل دے جا ہتھ بندھ مرزے خان نوں میرا کہیں سلام دعا
اُس بھولے بھالے جٹ نوں توں آکھیں کول بہا کیوں گیریا وتنائیں مرزیا! اوتھے بیٹھوں جھگیاں پا
اُہدے رولے دیس چتھاں تے پئی چدھڑاں وچ کہا اُہناں چنوں چوہدویں آونائیں اُہ گئے نی وار بنا
گڈھیں پایاں میریاں مایاں اُہ بیٹھے داج رنگا میرے ٹورن وچ اُتاو لے میرے میر شمیر بھرا
مینوں چن کھالی موت دی میری لکھیں پے گئی بھا میری کھاہدی جان جھورائیاں مینوں نت نور نے تا
مینوں نت اڈیکاں تیریاں کدی پڑ کے نیلی آ توں سر پر اگدوں آونائیں متاں جاوی کم وبا
کر یاد اقرار مسیت دا جہڑے گیوں متے پکا میری پھڑیوئی بانہہ رنگیلوی وچ رنگ محل بہا
جڈھ پوند الست سی آکھیا میں آکھیا قابو ملی میں ماری وعدیاں گن دیاں میری گل وگل سبھا
نہیں جاناں! کم اکیل دائس وناں کنڈ وکھا آج دوہیں دھریں مقابلے وریا ماں سجرے تا
چڑھے کنک سیالاں چدھڑاں دل کانگاں دے دریا تساں واہر وداں لاج سراج دی اج ونجو کرم کما



ایضاً

راء کرموں اگے صاحبان شوہدی ترے لیندی پئی آکھے سرگی اُٹھیں واسطائی وٹھ تھوڑی رہ گئی
اگے تیریاں کوڑیاں لاریاں میں مرزیا ٹھگ لئی ہن پہنچ خماریاں چھوڑ دے گل حدوں ودھ گئی
وچ وہڑے گڈیاں کھیڈ دی جڈھ مرزیا! موہ لئی توں پھڑیاں میریاں بودیاں میں رمزاں سمجھ گئی
میں تیری منگ میثاق دی گل جگیں دھم گئی دے توں کون سدیسیں مرزیا جے میں چدھڑیں ٹر گئی
میں ڈگی کپر ہجر دے اے دسدی کانگ پئی پیا منکھ نہ کھاویں تاروا جے میں لمیں رڑھ گئی

نت سجدے تیری گٹھ نوں میں جاناں کر رہی
 اُٹیاں دلاندا آسرا تیری وے سے جھوک پئی
 ارمان طہیا حاذقا جے جند سکدی نکل گئی
 جھب پہنچ سراج بیمار تے ہن وقت نزاع دا ای

☆☆☆

ایضاً

صاحبان لاه کے تھلی نک دی اگے کرموں کھول دھری
 وے میں مارو چھوڑے گتھیاں تینوں جاندی گل و سری
 لے آونی ماہنواں چدھڑاں میری چوہدویں چن وری
 تیرے کارن مرزیا تاروؤا میری چندل نیں بھری
 تیرے شوقوں نوشہ میریا میں مہندی گھول دھری
 میں پڑھاں کلاناں تیریاں نت شامی اٹھ فجری
 ونج دسیں جیویں قاصدا میری بیتی ذری ذری
 توں کاہنوں قسماں چائیاں جے تے ناہیانیت کھری
 میریاں پنچ کھلیاں ترے رہ گیاں میری جاندی کھیڈ ہری
 آلاگھن غوطے شوق دے میتھوں جائے نہ کانگ جری
 جھب پہنچ شہیدا غازیہ کر ہمت بن سفری
 کدی بوہڑ سراج بیمار تے جاوے روندیاں نہ گزری

☆☆☆

ایضاً

میں لکھ لکھ تھکیاں چٹھیاں درداں دیاں تیرے ناں
 منجی پئی ہوئی تیری صاحبان پئی کوکے کھلیاں بانہہ
 بہوں ڈٹھی نبض سیانیاں کسے مرض پچھاتی نانہہ
 میں بہنی آں وچ بھنڈا دے پرچت ٹکانے نانہہ
 کوئی جھکھڑ گھل گئے ہجر دے گئی ٹٹ صبر دی لاں
 میں شہری وچ قبیلیاں کسے کم دی رہ گئی نانہہ
 واٹھنڈی تیرے دیس دی میرے پاوے ٹھنڈھیاں
 میں نت اڈیکاں تیریاں ہر ویلے اوسیاں پاں
 ہک جھلک نیلی دیا والیا لکھ واری صدقے جاں
 میں تیری منگ چروکئی گل پاہلی دیس گراں
 منڈھ پرت جواب نہ گھلیا نہیں مرزیا ایہہ نیاں
 جھب پہنچ طہیا حاذقا ترسانندی نہ مر جاں
 میں جھلاں تیریاں مارلی توں دسیں بچساں تاں
 کڑیاں نوں چال داج دے میں گادون تیرے گاں
 مینوں بھلیاں ہانڈیاں تاواناں میری سرت نہ رہ گئی بھاں
 میں مجرم تیرے عشق دی میرا پاپن دھریا ناں
 میں جنت سمجھاں دانہ بادنوں تے کھیوہ دوزخ تھاں
 میں صدقے دوجی نیں دیا آکھری دیس چنہاں
 گھٹا تیرے راہ دا میں سرمہ اکھیں پاں
 آئے چل دانہ بادنوں توں مرد سدیسیں تاں

میرے من وچ رجیوں بیلیمیرے لُوں لُوں تیری تھال رُخ انور رہندائے سائمنے میں جہڑے رُخ سواں
میں سمجھ بہادر نیں دا لڑ تیرا پھڑیا تاں ہتھ تیرے لاج سراج دی کدی پلہ چھڈ سی ناہنہ

☆☆☆

ایضاً

بیلے وچ بُورے نی باجرے سونی نوں لگاری رنگ منھیاں تے ہو ہولا لئے کھوہاں دے جاگے انگ
مُجی مخبرا لاں چھڈیاں گئے پاٹ مکئی دے انگ پیاں مہک تھلاں دیاں کھیتیاں ہر ہر دے جو بن ڈنگ
ڈس کڈھے بوہڑاں پپلاں پتراں دے لتھے زنگ رُت پرتی ٹھنڈاں پے گئیاں اک صاحبان تڑی تنگ
میرے گل وچ کھلیاں مینڈھیاں جوگن دے میلے انگ تیرے راہ تے کھلی اڈیکدی گوکے وانگ کلنگ
میتھوں سچلی پُچھناں مرزیا جے تے اتنا سی دل تنگ کیوں ناگ عشق دا چھیڑیا ہُن جھل اگیرے ڈنگ
جُھیں نوں مہناں ڈبناں دریام نہ چھوڑن منگ توں مکہ ساری نیں دا توں کھراں دا تنگ!
نت نہ نہیں یارونگارے دے نت نہ نہیں جُردے سنگ چھڈ دیہہ دلایاں کچیاں اُٹھ لے نیلی دا تنگ
لے جاوے تیری منگ نوں چدھڑ کون کمینہ تنگ توں لاڑا ساندل باردا تیتھوں صدقے وہت چہنگ
اہ کر جا پاپلی چوہدویں دنیا تے چارے ڈنگ اہ پرت پچھاں نہیں دیکھدے جہاں رلناں ہووے سنگ
گل پاپلی سارے دیس تے صاحبان مرزے دی منگ توں بالکا حضرت پیر دا اُٹھ فضل الہی منگ
مرداں دا مذہب مرزیا عشقے دا رکھناں لنگ جد دے شمع جمال دی کد مرنوں ڈرن پتنگ
جہاں چھیڑیا دپک راگ نوں جل قفنس مرے نہنگ اے تیک سراج اونہانڈرے قبریں وچ جلن کرنگ

☆☆☆

ایضاً

نِسریاں نی سیراں ڈیک تے مرزیا لیاں دارنگیا بور باٹے تھیں جھریاں نی جھاڑیاں تے جنڈیاں نوں سنگور
ہو یا گاہرا نیر چہاں دا کوئی مینہ پئے وسدے دور پتتاں تے بھیڑاں پے گئیاں پے بھر بھر لنگھدے پور
کدھیاں دے میلے چھڑ پے سنگاں وچ جوش سرور پے ملن چروکے وچھڑے زرخماں نے بھرے انگور
ملنے دیاں تانگاں جاگیاں کوئی سجن جہا ہدے دور کونجاں پیاں بولن بولیاں کوئی سمجھے اہل شعور

کڈھے ڈس چنہاں دیاں بوٹیاں گل سجرے سجر اُبور
کھیوہ منڈی مرزا حسن دی ہوئی جگاں وچ مشہور
ڈاہ بہن بھنڈار سیالناں رل گاؤں ڈھولا دور
رنگ رتیاں گل سیالناں وچ جو بن دے مخمور
مینوں بھوچدھڑاں دے جنج دی اُہناں نیتاں وچ فتور
اج چھیویں چنوں ہو گئی کوئی چوہدویں ناہیں دور
مینوں سدھراں راوی نیں دیاں جویں موسیٰ نوں کوہ طور
جے میں جارہی گھر چدھڑاں میتھے دھر سیں پیا قصور
لے جاسن تیری منگ نوں بہسن داریاں وچ کھنگھور
لچال پلیندے بول الست دا لچونتاں دا دستور
میرا ایہو سنہوڑا آخری پئی ترلے لاں مجبور



کرموں مشردادانہ بادجاوناں

اُٹھیا کرموں راء مہاجلے اُس کیتیا رب نوں یاد
اُہنوں وڈھی دتی صاحبان اُہدا لوں لوں ہو یا شاد
اُس پیڑیا چلم نڈیل نوں لک بدھا سفری زاد
اُہنوں خطرے آہے پھیٹ دے متاں جگیں پوے فساد
میں نمک کھاہدا ست پیڑھیا میرے تالوا بے سواد
اُہ پنچھی بن کے اُڈیا یا جویں انھیری باد
اوس راہ کوراہ نہ ویکھیاں اُہ ٹریا نگ دی سادھ
دن دو جے کرموں پہنچیا ڈھلدے نوں دانہ باد



کرموں تے مرزے دیاں گلاں

کرموں واقف سی دانہ بادا سبھ جانے تھان مکان
جا پوہتا ڈیرے خان دے کرموں مرد سجان
اگے مرزا بیٹھاں چھن دے ستا سی چادر تان
کلیاں تے برچھا رانگلہ اک تیغہ وچ میان
جٹ ستا نیند شباب دی بے فکر نو جوان
کرموں ویکھ جوانی رانگی جھٹ کھلھا رہیا حیران
چھڑ دیہی کھل جوان دی جیوں سروسوہے بستان
اُس بھر کے مٹھ جگا لیا ذرا اٹھ بہو مرزا خان
کرموں پنڈت کمیں نازکا اُس اٹھدیاں لیا پچھان
بہہ پچھدا کرموں باہمنان آ خیریں کھول زبان
کیہ ڈھواج میر شمیر دے دونویں پتے دے سلطان
کرموں میں تیار چروکنا ڈاڈی اودری ہوئی جان
کرموں مینوں بھل نہ جاوی اک عمر دا ارمان
کرموں معلم سارے پنڈنوں صاحبان ساڈی منگ نشان
وَت کوڑیاں بدران لائیاں سچ کوڑ لیا نہ چھان
بہوں ترلے مٹھاں کیتیاں لے میلہ پیر پٹھان
جے اوہ اپنے گھروچ راٹھ نیں اسی اپنے گھر پردھان
دس چھڑیں میر شمیر نوں وچ مرداں دے میدان
میں ڈٹھے ہوئے چروکنے اہ جیڈے خانی خان
توں ہن کھول سنا کھاں اپنی آیوں جہری گل سنان
کرموں لکوں کھول رومال نوں اگے دھردا کھول نشان

مٹھوں باہروں رکدا آیا لہندے دی گٹھ پچھان
پیا وگے دُرہٹہ کھل دا اوس بیٹھ کیتا اشان
اک پاوے پگڑا ٹنگیا دوجے تیر کمان
پئی نیلی سُوہندی تھان تے جیوں اکھاڑے پہلوان
پیاں چوہ چوہ کردیاں مینڈھیاں جیوں ندیاں تے ریحان
واہ مولا سر جن ہاریا تیری قدرت تھیں قربان
اوس چر پچھوں اَج ویکھیا رنگیلا دوہتر وان
جٹ اٹھیا لے انگڑائیاں جیوں جھلیں شیر جوان
اُنہوں ویکھدیاں بھس پے گیا اہ نہیں آیا خیر سنان
کیہ رولا نانکے دیس دا نہیں ہویا چروکا جان
اَج کیہڑی رنگیں وسدا میرا ماما کھیوے خان
ملاں وچ کے مامیاں ماسیاں ویکھاں نازکا دیس جہان
اُہ لویاں گولیاں بودیاں میرا چھتیاں والا ہان
کھیوے بہہ کے وچ برادری کیتی سی آپ زبان
اَج گوٹھاں گھر بیگانیاں جہڑے وسن ساڈے آن
مامے نہیں سوچیا گل نوں ایں سودے وچ نقصان
بس نہ اُوہ ساڈے نانکے تے نہ اسی دوہتر وان
میں منگ نہیں چھڈنی آپنی ایہہ لیس ویکھ جہان
مینوں اوہراں ایہو باہمنان نہیں دیندے بھائی جان
دس چھیتی مینوں واسطہ ای کر مطلب دلی عیان
خط چھاپ بھوٹا نتھلی دو مینڈھیاں حال ویران

اِہ دتا مینوں صاحبان میں آیا تده اپڑان
 لگ الفوں یے تک بیتیاں اُس کتی کتھا بیان
 گھت ڈولی تیری منگ نوں لے جاسی طاہر خان
 اُہدے گھر ٹیاریاں گاندیاں اوس چندری بھامکان
 پھر ہور کیہ عاشق لوڑناں قربان ہوون قربان
 پئی جاگ طبیعت آتشی دتی عشقے تا دکان
 اوس تیغہ پھڑ کے تولیا جویں سورے وچ میدان
 آکھے پڑوچ کوئی کوئی نتر دمرزیا چلھیں تے سارے خان
 اِہ پرسوں چنوں چوہدویں تیرے جاسن دس پران
 عاشق عزتاں شان حکومتاں اِہ پہلے داء لُٹان
 سر دے پیر سراج بنا کے عشق چڑھے پروان

تک جٹا اکھیں کھول کے اپنا مال سنجھان
 اس کھول سنائیاں ساریاں جویں صاحبان دا فرمان
 گل مکدی چنوں چوہدویں اُہناں آجاناں پرنان
 جُٹی بُوری ہوئی وَتدی اُہنوں بھل گیا بیون کھان
 سُن میتھوں جٹا بُوریا جے اِنج معشوق بلان
 کرموں دا اک اک بول سی مرزے دے قلب ودان
 اُہدا ہتھ برچھے تے جاپیا وَت ویکھے تیر کمان
 کرموں ویکھے کے بھانجھڑ بھڑ کدے لگا تیل اگی تے پان
 گھٹ ڈٹھے مرزیا وسدے جہڑے گجن شور مچان
 اوکھی شطرنج پریت دی بازی تے رکھنی جان
 اِہ سہرا سر بہادران کد گیدی عشق کمان



مرزے خان دیاں کرموں نال گلاں تے کرموں دا واپس ہونا

نیناں نے جھڑیاں لائیاں جویں ساون وچ دریا
 اُہنوں ساہنے دس پئی صاحبان کردی حال کہا
 پئی کوکے باہوڑی مرزیا تھڑی نوں آن چھڈا
 اُٹھیا سور کے حضرت پیر نوں آ غوث الاعظم آ
 اُس آکھیا دوہاں سد کے مینوں دتا ایہہ سناہ
 کوئی ویکھ لوے نہیں آوندیاں ذرا آویں پیر بچا
 پچھڑھی نوں ہتھ بنھ کے صاحبان کہے سلام دعا
 کھواری واسطے رب دے مینوں مرزا خان ملا
 میری ہوش ٹکانے نہ رہی اُٹھ پئے جھل سودا
 مینوں نوہہ سدے دی لاج تے چا دانہ بادوکھا

مرزے صاحبان دا خط پھولیا پڑھے بیٹھ نولکلا جا
 اُہ وچ تصور یار دے کجھ عرصہ گم گیا
 کیہ ویکھے طاہر صاحبان نوں پاہوں پکڑ لیا
 جٹ ویکھ وسارے حوصلے اُس مجھیں دتا تاء
 اُہ سد کرموں نوں پچھدا مینوں پیو دی گل سمجھا
 چھتے تے چوہدویں چن دی آ جاویں شام گھسا
 اک ہور سنہڑا مرزیا میں آیاں او تھوں چا
 میں تیری ٹونہہ چروکنی دیساں وچ کہا
 میں سٹی جھم ولوہنیاں لئی مہنیاں نے گھبرا
 میں مرزے دی گولڑی توں مرزے دی ما

اس آکھیا کرساں یار تھیں میں چند سو وار فدا
میں چنوں چوہدویں پونچساں بے تک نک وچ رہ گئے ساہ
مینوں کوڑاں اے چروکیاں جدوں چدھڑ گئے مَنگا
مینوں اُہراں ایہو باہمنان مینوں جاں نہیں دیندی ما
رج دان انعام عطا وندا نقدی تے سروپا
میں چوہدویں ویلے شام دے کھیوے جاساں آ
شالا جگ تے شاہی کھرل دی دم دم جوت سوا
بھکھا دید جمال دا جھب پہونچساں پر لگا
گئے پردے جل انانیت ہو بیہوش گیا
خوش قسمت جاناں دے کے لیندے بازی چا
ملے ابدی دان سراج نوں صدقہ غوث ورا

گل کھڑی کرموں خان دی انج دتی ہوش بھلا
چپ کیتا ٹر ونج باہمنان نہ اگوں گل کھنڈا
میں طاہر دے ہتھ ویکھساں کوں صاحبان لے پرنا
نہیں خوف سیالاں چدھڑاں میں چھڈے بھو بھلا
پھر مرزے پک پکا کے چا ٹوریا کرموں راء
دیتاں خان نشانیاں صاحبان نوں دیویں جا
کرموں ودعیا ہو گیا خان تھیں دے اسیں دعا
اُنہوں عشق بھلایاں نیندراں لیا مار چپڑ جگا!
کر وضو صدق صفا تھیں سجدے جا پیا
آئے جھوٹے نشے پریم دے غیوں ملی ندا
اُنہوں ملی بشارت وصل دی ہوئی منظور دعا



مرزے دی تیاری

میں چلیاں سیر شکار نوں اودے رہساں رات دہنوار
اُہدے گھر اکھاڑا اپنا اہ چلیا آپ شکار
اُہناں نیلی نوں سنگاریا کر مالشان خرخرے مار
ونج ملدا سر بے ویر نوں مرزا برخوردار
اُہ بُتی اے رات دہنوار دی کڈھ آواں جھٹھی مار
اُہدے کول ثنائی میر سی بیٹھا خدمت گار
مینوں ایویں مرزیا جا پدا ہوویں نانکے دیس تیار
کتے نیت دوراڈے سفر دی ہنہ چلیا نیں بھار
جے تے چھڈی جانا نیں ویر نوں ہتھیں ونجھیں مار

مرزا نفران نوں آکھدا میری نیلی کرو تیار
سن نفران مرزے خان دی گل کیتی سوچ وچار
پر کھڑا غدر ملازماں جویں حکم دیون سردار
جد نیلی کاترے ہو گئی مرزے پہن لئے ہتھیار
میں چلیاں اج پردیس نوں کوئی پئی ضروری کار
ونج دارے سر جا لیٹیا بے فکر مستوار
گل سن کے پاسہ پرتیا آکھے نال پیار
ایہہ خُرجی راتب سفر دا ایہہ ترکش تیر ہتھیار
مینوں دی جاویں مرزیا سچو سچ نثار

تیرا مرزا کھیوے جاوناں کسے صورت نہیں درکار
میں اڈاں تیریاں پراں تے کراں تیرے سردار
جاء اللہ راکھا مرزا چلیاں جہڑی کار
سر جے متھا ویر دا چُمیاں نال پیار
سدھراں لاہی دوہواں نے رج رج آخر وار
جے تے سر پرناں کے چلیاں سنگ لے لے دوتن یار
میں تیریاں شانناں مرزا دتاں مستاں ہار
پر رکھیں یاد انھیریاں بن تیرے گھر بار
گل لا مرزے خان نوں رُنا جا تکاں ہار
یا نصیب سراج پھر قسمت دے دیدار



مرزے دا گھوڑی تے چڑھنا تے خان دی چڑھتل

مرزا سُر کے رب رسول نوں نکلیا نیلی پیڑ
اوس کر کے منہ بغداد ول سَوریا حضرت پیر
چت لال بہاول شیر ول اتے متھے قطب کبیر
چڑھتل مرزے خان دی میتھوں نہیں ہوندی تحریر
سجے پاسے برچھا عرب دا کجے ترکش تیر
لک دوپٹ لنگی ریشمی کنی بانات حریر
سر چیرا سرخ بناری کلنی طرہ ماہ منیر
تک جو بن مرزے جٹ دا پئی ہسدی سی تقدیر
پئی نچدی ڈائن موت دی تک مرزے دی تصویر
پروانہ شمع جمال دا جلوے تے سڑے اخیر
پڑھ ختم معلّٰی قادری سَوریا حضرت پیر
تک دارے چھنیں پٹھکاں اُہدی اکھیں بھریا نیر
اوس نفر بلائے اپنے جیوں شاہاں کول امیر
پئے نفر دعائیں دیوندے جگ مانے راج گھمبیر
پیا سو نپنی کردا نوکراں سن ڈیرے دار فقیر
چھتی ڈٹھا رنگ محل تھیں گھوڑی چڑھدا مرزا ویر

پڑھ نادِ علی مرتضیٰ ونگارے پنچے پیر
لوکاں نوں باہیں آسرا مینوں میراں تیری دھیر
باہوڑیں حجرے والیا اج مشکل گھت دھیر
اُہدی شوکت وانگ نواب دے کوئی بہوں بانکی تصویر
بخہ پیٹی کمر سجا لئی اصفہانی شمشیر
گل گرتہ ململ ڈھاکیوں اُتے چونہ بے نظیر
پیریں طلّسی جوڑا اکبری ایرانی خوش تصویر
پئے چال چڑھے عشق نوں ایہہ خان میری جاگیر
میں بیرے کھاساں کھل دے بھر پساں لہو نیر
اُسوں چال چوہدویں رات دے جھب پونچاں پینڈے چیر
چا دتی لت رکاب نوں پڑھ موہوں یا نصیر
اج قسمت واگاں چائیاں خبرے لکھیا کیہ تقدیر
پیا بک بک مہراں ونڈدا خبرے ایہو وار اخیر
اسی رج رج دیوئے نوکری ساڈا جیوے کھل امیر
اہ دارا داری واسطے بخہ داری دارے ویر
اُہ ویکھدیاں گل پا گئی انہوں کیتا عشق اسیر

اُھ سد ماؤنوں آکھدی کھوہ مینڈھیاں چولی چیر
تیرا مرزا چلیا نانکے صاحبان دے عشق اسیر
اگے بھگھے اسدی جان دے دونوں دشمن میر شمیر
دونوں ماواں دھیاں دوڑیاں ہائے اُلٹ گئی تقدیر

اُٹھ ویکھ نصیبیاں ماریئے کوئی کر لے اُج تدبیر
اس چدھڑاں نال کھیڑناں نہیں ڈرناں اس رن پیر
کیہ کرسی بھانیاں تھیں وکھرا اگے ہاٹھاں کٹک کلیر
پھڑ واگ سراج بھرا دی رو کہن لگی ہمیشیر

☆☆☆

چھتی بھین دی فریاد

میں واری واریاں مرزیا نہ اتنا ظلم وسا
وَت نت پیا جاویں نانکے میں واری اُج نہ جا
کیہ جیوناں بھیناں تتیاں جیوندے چھڈ جان بھرا
اُج کھیوے مرزیا مورچے چدھڑاں نوں چال چا
مرزیا بھٹھ زنائی دوستی گوڑ اہناں دا چا
حیف اہناں دی دوستی اہ ٹبر بے وفا
توں مرد خدا دا مرزیا مرداں دے رکھ سبھا
تک سندر صورتاں مورتاں رکھ دل مضبوط صفا

من ہاڑا مائیں پئی ہوئی بھین دا اہ چوہدویں وار گھسا
جگ جیویں ویرا میریا مینوں ہتھیں ڈولی پا
نچ جمہدی صاحبان تڑی نچ نانکے پڑھدوں جا
اساں سنیاں ہویاں ساریاں سانوں اکھیں نہ دکھا
جد بنن معاملے داریاں اہ جانڈیاں اکھ پرتا
اُہناں تیریں ودھے سورمے کوڑے کارے لا
نہیں مرد اہناں ول ویکھدے باطن دی اکھ اٹھا
من مت سراج دی مرزیا میں گھولی بھل نہ جا

☆☆☆

مرزے دا جواب

مرزا آہدا بھینے چھتینے پئی ایں کس خیال
میرے ایس اچانک سفر دا کوئی کرو نہ وہم خیال
اساں دلوں بھلائے نانکے نہیں آیا کدی خیال
اہ قصے چھیڑ مجاز دے مینوں بھانڈاں وچ نہ بال
میں چلیا جہڑے کم نوں مینوں جاون دیہہ فی الحال
گل کر کے دیس مجاز دی میری نہ کر طبع نڈھال

میں چلیا سیر شکار نوں آ جا ساں شماں نال
میرا کیہ کم کھیوے جاونوں ساڈے لگدے کیہ سیال
چھڈ دتیاں بھانڈیاں ورتناں اُج ہو گئے کئی سال
میرے چھل نہیں پھٹ چھتینے میں رکھے مسماں سمہال
کر دعا مُصلے بیٹھ کے رب آئے فحشا نال
وَت گجھے پھٹ سراج دے ٹٹ جاسن صدے نال

☆☆☆

کلام چھتی

اللہ بھائی مرزا خیریں آویں جت میدان
میں نت دعائیں منگساں پڑھ منزل پاک قرآن
چھڈ صاحبان دی دوستی تیرے اپنے بخت جوان
آکھے لگ جا بھین دے نہ بن ایڈا نادان
شالا جی کے مان جوانیاں اہ رت رہوی پروان
توں جتی بہادر رن دا تیری مدد شاہ مردان
پر تیرا نانکے جاوناں مرزا ہر صورت نقصان
صاحبان نالوں چنگیاں تیری صورت تھیں قربان
صاحبان کچھے واریاں کیوں گواویں جان
ٹبر دا شان سراج توں بھائیاں دا مان تران

☆☆☆

کلام مرزا

مرزا کہندا چھتے میتھوں سُن عشقے دے طور
گلاں پھلاندی دوستی کد ہٹکے رہندے بھور
چھتے گھرے دماے عشق دے جگلیں پے گیا شور
مینوں چٹھی لکھی صاحبان او تھے سیالاں جدھڑاں جوڑ
جلن معراج پتنگ نوں بھانویں شمع نہ رکھے غور
عاشق نے دریام نوں سدا اڈیکے گور
اہ مارو وہن پریم دا خطرے خوف کروڑ
اہ عشق امانت یار دی میں سانجھ لے جاساں گور
اہ جند نذرانہ یار دا اہدا نہیں کوئی فائدہ ہور
عاشقاں درد رنجائیاں دی ہتھ معشوقاں ڈور
سن لیسیں دانہ باد تھیں کھیوے تک گھنگھور
میں سر پر کھیوے جاوساں مینوں راضی ہو کے ٹور
بھائی نہیں پرواہ چن یار نوں پر بھج بھج مرن چکور
میں سٹیا جہاز مجاز دا بغداد والے نوں سور
کئی وچ اڑن اڑائیاں کوئی وِلا چڑھدا توڑ
چڑھے منزل توڑ سراج دی رب حافظ اللہ سور

☆☆☆

مرزے دی آخری گل تے بھین تے ماں دا ودعیا کرنا

ماواں دھیاں خان دا رستہ کھلیاں روک
ماں کہندی بچیا واریاں میری جیوندیاں جھوک
سوچ گزارہ آپنا توں گھرے دا تھوک
پر عاشق نوں سمجھاوناں جیوں پتھراں نوں جوک
میں تیرے کچھے مرزا چھڈ دتا پیکا لوک
میرے دیکھ ضعیفی حال نوں اگے سر جا اللہ لوک

پرسوں آؤناں بھٹیاں لے بھین تیری دی ڈھوک
 باجھ ملاحاں بیڑیاں سراج باجھ نہ وسدی جھوک
 وچ توں نہ ہوسیں مرزا دس کیہ اکھسیا لوک
 تیرے باجھ سراج غریب دی جند نیزے دی نوک

☆☆☆

ایضاً

جاتا مرزے خان نے مینوں جان نہ دیسی ما
 آکھن لگا رو کے گل سن میری ما
 مینوں چٹھی لکھی صاحبان آندی کرموں راء
 لمیاں چھوڑ کہانیاں مکدی دیاں مکا
 آج سیالاں چدھڑاں ہمشراں گاٹیاں گئے رلا
 میں بھن چدھڑاں دیاں آکڑاں دیساں شان ونجا
 میں وچ شریکاں دسناں مینوں مہنے دین بھرا
 مائے سر پر اوسے ہونناں جو منظور خدا
 مائے تقدیراں ڈاڈیاں آکھیا کجھ نہ جا
 اہ جھٹ حیاتی مانگوں اتھے رہناں نہیں سدا
 آج چھتے تیرے ویر دی دیساں وچ کہا
 دیہہ تسلیاں جی نوں تے ماؤ نوں سمجھا
 سن کے مرزے خان تھیں بولی صبی صفا
 منہ متھا سر چمدی ماں کلجے لا!
 کوئی وس نہیں تیرے مرزا جیوں تقدیر خدا
 جاہ حوالے ربدے میری دم دم نال دعا
 میں واری جتی بہادرا بہویں ست نہ کتے ونجا
 وت مرزے چھیتی بھین نوں پیار دتا گل لا
 گل پٹکا کھلیاں مینڈھیاں چھتی روپی ہتھ اٹھا

اُس پٹکا سروں اُتاریا گل وچ لیندا پا
 مٹیاں کوڑ کہانیاں سچ گیلانی آ
 چودھویں ڈھو برات دا چدھڑاں چال چا
 میں سر پر کھیوے جاوناںیں ہو راضی دے دعا
 میں بھی گاٹی چلساں رب ستراسی دا
 ونج راتو راتی آنساں صاحبان نوں نیل چڑھا
 بنجھ گوٹھاں ہے پنچائیتاں چودھری منگ کھہا
 کدی قضا نہ ہو سی ربدی جویں رضا
 میری اکھنیں ہجدی دیس تے اک چدھڑاں کون بلا
 مائے بے عزتی دا جیوناں کھڑی کم بھلا!
 شالا رہے سلامت گورتک اہ عزت شوکت بھا
 رہے بول سلامت ویر دا کردی رہو دعا
 بہہ گلیاں مٹھیں میٹ کے چھتی تے اُس دی ما
 میں راضی بچیا میریا تینوں بخشیا شیر پوا
 اہ بخرے روز میثاق دے لیا لکھیا جھولی پا
 شالا مونہہ دکھاویں آکے جیویں چلیاں کنڈوکھا
 شالا فتیا ملی جناب تھیں آویں پڑ صدق دا چا
 لاہ سدھراں ملے اخیر دے دونویں بھین بھرا
 مینوں ڈولی ہتھ نہ پھیریا اہ عمراں ساری گھا

مینوں مانیں پا کے مرزا چلیاں کنڈ ولا
شالا جگ جگ آویں دیں تے گل ہارنخ دے پا
میں میراں حضرت پیر دی دیاں سیس نیاز چڑھا
چڑھے منزل توڑ سراج دی تے رکھے شرم خدا

☆☆☆

کھل جوناں دی مرزے نال گل تے مرزے دا جواب

وکیہ کھلوتا خان نوں داریوں نکلے ویر
کوئی کم لمیرا جا پدا کوئی وڈی پے گئی بھیڑ
توں مہری ساڈے کٹک دا وریاں وچ رنبیر
مرزا کہندا ہس کے سن بھائیاں دی تقریر
شالا جیو برچھیاں والیو نال عزت تے توقیر
کوئی خطرہ کرو نہ بیلو پئے سورو رب قدیر
کتنے چلیاں مرزا پچھدے کھل امیر
ایہہ خرجی راتب سفر دا ایہہ برچھا ترکش تیر
مت پوی ضرورت لئی چل سنگ برچھیاں والے ویر
مینوں مان تساڈے زوردا میرے جیون کھل امیر
میرا پھیرا اپنی بار دا میں جاناں نہیں اُدیر
شالا دیں پردیس سراج دا ہووے سنگی حضرت پیر

☆☆☆

مرزے دا دانہ باد تھیں نکلنا

ودعیا کر کے دوستاں مرزے چک لئی واگ
نیل سمجھ اشارتاں جھاڑ کنوتیاں کاگ
جیوں نکلے تیر کمان تھیں یا جیوں جاوے شیشل ناگ
لنگھے عرصیوں وانگ نگاہ دے جیوں لہراں نکلن راگ
گھروں نکلیاں مرزے خان نوں کئی شگن ملے بدلاگ
اساں سر پرسیا لیں جاونائیں جاگ آج نیلئے جاگ
اُہ چل پئی چال روال دی پئے سُم برساوَن آگ
جاندی سفر لپیٹ دی صر صر باد تیاگ!
کئی نالے ندیاں وہنیاں سُم سکے جاندی جھاگ
پر نہیں شگن سراج وچاردے جنہاں عشقوں لگ گئی لاگ

☆☆☆

مرزے دا کھیوے وچن پونچناں تے جنج دا حال

کٹ پینڈے بار اُجاڑ دے کھیوے پوہتا مرزا خان
آئے نظر مینار مسیت دے جتھے ہو یا عہد پیمان
جُوہ ماہی دی وکیہ کے اُہدے جتھے پھر گئی جان
اُنہوں چتھے کھوہ دیاں ٹاہلیاں پیاں مارن سد بلان

بیلا کدھی رونقاں سبزیاں کھوہ روان
مرزا سُر کے رب رسولؐ نوں تھینہ وچ وڑیا آن
پئے مشکی تُرے ہنکدے سُمّاں دی دھرسان
اج کوئی سیر نہ رہ گیا کدی نگری آہی آن
اج پناں بلایاں آ گیا مرزا دوتر وان
اُہدی اکھ نہ بھجیدی کسے تے واہ راوی دا بلوان
لنگیاں شملیاں والڑے جانجی نوجوان
اُوہ وٹ لبّاں نوں دیوندا اکھیں لہولہان
ماسی ویہدیاں ٹھرگئی میں صدقے تے قربان
تازہ ہو بیٹھیا مونہہ ہتھ دھو تے خان
اُس آکھیا مرزیا خیر ہے ہر شے امن امان
کیہ مجال کسے دی مرزیا کوئی بدخواہ کرے گمان
کوئی وہم نہ کرتوں مرزیا ذرہ نہیں نقصان
پر باد ہجر دیاں لانبوواں تھیں لگ پیا کرمان
تک اکھیں لیسیں مرزیا لویں اپنا مال پچھان
کانگ چڑھی کوئی خوشی دی اُتری سفر تکان
وچ چیتے ذرے ریت دے رکھنا تیری شان
دیویں منگے پناں سراج نوں روجی سری دان

اُنہوں چھیڑو مل پئے بار دے پئے نانکا مال چگان
جد مال گھراں نوں دُھکدے ہووے ڈیگر وقت اذان
پئی جنج چدھڑاں دی دُھکدی ڈف ڈھول پئے گھرنان
پیا نکدا ڈھو برات دے واہ اللہ تیری شان
اُنہوں کوئی خبر نہ ہووناں اج کیہڑے گھر مہمان
ڈٹھے مرزے جنج دے گھبراٹے نال دھیان
پئے لشکن برچھے رانگے چڑھے ہوئے سجرے سان
تک اُنہاں دیاں آکڑاں اُہدی پئی وٹیندی جان
اس بدھا ہویا مُنڈا سڑا گھر بیو وڑیا آن
نیلی بدھی تھان تے لگی راتب کھان
جاندیاں پچھدا ماسیے میری دس امان
وچ ورج مقفل سانھیا تیرا دُر یتیم رمان
وچ عشق حفاظت اپنی رکھیا نال دھیان
تیرا مرزیا پھل گلاب دا روشن وچ جہان
میں نال کیلجے رکھیا اہ تیرا نور نشان
سن گلاں وانگ انار دے کھڑ گیا مرزا خان
آکھے سچیا مالکا تیرے لکھ احسان
تیرے بھرے خزانے داتیا توں فضلاں دی کان



مرزے دانج وچ جا کے چدھڑاں نال بھانج دی شرط رکھنی

جیوں سوڑاں پون شہباز نوں تک چڑیاں دا ڈار
چُجے گردن جا وال پکڑ کے ہتھ پھیرے نال پیار

مرزے نوں بے انیاں جنج ویکھاں بکوار
نیلی کھا نہاری ہٹ کھڑی ہو یا مرزا اُٹھ تیار

تنگ نیلی دا کھچیا ہتھ پٹھیاں تے مار
چہرہ مرزے خان دا بھکھیا وانگ انار
کویں بہن نچلے سورے سُن ڈھولاندے کھڑکار
نالے نیلی پانی پیو سی لوے تھکیر اُتار
ہتھ بَنھ ماسی آکھدی مرزیا میں بلہار
چدھڑاں سیالاں ڈھانڈیاں قدم قدم انگیار
توں بھی بڑا بے حوصلہ اُہ بھی وچ بیکار
مرزا کہندا ماسیئے فکر نہ کر زہار
شیر نہ ڈردے ماسیئے بھادیں بھیداں ہون ہزار
پیو ہوڑ رہی نہ منیاں اُٹھ ہويا خان تیار
سور کے رب رسول نوں ہويا آسن تے اسوار
نیلی بہہ بہہ اُٹھدی چنگیاں وچ بازار
جا وڈیا وچ جنج دے نیلی دا اسوار
شاہزادہ کہڑے دیس دا کردا پھرے شکار
اُٹھ راٹھاں چڑھتلاں جھلیاں تک کے رعب وقار
میں پیٹا وُجھل خان دا اُوہ کھرلاں دا سردار
سیال اساڈے نانکے مڈھوں رشتہ دار
چدھڑسن کے گل نوں کر گئے وٹ ہنجار
تیری نیلی سنیاں مرزیا بڑی چالاک ہشیار
دلی تھیں ملتان تک دُھماں کل دیار
اتنی اہ وسنیک نہیں جتنے اشتہار
سدھر سانوں ایسدی ذرا بھاج وکھا کھاں یار
مرزا کہندا چدھڑو بالہیاں ہون بیکار

سر بدھا چیرا خان نے کلنی طرے دار
رِشماں چھڈیاں جو بنے چوہدویں دے چن ہار
آکھن لگا ماسیئے میں پھر ٹُر آواں باہر
ایہہ پُنا پانی پیوندی واہندی وچ نثار
اج باہر نہ نکلیں واسطائی اتھھے چھپ کے وقت گزار
تک ساہمنے جر نہ سکسن ہو جا سی تکرار!
متاں گلو گل ودھان تھیں چل جاوے تلوار
دیکھ آواں جھٹ رونقاں پھر ساں بکل مار
مینوں دھیرگیلانی پیردی کسے پڑ نہ آوے ہار
نیلی چوکڑیاں وٹ ویہڑیوں آئی باہر وار
کلنی چیرا سجدا ہتھ نیزہ پھمن دار
دم وٹ وٹ مارے پھر کڑے آئی مشک شکار
تک جانچی چڑتل اوپری لگے کرن وچار
حسن دلیری دبدبہ رُت شباب خمار
پچھن کہڑے دیس تھیں پھر دے ہو کس کار
مینوں مرزا لوکی آکھدے جانے ساری بار
میں اُج ہی ڈیگری آیا میرا ماسی نال پیار
پھر ماری کھچ گھبراٹیاں کھا کے اندروں خار
اہدے رولے وہت چنہاں تک لنگھے راویوں پار
مان تینوں بھی مرزیا اس دے حدوں پار
اُٹھ نہیں سکدی جا پدا بے لت اک چھڈیئے مار
دو تن کھڑیاں دیکھئے وچ میدان ونگار
نیلی برد بھجوانی جے کریو اقرار

جو ودھیا لے جاوسی گھوڑا تے دستار
گل و گلی ہو گیا وادھا تے تکرار
چُن لئے چدھڑاں جج دے پنج ست شوخ اسوار
آ گئے وچ میدان دے لوکی بنھ قطار
زیناں پئے پھباوندے کسن تنگ اسوار
وت گوڈے چُجے آ کے جس نوں آوے ہار
اک اکلا خان سی اودھر کئی ہزار
سُرنے نقرے ابلقی گھوڑے اپن اپار
پئے تلاون گھوڑیاں ڈھولاں دے کھڑکار
دیکھ سراج مقابلہ ہو گیا گرم بازار

☆☆☆

مرزے دا جناب دستگیر نوں سورناں

مرزا لتھا گھوڑیوں سورے حضرت پیر
مان اُہناں نوں سنگ دامیرے کول نہیں اج ویر
مرزا کر کے مونہہ بغداد ول پیا وساوے نیر
مینوں اج وچ ایس میدان دے دیوے فحیار بقدیر
ایہہ نذر تیری آج ہو گئی میں چھڈیا اپنا سیر
تیرے در تھیں بگڑی سور گئی لکھاں دی تقدیر
بوہڑیں گڑھ بغدادیا مینوں تیری دھیر
توں بے کساں دا آسرا والی دستگیر!
تینوں لاجاں لاجاں والیا توں لاجونت امیر
بغداد چڑھاوا چاہڑساں اہ نیلی خوش تصویر
پئی کھلی چر سی بار وچ کھا سی گھیو تے شیر
تینوں کھڑی تھوڑ سراج نوں جے چا بخشیں توقیر

☆☆☆

مرزے دا اسوار ہوناں

مرزا سنب نیلی دے چک کے چمدا وار و وار
اُہناں حد رکھی ہک بھاج دی جہڑا جاوے بازی ہار
پھر گوڈے چُجسی آ کے پریوں دے وچکار
جوڑ کنوتیاں آ کھلے گھوڑیاں دے اسوار
مرزے مونہہ بغداد ول نیلی وچ قطار
اُس دلی بھاجاں بھجیاں کہتے نہ آئی ہار
صدقہ شان براق دا اُوہ گیا دلیوں پار
پڑھ سیفی منہ بغداد ول ہو بیٹھا اسوار
بناں عذر بہانے دیو سی گھوڑا تے دستار
اہ شرط لئی من ساریاں ہو کھلے تیار
پئے دن جانچی آکڑاں خودیاں تے بلکار
پئی نخرے کھیڈاں دسدی شاہ پریاں دے ہار
کرے دعائیں مالکا تینوں شرماں چھیکڑ وار
رکھ لاج لئیں اج بھاج دی صدقہ دُل دل دا اسوار

نیلی عرضاں کوکیاں مولا دے دربار
مقابلے وچ مرزے دی جیت
واگ اشارے منگدے وٹ وٹ مارن پوڑ
ہلا بھلا رب آسرا ہو گئی دوڑ و دوڑ
یا علی علی کر خان بھی دتی نیلی چھوڑ
مرزے دے اشارہ ران دا ذرا دتی واگ مروڑ
سنب سنے کدھ کدھ ٹھوڈیوں اہنوں پئی مقابلے سوڑ
نقرے چپنے مانکے گئی دُور پچھاہاں چھوڑ
جگ دیکھیا نیلی نتر گئی ونج حد تے پوہتی توڑ
جگ جاتا چڑھ گئی فلک تے آئے نہ کہکشاں توڑ
اُہناں ہتھ مونہہ لے کے سکھنے آندے گھوڑے موڑ
پھر سر سراج اُٹھا کے اُٹھی چنگیاں مار
تازی وچ میدان دے کھلے کنوتیاں جوڑ
ڈھولاں گھت گھنوناں دتیاں دف تاشے تابڑ توڑ
گھوڑے لے لگاماں اُبھرے نکلے واگاں توڑ
بھاج سراڑے تازیاں نترن کھا کھا کوڑ
نیلی کھا کھا پلے اُبھری وچ وچہ دھرتی توڑ
وانگ شہباز اڈاریاں دیہہ پلٹی تروڑ مروڑ
جیوں ایرن سٹ ودان دی سنب ساڑی جاون روڑ
کھا پلٹا نظروں چھپ گئی گھت وانگ کبوتر موڑ
کھلے جانجی وانگ مہانیاں بیٹھے بیڑیاں بوڑ
اُہ طرے شملے پکڑیاں ہتھیں لین مروڑ
پلے سچ سراج جہاندڑے کدی نہ آوے تھوڑ



جانجیاں دیاں پگاں لاہ کے مرزے دی واپسی

ہتھ سانگ رنگیلی چکدی مڑیا مرزا خان
تک بتر شاہ اسوار دی جگ ہويا قربان
مرزے نیلی نوں چکاريا دے اشارہ ران
دنیا دیکھ نہ رجدی واہ واہ مرزا خان
مرزا کہندا بیلو ہن بول کرو پروان
جانجی لاہ لاہ پگاں دیوندے تے گوڈے چم چم جان
سر ننگے کر کے جانجیاں ٹر آیا مرزا خان
جھٹ مار سہرے نوں تروڑیا کھوہ کیتے پھل و ران
اُس بدھی ہوئی پنڈو کڑی گھر پیو وڑیا آن
مُجرے کردی آوندی نیلی وچ میدان
واہ واہ جمن والے جمیائی لال نشان
گردن چمے جھک کے کھڑ گئی وچ میدان
پھیرن ہتھ وڈکڑے جیوے دوہتر وان
میں گھوڑے چھڈے دو جیاں شرطان دیہو آن
مرزا جری سورماں من گئے خانی خان
جیتھے لاڑا کھلاسی جنج دا او تھے نیلی ڈھودے آن
جانجی مار لئے شرمندگی کھلے نہیں زبان!
ماسی وبھدیاں ٹھر گئی میں صدقے تے قربان

پر آکھن لگی مرزا کر آئیں نقصان
مرزا کہند ہس کے ہویا ہو گیا جان
میں لا بازی موت دی کھیڈاں جسدے کان
کر کوئی ڈھو ملاپ دا ویلا وقت پچھان
میں جان تلی تے رکھ کے کھیوے وڑیا آن
برا نتیجہ ایس دا ہنے لویں گا جان!
ہُن سَد ملا حبیب نوں چاہڑھ بھلا احسان
اُسدے باجھ دیدار دے صبر نہ پاوے جان
میں تنگ نیلی دا کھولنا گھر آپنے جا کے تھان
جے ماہی ملے سراج نوں تاں آس چڑھے پروان

☆☆☆

بیو دی مرزے نال گل

بیو کھندی مرزا کاہلا مول نہ تھی
ذرا ہون دے دھندو لکا گھڑی نماشاں دی
اج طور تجلی صاحبان بلدی شمع پئی
تیرے دم دے کارن مرزا میں شہرت مل لئی
میں اج تیری بیل چڑھاوساں خان کھیوے دی دھی
لبریز پیالہ وصل دا حوصلہ کر کے پی
میں تیرے کول لیا وساں صاحبان حسن پری
تک حسن نظارے مرزا رکھیں ہوش صحی
تیری رُت سلامت جگ تے شالا لکھ سے ورہیاں جی
اگوں ڈھو سراج نصیب دے خبرے لکھیا کیہ!

☆☆☆

صاحبان نوں مرزے دا پتہ لگناں تے بیو دا جاناں

صاحبان نوں بھی خان دی پئی ہوئی کنسو!
سنیاں اوس مقابلہ باہر ہوئی جو جو!
جیوے شانناں والڑا جگ پیر پیوس دھو دھو
دھمی میرے خان دی دیساں وچ خوشبو
تیل جویں پھر پونچدا ڈیوے لگدی لو
زندگی کولوں صاحبان بیٹھی سی ہتھ دھو
صاحبان اپنے خان دا سہرا رہی پرو
اچراں نوں کول اُسدے وچ بیو رہی کھلو
ایدھر رولے خان دے اودھر جج دا ڈھو
کپڑیاں وچ نہ میوندی بیٹھی دُونی ہو
میرا خان لکھاں تھیں چوٹواں اودھی ریس نہ سکدی ہو
میرا تن من اُسدی دید تھیں صدقے جاوے ہو
اُہدی نکل جاندی جندرڑی پھر جھٹ رہی کھلو
فیر اُمیداں لگیاں رب بنائے ڈھو
پئی گندے موتی رائگے نیناں تھیں چو چو
موہوں کچھ نہ بولیا اکھیں گہیاں گو

جوں نابینے اکھیاں صاحبان لگ پئی لو
شدیانے شغل ویاہ دے اُسدے بھانے سو
منگدی سی اس گھڑی نوں اللہ تھیں رو رو
چج گئی آس سراج غریب دی ہن خطرہ رہیا نہ کو

☆☆☆

صاحبان دا گھروں نکل کے مرزے ول جاناں

دھراہ دھراہ گولے آتشی ڈھول پئے گھر نا
طبق کھیوے دا کنیا سر گئے چکرا
ویہڑیاں ہور بنیریاں کوئی نہ رہ گئی جا
نفسو نفسی پے گئی کھو جیہی کہا
آہی پئی اڈیکدی ایہو ویلا دا
مل گئی ڈھیری خان دی عشقا مرحبا
ربا بیل چڑھائیں خان دی نکلی منگ دعا
آمین سراج غریب دی رب دیوے توڑ چڑھا
دھراگاں بھیراں کڑکیاں تریاں پئی کہا
جج نگری وچ آوڑی آتشی بازاں تا
اٹھی پرہیوں داریوں کارن میل ملا!
کڑیاں کارن جج دے اٹھیاں رولا پا
صاحبان سنبھلی جاج گئی اٹھی رب دھیا
خاک برابر سمجھ کے داج زیور کل بھا
اُہدے ہتھ گانا سی موتیاں سٹ چٹھھے گئی جلا
سر بنھ منڈاسہ صدق دا بھار گئی گل چا

☆☆☆

بیو دے گھر مرزا صاحبان دی ملاقات

گھٹ کالی مائیں کپڑے صاحبان دا چہرہ نور
پئے جھلمل بندے جھلکدے جلوپاں تھیں معمور
بیو دے ویہڑے آوڑی جیوں آسماناں تھیں حور
کھا غش جھڑیا پلنگ تھیں ہوش ہوئی کافور
فرحت پائی سینیاں آہے مدتاں دے مجبور
کانگ جوانی جو بنال لٹ لٹ جوت ظہور
پیاں لٹکن زلفاں کالیاں ناگنیاں دستور
مرزا جھل نہ سکيا تابشاں پئی لشک تجلی طور
صاحبان لیا کلاوے یارنوں ہو وچ نشے مسرور
کیتے سرد سراج ملاپ نے دو تپدے تندور

☆☆☆

صاحبان دا مرزے دی بیل تے چڑھنا

مدتاں دے اودرے سن دونویں دلربا
لؤں لؤں چھائیاں مستیاں سُدھ بُدھ رہی نہ کا

صاحبان کھندی مرزیا میری جند سو وار فدا
مینوں کفر اسلام نہ سجھدا دیر و حرم گجا
چھڈ مینوں اندر دوتیاں گکیوں راوی قول بھلا
دم نہیں ماریا جان کے سر جھلے سو تاء
کانگے ہوئے حسن شباب دے رل گئے دو دریا
انج چڑھ گئے نشے وصال دے بیٹھے دنویں ہوش بھلا
ہتھ پھیر متھے جم آکھدی مرزیا ہوش بجا
پئی رات انہیری شوکدی تیرا رب سترایا دا
توں ایڈے پاڑن پاڑ کے وت بیٹھوں ڈیرے لا
تاں بے خودی دی نیند تھیں مرزا جاگ پیا
کڈھی باہر حویلیوں لئی نال مہاٹھ ڈھکا
اودھی ٹٹ گئی چوڑی چڑھدیاں سروں اتلا ڈھلک گیا
چوہدویں آہی چن دی تے آہا وقت عشا
بیو آئی دوہاں نوں چھتا کھوہ لنگھا
لے ہن اللہ آسرا مڑ گئی دے دعا
پاہرو ہر ہر قدم تے بیٹھے گھات جما
کوکن شیر گھیلے بار دے کڈھن جند ڈرا ڈرا
صاحبان دا خیال تے مرزے دی مت
اُنہوں دسیاں ہلاں پوندیاں اپنے رنگ محل
اُہدے نین گلیڈ و بھر گئے اُنہوں یاد پئی کوئی گل
اٹھ پاہرا بھکھا کھیویں میرا ٹریا خان نکل

میں دو جگ تیتھوں وار کے تینوں مل لیا
میں جتول ویکھاں مرزیا آوے تیرا نظر لقا
مینوں پہرہ دیندی مرزیا گئے کتنے سہ و ہا
اک ایس گھڑی دی آس تے میں دتی عمر لنگھا
اہناں مست پریم دیاں جھوٹیاں مرزا لٹ لیا
ونج جھون جگایا دوہاں نوں بیو نیڑے جا
لٹ مال خزانے جھلیا سنھ بیٹھوں سبج بنا
گھت نیلے لے ونج صاحبان ہن بالکل ڈھل نہ لا
اٹھ وقت پچھان بے طوریا ہن جاسی پے کہا
اُس نیلی کھولی تھان تھیں مونہہ کڑیا لا پا!
پھڑ بانہہ صاحبان دی خان نے لئی گھج کے مگر بہا
بیو تڑی تک کے آکھیا ایہہ مندا شگن پیا
کالے بدل امر دے گئے انبر تے چھا
پھر کالی رات ہنیر ٹی اگوں سخت مخالف وا
مار جھل چہناں دا بیلڈا خطرے لکھ بلا
ٹریا راہی دانہ باد دا نو لکھا لال چھپا
شالا رکھی لاج سراج دی شاہ انور راہ نما
باہر نکل کے صاحبان بھیں ڈٹھا کھیوے دل
بھلا الوداع سہیلیو میں پرت نہیں اوناں دل
شالا اُجڑ ونجے اہ پر تھی کوئی گڑا از غیوں جھل
صاحبان روندی ویکھ کے مرزے لالئی گل

مینوں جاپے کھیوہ چھڈناں تینوں جاپدائے مشکل جے تے جانائیں دانہ باد نوں میری بیل تے بیٹھ سنبھل
اگوں ویکھ سراج تاں پہونچسیں پچھوں تگناں بے محل

مقولہ شاعر

کالی رات ڈراؤنی بدلاں کیتا میل
ماہی خاطر جج دی اہناں سر کھرکھن نہ وہیل
اُہناں آگئی رات سہاگ دی ملے وٹے عطر پھیل
نوشہ کھیڈے بیڑ وگھوڑیاں مرزے صاحبان پائی نیل
جھکھڑ جھانجھے شوکدے جگ گئی سیاہی پھیل
عاشق تے معشوق دا چا قدرت کیتا میل
ہک دھاگے دے وچ پُر گئے دو پھل گلاب رویل
دیکھ سراج ہن کھیڈ دی قدرت اپنے کھیل

☆☆☆

مرزے صاحبان داباری وچ بھلی پوناں

جھل بیلا بوٹے کاہیاں مارو بار اُجاڑ
رات غبار ڈراؤنی ہاتھی دسن جھاڑ
اس رات آفتاں ساریاں پیٹھیاں کھول
جت ول نیلی وگدی اگوں دسری واڑ
نیلی مرزے خان دی چھڈی ساری جوہ لتاڑ
اگے رات ڈراؤنی کچھے کالی دھاڑ
نیلی سوڑی پے گئی نہ کوئی راہ مہاڑ
جاتا مرزے خان نے ہو گیا کم وگاڑ
اگوں واء مخالف ساہمنے نالے بدلاں دی چنگھاڑ
جاپن اُلٹے آوندے جنڈ کریر پہاڑ
گدڑ پھرن ہوانگدے چھاراں تے بگھیاڑ
بھوں بھنوالیاں کھانڈیاں رات ہوئی دو پھاڑ
پھر پھر کے جد آوندے پھر کھیوے دی واڑ
کرن دعائیں مالکا جھب کتے دن چاڑھ
اُوا پڑانہہ کھیوے دا اُہا لٹھ چھاڑ
پر دلوں سراج نہ ڈولیا عاشقاں چت پہاڑ

☆☆☆

مرزے صاحبان نوں راہ وچ بابا رنگھڑ داملناں

بھلی پئے ہوئے بار وچ دلبر تے دلدار
چھڈے جھنب انھیری جھانجیاں دلوں بیٹھے حوصلے ہار
پھر کھیوے آوے ساہمنے جت ول مڑن اسوار
جنگل دے وچ پھر دیاں کوئی نظر پیا اثرار
کوئی کھاہڑا راہ نہ سمجھدا شب کالی دُھند و کار
جھاڑاں دے وچ پھر دیاں اُہناں چھڈی رات گزار
وس نہ کوئی چلدا قدرت ہتھ مہار
نیلی ہدکی اُچھلی مرزا سنہلیا ہوشیار

واگ سنبھالی خان نے گھت پیاں تے بھار
 بابا رنگھڑ اوس نوں آکھدے عمروں ادھکڑ پار
 جھکھڑ جھانجا ویکھ کے بیٹھ گیا جھنب مار
 اُٹھ نیڑے ہو کے پچھدا توں کون کوئی اسوار
 اہ چھٹرو ساڈے مال دا بابا رنگھڑ ڈیرے دار
 اج پنج گھنوں میری سانگ تھیں میں مساں گھسایاوار
 میں کھیوے آیا میل ساں کل ہی پچھلے پاہر
 مینوں سدیا شاہ سلیم نے دلی وچ دربار
 ہُن راہ بھلائی وتناں کوئی نہیں بُجھدی سار
 میں جاواں کھڑی لاہم نوں کرکھاں سوچ وچار
 لگ اگے مرزے خان دے وگ ٹریا ماہر کار
 اہ پکا کھاہڑا مال دا جاسی ڈیکوں پار
 رکھیں قطب کنڈ تے آپنے پشت پناہ حصار
 دن چڑھدے جاسیں ڈیک تے اگاں نیلی نوں شکار
 اُنہوں اگے پچھے دس پئے چڑھے ہوئے دوا سوار
 ایہہ صاحبان تیری بیل تے چلیاں ڈاکہ مار
 اگ لائی جاناں دیں نوں ایہہ اوکھی پچھی کار
 لائی گلیں جاناں مرزیا چدھڑاں دا لاکھی ہار
 او تھے پنچھی ناہے پھڑکدے دھن مرزا کھڈکار
 مت چدھڑ ماہنی راہ وچ پھڑ دیہنی دھرت نگھار
 مرداں پھیرا جگ تے ہوندا ہکو دار
 خوش بخت سراج انہانڈرے جہاں کیتا عشق وپار

پھڑ سانگ سجے ہتھ تولدا قبضے وچ تلوار
 اک واگی نانکے مال دا کاماں خدمت گار
 سی مال چگاوند اوتا مینہ ول گیا جنگل بار
 مال ترٹھا اوسدا نالے کن پیا کھڑکار
 صاحبان بول پچھانیاں دتے مرزے نوں سُن یار
 مرزا ہس کے کہندا رنگھڑا آہیا زندگی کوئی دھنوار
 میں مرزا ساہی راویوں ماما سن میری گفتار
 ہن چلیاں واپس وطن تے پئی ضروری کار
 میں رات چیری اس واسطے حکمنامہ سرکار
 دس رستہ دانہ باد دا توں ہوسیں واقف کار
 رنگھڑ سانگ پکڑ اُٹھ وگیا بدھا لک سنوار
 سدھواہ ہک پنیڈا جا کے کہندا لے ہن ہو ہوشیار
 اہ راہ نہ چھڈیں راہیا بھاویں نکلن پاہ ہزار
 ہن سرگی ویلا جاپدا ہویا کھرا نچٹ ہنجاہر
 دس رستہ رنگھڑ پرتیا اوس پرت ڈٹھا بھوار
 اوہ اُچی کو کیا مرزیا تیرا پھبیا خوب شکار
 پرکن دے دے کھول کے میری سن جاگل گفتار
 ہکو ماہنی تیرے نانکے تیتھوں ہونیں نہیں بیزار
 توں چڑھیا ایں جھڑی دھولریں دھر پڑ سانگ پیار
 ہن گھت پیراں دی مرزیا تے سد پراناں مار
 رکھیں حوصلے ساہم کے ہمتاں بہیں نہ ہار
 اہ دنیا خواب براہری جھٹ کوئی پکار

چکی ریہڑا کمہار

راہی دانہ باد دے آہے بیٹھے رستہ کھو
 نیلی ٹر پئی چال ہوا دی پئی سدھے رستے ہو
 نیلی چکی جاوندی اک جندڑی جُستے دو
 ہن رات وی جا پے دھم پئی چڑھدیوں لگ پئی لو
 نیلی چلدی چال روال دی ترٹھی رہی کھلو
 اک نام کمیرا کھیویوں ذاتی دا گل گو
 صاحبان نیڑے ہو پچھانیاں ڈک نیلی رہے کھلو

☆☆☆

صاحبان داسنیہا

بابا چکی ریہڑیا میری گل سن ذرا کھلھیر
 میں ٹرائی سنگ خان دے مینوں گتے عشق زنجیر
 تینوں مل پوسن وچ بار دے میرے بھائی میر شمیر
 کسے صورت مٹ نہیں سکدی متھے دی تحریر
 اتھے وس نہ چلدا کسے دا ایہہ عشق پیراں دا پیر
 جے مگر میرے اٹھ چڑھو گے ہوسی جگ تشمیر
 چا پوری کیتی رب نے میری خواہاں دی تعبیر

میں دھی کھیوے دی صاحبان پاپن پُر تقصیر
 گئی مل مکا لک دیس دی پر حق تے رہی اخیر
 آکھیں ہتھ بھنھ میری طرف تھیں ہن من جاوَن تقدیر
 میں دو جگ مرزے خان دی تے خان میری جاگیر
 انہوں سجدا کر گئے انبیا غوث ابدال فقیر
 نہیں ڈٹھے واپس آوندے لے گئے سمندر یں نیر
 پئی قسمت جاگ سراج دی مل پیا ماہی انور میر

☆☆☆

چکی ریہڑے دا جواب

کہے چکی ریہڑا صاحبان آئی ایں ظلم کما
 تیرا بابل دانت دیس دی چلی ایں جگ ونجا

ہن کس کم تیرے دھیدرے ایہہ رناں والے دا
 ڈر بھوہرے شوہدے مرن گے تیرے میر شمیر بھرا

جگ منے چدھڑ سورے آئیوں لیک لگا
 اہ ویر دوہاں نوں صاحبان پوسی ماہگے بھا
 کیہ چلیاں نال بھجا وسیں اگ جھلاں نوں لا
 ڈاکے پون سراج اس بار وچ گئے کیتی ساٹھ لٹا
 چڑھیا سورج بادشاہ لگ پئی لو جہان
 پھٹکیا ہویا رات دا نندرایا مرزا خان
 قدم قدم تے صاحبان پئی آکھے لال دھیان
 مرزا کہندا صاحبان ہن کیہ وہم گمان
 اتھے جھٹ ہک دو پرا کٹیے جاسی اتر تھکان
 صاحبان ہوڑ رہی پا واسطے پر نہ میاں نادان
 صاحبان چار چو فیراں ویکھیا جھاڑو جاڑ ویران
 اہ تک مرضی دلدار دی کر گئی بند زبان
 اک ویکھ جنڈورا چھانگلہ کیتا اُہناں مکان
 زین سرہانے رکھ لئی بیٹھ آسن کھیس وچان
 بنھ لئے تقدیر نے وچ جنگل بیابان
 کوئی پیش سراج نہ جاوندی جد آخر ڈھکے آن

☆☆☆

مرزے دا باری وچ سسین جاناں تے صاحبان دے خیال

پئی جھل مریدی پیار دے صاحبان پکڑ رومال
 خان چھائیاں کیفیتاں سوں گیاں مستی نال
 جھاڑ بوٹے فردوس دے طوبی جنڈ مثال
 مینوں رات اخ دانہ باد وچ اوسی رتجھاں نال
 چھتی بھین ننان نوں ملساں چھھا ڈال

اج جنج ڈھکی گھر ماہیاں ملاں وچ کہا
 اج سیالاں کھرلاں ورتناں ڈھو ڈھب بھا کھا
 تیرے اہ سنیہڑے تیتے رکت گن تے تا
 اہے دانہ باد دراڈڑا او تھے پنج کے خیر منا
 مرزے صاحبان دا راہ وچ ٹھہر جاناں
 نیلی کیر گھتی آوندی پنڈے مکدے جان
 اُہنوں جھوٹے آگئے نیند دے لگ پیا ہگلاں
 اس نیندر وچ اندیشڑے میں صدقے قربان
 اُہ رکھ پئے دسدے ڈیک دے جھنگیاں ویکھ نشان
 ہن کھیویویں کوئی پہنچسی اہ گل اوکھی جان
 اودوں موت بھی واگاں کھچیاں نیلی ڈک لئی خان
 اُہدی ڈر گئی نازک جنڈڑی ہو دا ویکھ میدان
 راضی رکھنا یار نوں عاشق دا ایمان
 لاہیا ڈھنگا مار کے نیلی دا سامان
 مرزا لاہ ہتھیار دوالیوں سوں گیا چادر تان

تان دو شالہ سیں گیا مرزا بسترا ڈال
 کدی پیر چمبیدی یار دے کدی چمدی متھا وال
 صاحبان بھانے اُوہ گھڑی جنتوں ودھ کمال
 وچ تصور دب گئی پئی صاحبان کرے خیال
 ونج کول پھنچھی دے بہانگی راہنگلا پیڑھا ڈال

متھے کیڈا کرم کمایا چا قادر جل جلال میں دو جگ صدقے وار کے لیا جھولی مرزا لال
پئی لیندی لطف جمال دا وچ خیال وصال چھوڑ سراج اہناں نوں چل پچھلا دسیں حال

☆☆☆

کھیوے وچ لاہد تے رولا

دن چڑھدے کھیوے شہر وچ گھر گھر ہو گئی لاہد لے گیا مرزا صاحبان نوں راتی دانہ باد
سیالاں ہوشاں بھلیاں کجھ نہ رہ گیا یاد سوگ ملائیاں جانجیاں کھانے رہے نہ یاد
عزت کھیوے جٹ دی ہو گئی برباد شالانج جمیں یا مر جاوے ایہو جیہی اولاد
خطرے پے گئے دیس نوں کوئی مندا پیا فساد ہو سی جڈھ بے اوڑکا اہ مندے دی بنیاد
سوگ سیاپے پے گئے بھل گئے سکھ سواد رحم سراج نہ رہ گیا جاگے بغض عناد

☆☆☆

مرزے پچھے سیالاں تے چدھڑاں دی ہاٹھ

کڑ کے میر شمیر جیوں بجلیاں واہرو ڈھول وگا چڑھن دھاڑ نکل پئی کھیویوں کھڑاں نال لڑن
ہو کر پائی ہوئی ماہنیاں موہوں پئے انگیار جھڑن گڑ گجیاں سُن سُن سورے راوی دا راہ پھڑن
پٹ پٹ سنگل تازیاں کھا کھا وٹ چڑھن زین لگاماں چھوڑیاں دے دندیاں چک کھڑن
تیر کماناں برچھیاں سانگاں ہتھ پھڑن تپک تفتکے رھکے ہتھ لایاں ناگ لڑن
پراونھ کے ساری بار دارل چدھڑ سیال چڑھن ڈھونڈن بوٹے جھاڑیاں کل راہے کھڑے ہڑن
اودہ جانڈے اک برساونڈے پئے ساوے گھاہ مڑن سہے ہرن سراج اج بچ گئے اہ چلے شیر پھڑن

☆☆☆

چکی ریہڑے داملناں

ہا ہو ہونڈی آوندی ساری ساندل بار پھردے جھاڑیاں ٹپدے پیدل تے اسوار
سانگاں ڈانگاں برچھیاں ہر ہر قسم ہتھیار چڑھ چڑھ ٹانگوں دیوندے پئی ہوئی حال ککار

پکڑا لاه بھواندا بانہ سرے تھیں وار
دس کیرا کھول کے کیہ کچھ تینوں سار
بڑے بے فکرے جاپدے ہس ہس کرن پیار
جے اٹکے نہیں تاں اپڑ گئے لنگھ گئے پتوں پار
چھوڑ سراڑے دیوندے گھوڑیاں نوں اسوار
اُس نیلی چُکدی ویکھ لئی لتھا کُوکاں مار
بھلا دلیرو حوصلہ لبھ گیا اے شکار
شیراں نال مقابلے اوکھی ہوندی کار
پایا سی نال مشقتاں عاشقتاں ہک پلکار
ہائے سراج آسمان دی مڈھوں ایہو کار

اجراں اگوں کوکیا تک کٹک کمبیار
ڈٹھا خان شمیر نے کول سدے سد مار
اُس آکھیا ڈٹھے جاوندے میں نیلی دے اسوار
ہتھ برچھی مرزے جٹ دے گل ترکش تے تلوار
نویں سروں پھر ہو گئی ہا ہا تے للکار
ہکی چڑھ کوانہ تے ٹانگیاں نظر چوہیرے مار
کُوکاں چار چوہیریوں کنب گئی ساری بار
آہے سارے جاندے مرزے دے بلکار
ہائے اسماناں ظالماں توں کیڈا کج رفتار
بہن دیندوں ہک جھٹ تے چریں وچھنے یار



صاحبان دی گھبراہٹ

بلبل وانگن بیٹھ کے پئی پھل دی لیدی باس
کوئی سوڑ پئی ہوئی دے نوں گیا اندروں نہ دسواس
اجراں گتے خان شمیر دے آئے بھج دے اُس دے پاس
پک جاتا ماہی آ چڑھے بس گئے کولے پھاس
ہن کاں کھاوون گے بوٹیاں رت پیسن گدڑ ماس
آگئی گھڑی سراج آخیر دی اُہدے ختم ہوئے دھرواس

پئی صاحبان سی پلہ مار دی ستا مرزا بے ہراس
نالے مٹھیں بھردی خان نوں نالے کردی پئی قیاس
اُنچ پئی اُسار اُسار دی پر چت اُداس اُداس
تک صاحبان تھر تھر کنب گئی گیا اٹک حلق تے ساس
اُہنوں موت گئی دس ساہمنے گئی ٹٹ زندگی دی آس
تدبیراں ساریاں مکیاں تقدیر گئی ڈھک راس



صاحبان د امرزے دا تیر کمان جنڈ تے ٹنگناں

پھڑ ترکش مرزے خان دا ٹنگیا جنڈ تے جا
نہیں مڑناں مرزے جنگ تھیں دیسی سوہڑ وسا

صاحبان کچھ نہ سوچیا سمجھیا اٹھی تے تا
دلوں ماری ایس دلیل نے ہنے ماہنی جاسن آ

میں ہتھ بٹھ لیاں اٹھ کے گل وچ پلڑا پا
مینوں بڑا پیاریاں رکھ دے میرے میر شمیر بھرا
میں بھل گئی مندا کیتا تسی چنگا بیجو چا
میں واسطے ہارے پا کے لیاں ویر منا
صاحبان غلطی کیتی جان کے کہندے نین دانا
صاحبان دی تدبیر سی اپنے ولوں صفا

☆☆☆

صاحبان د امرزے نوں جگا وناں

جاگ وے مرزیا ستیا سن ڈھولاں دی گھنگھور
جاگ پئے گھر والڑے سنھیں پھڑ لئے چور
میں ہتھ بٹھ پائے واسطے مرزیا ٹور دے نیلی ٹور
اٹھ ویکھ چو فیرے جاگ کے ہاٹھاں پایا شور
سانوں گئے خان شمیر دے دل گئے نی گھور

☆☆☆

ایضاً

جاگ جیویں میں واریاں تک مونہہ تھیں پلڑا لاہ
آ گئے تیرے نانکے تیرا کرن ویاہ
میں کیڈے پائے واسطے لگوں خانان کرن وناہ
پھڑ نیلی مار فراقیاں پو راوی دے راہ
میں دو جگ تیری مرزیا رب رسول گواہ

☆☆☆

خان دا اٹھناں تے ہتھیار سمہالنے

پئی موت سرے تے کوکدی چوہیرے مار ومار
دونویں کنیاں ملی آوندے میرے میر شمیر جرار
دیکھے چار چوہیریوں دل گئے اسوار
سیلے سانگاں برچھیاں بدھا پھرا سنوار
بڑے نال تحمل حوصلے پہن لئے ہتھیار
میری ہو جاسی لاہم نوں پڑھ ناد علی ونگار
ہنے ویکھیں کنڈیں دیوندے اہ جیہاں دے کھڈکار
جھل جاون میرے پینترے توبہ ڈاڈا رب جبار
اہ کل کتھے آہے سورے میں پگاں گیا اُتار
میں آپ وگائے رڑی تے اس دے پھل کھلار
میں کھچ کھچ جاساں مار دا دھر نام ونگار ونگار
پھڑ سچے پاسے رکھدا برچھا تے تلوار
ڈٹھا ترکش ٹنگیا جنڈ تے ٹٹ گئے بل ہنکار
صرفہ کر گئی جد دا گئی عقلوں رڑھ ہنکار
اس تیری اُلٹی چال نے مینوں پڑ وچ دتی ہار
ہن کیہا مان بہادری کول نہیں ہتھیار
نہ بے پراناں کردیوں خود ہتھیں دیندیوں مار
چھم چھم آنسو برسدے رُنی زار و زار
وس پئے مرزے خان تے تیراں دے شہکار
صاحبان دے پھل بدن تھیں پیا بچاوے وار
پر دُوروں دین سنہوڑے رکھ شستان اسوار

دے خان چروکیا سُنیا اُٹھ خوابوں ہو بیدار
مینوں ہاٹھ دسندی آوندی لشکن پئے ہتھیار
اُٹھیا مرزا سورماں کلہ پاک چتار
جیوں لوہے گڑے دی بدلی جاوے جھک ہنجار
کجھ نہ کنیا ڈولیا راوی دا سردار
آکھن لگا صاحبان نہ گھبرا زہار
اہ تیرے ویر بگھیلڑے مینوں دسن بھیداں ہار
میں ڈٹھے ہوئے انہاندڑے جمیاں بل بلکار
اہ طاہر سنے سبھالیاں اج مارن رج ڈکار
ونج ڈھونڈن جا کے کھیویوں سہرا تے دستار
توں دیندی جاکھاں کانیاں کڈھ کڈھ وار و وار
مرزا دے تسلیاں حوصلے جم پینترا کھلا سوار
پھر تیر کمان سمہالدا نظر چوہیرے مار
سمجھ گیا اہ صاحبان کیتا چچ سنوار
آکھن لگا رو کے واہ میرے دلدار
میں خالی ہتھوں کیہ کر اں بس بہہ جاساں جھنڈ مار
ارمان ارمان انھیریاں صاحبان پھر ارمان ہزار
صاحبان پٹی عقل نوں ہتھ پٹاں تے مار
پرکیہ بن داسی رُنیاں اودوں نیڑے آگئی واہر
ڈھال سمہالی خان نے آخری فرض شمار
ہتھ برچھی پھڑ لئی رانگی نیڑے دا ہتھیار

جے آہیا ایہو بہادری وت کیتے کیوں لنگار
آ جا وچ میدان دے پھڑ برچھا سانگ کٹار
اہ تیرے جیہیاں صورتاں میرا اک نہ جھلن وار
اسی عقل اپنی نے مار لئے سی غالب امر جبار
وت ترکش تیری بھین نے چاٹھیا قبضیوں باہر
آ چھڈا کے ویکھ لے تیرا دس جاوے بلکار
گج چڑھسی بدل راویوں سنسی جگ دھسکار
کھنڈ ویسن برچھیاں واڑے تیری ڈیکوں پار اورار
پئی گل کر لسی پر تھی جد تک رہیا سنسار
چرخ چڑھن گے فلک تے کھا کھا رج مردار
اہ جسہ چولا مانگواں جاساں لاه اُتار
سو جان تصدق ساہمنے صاحبان خوش رخسار
لُوں لُوں وچوں خون دی چلی ہوئی دھار
مارے سد سراجِ اخیر دے راوی دل بانہہ اُلا

کیہا خان شمیر نے مرزے نوں لکار
پرت آکھیا مرزے خان نے انج مہنے دے نہ یار
توں مینوں مڈھوں جان دا میں تیرا واقف کار
پر لاه اج سدھراں سارپا تینوں دتی رب دہنوار
میں سیں گیا مان بہادری سی جسے وچ بلکار
ایہہ وینی تیری بھین دی میں پھڑی ہوئی نال پیار
پر سن مامے دیا پُترا اہ سمجھیں گھڑی اُدھار
مینوں اکھیں نہیں پئے سدے میرے ساہی کھل اسوار
پٹ ایرا تیری ڈھوک دا کر جاسن آہلیاں ہار
پیا ویکھاں تیرے پنڈ دی میں اڈی دھوڑ غبار
میں بنھ کے سہرا عشق دا لنگھ ویساں پتوں پار
مینوں طور جنڈورا جا پدا تے نور تہلا یار
تیر وں پئے خان تے بارش موسلا دھار
مرزا بے ہتھیارا ماریا بے وس تے لاچار



مرزے دی آخری فریاد

میں بے ہتھیارا کس گیا ارمان ارمان ارمان
میں جا گیا وار نہ پچھیا ہویا اٹھ روان
میں جنج نہ سنا بھی بھین دی میرے بوہے تے مہمان
میں ڈولی ہتھ نہ پھیریا رہی شوہدی نوں ارمان
مینوں سدھرہ گئی جنگ دی رہے دل دے دل ارمان
دسیں رو کے وچ درانیاں میری ورتی داستان

میں دُور بھراواں تھیں ماریا میرے ناہے کول پران
مینوں سدے ہو گئے عشق دے ستاساں چادر تان
میریاں واگاں پھڑ دے رہ گئے بھیناں بھائی لاتران
میتھوں رہی بھونٹا منگدی مینوں دے ونج ویر نشان
میں صاحبان دی غلطی ماریا ناہی ہتھ وچ تیر کمان
ہن وں چدھڑیں چندریئے ور لے کے طاہر خان

میں کھیڈ نہیں کھیڈی ہارویں پیا کرسی گل جہان
میں وچ بھائیاں اُنکھیلڈا لاڈا نوجوان
میرے ویر اسوار رنگیلڈے برچھیاں والے خان
باجھ بھراں سکلیاں پٹھکاں کدوں سہان
گھریں نت پروہنے آ وں پئے بلی ملن ملان
رَل رَل بہسن سنگتاں مل مل بہسن ہان
میری ماں چودھرائی دیس دی چودھرائیاں وچ پردھان
وریا ماں موت سہلڈی نہیں مرنے دا ارمان
میں دوس دیواں دلدارنوں نہیں دیندی زیب زبان
میری لاش ڈھٹھی تک نیلیئے ہوویں دانہ بادروان
وت آکھیں میرے سنگ نوں میری لاش سہالوآن
بغداد چلی جائیں دس کے توں منّت پیر پیران
میری جان لبائے آکھلی میرے اڈن ہار پران
سنو جنگل دیو پنچھیو کل جیا جون حیوان
میں غوث الاعظم پیر دا سیوک مرزا خان

پئے شاعر کر سن شاعری پنجابی اہل زبان
مینوں ستیاں سدا ہے ماردے چھتر لیندے تان
توبہ چکیں باہیں کپسن اج کہڑے کم تران
اج سر جے میرے ویر دا ٹٹ گئے مان
میری نیلی ہنک نہ آوی اُہدا لگا رہسی تھان
میرے ویر اڈیکاں رکھسن کتھے مہری مرزا خان
توبہ سن کے کوں پچاوسی جسدا ماریا شیر جوان
میرے ہتھ نہ ڈٹھے ویریاں ناہی قبضے تیر کمان
اساں راضی رکھنا یار نوں جاتا دین ایمان
ونج دسیں میری بھین نوں میرا رو حال بیان
میرے برچھیاں والے بیلو آو میری دیہو مکان
کوئی چڑھے نہ تیری پٹھتے رکھیں آپ دھیان
میرا لوں لوں وڈھا نادکاں گل کفنی لہولہان
میں پڑھ کلمہ عشق دا لگا ہون روان
اج اوکھی گھڑی سراج تے چا پکڑے شاہ جیلان



صاحبان دی آخری فریاد

صاحبان گھت کہائیں دتیاں رُنی کڈھ ارمان
میں تتیاں لیکھاں والڑی جی ظلم کمان
میں کئی گھر گالے تڑی میرے متھے تت نشان
میں آپے گڈھیں گھلیاں گھر وسدا پٹیا خان
گئی بیٹھ جدوں پھر تیل تے نہیں ہوندا نشہ بیان

مینوں نچ جنیندی انہڑی نچ جم پل ہوئی جوان
میں جس راہ چندری گزری وسیا گڑا طوفان
سوہرے پیکے نانکے کیتا جگ ویران
سُن پریم سنہڑے دوڑیا میں صدقے قربان
اُہ جھوٹا سی معراج دا عشق لقا رحمان

سر دھر جھولی وچ خان دا میں بیٹھی سالو تان
میں رہ گئی پکھا جھلدی اوہ سیس گیا چادر تان
ہتھیں آپنی ٹنگیا جنڈ تے مرزے دا تیر کمان
میری اکھیں اگے کُس گیا بے ہتھیا را خان
گدڑاں دیاں جھلے دھیریاں اللہ تیری شان
میرے متھے کالک لگ گئی بدنامی داغ نشان
میں دو جگ ڈھیری خان دی خان میرا ایمان
میرا وارث مرزا ازل دا میں اوس دی پاک امان
شاہد رب رسول سراج میں پایا عشق سچے دادان

پھر بیٹھ جنڈورے جھمرے جدوں تیج وچھائی آن
میں رنج نہ گلاں کیتیاں ارمان ہزار ارمان
مینوں ویلا ہتھ نہیں آوند رنج کڑمی آہس نادان
میں اپنی ہتھیں جان کے مروایا مرزا خان
میں گدھیں آپ پڈائیاں کر شیرنوں بندیاں
بے ہتھیا را کُس گیا ساندل دا بلوان
سنو سیالو چدھڑو کھول دے دے کان
میری ہتھ نہ لاوے لاش نوں کوئی نامحرم انسان
میں پنگھ پنگھائی بیل تے دو جُسے ہک جان

☆☆☆

عاشقاں دا شہید ہونا

ہن ہاٹھ سرے تے آگئی کس کس مارن تیر
خونی دھاراں وگیاں جُسے لیر و لیر
ملی منزل استغراق دی اک جنڈی دوسریر
حسن و محبت رل گئے دو ندیاں دے نیر
ماری برچی خان شمیر نے گئی ہک دوہاندی چیر
ہوئے وداع سراج جہان تھیں پڑھ کلمہ عشق اخیر

سُن بول اوئے بھین دے لگی چک شمیر
جیوں شکارے بھادروں چوفیروں پئی وہیر
پائی جنڈی عاشقاں آخری اک دوئے ول نظیر
سُرخ گلابی الفیاں چہرے بدر منیر
جھڑ پئے پا گلوںڈی قبلہ رُخ تصویر
لاشاں پیاں رہ گئیاں اڈ گئے روح سفیر

☆☆☆

چچہ

لاشاں دوالے مار دے گھمراں چال چا
سکے ساوے جوڑ کے لیندے چچہ بنا

فتیا پائی ماہیاں لتھے ڈھول وگا
ورم نہ مٹے ویریاں کھتے لین مگا

واہ وریام بہادرو لگے دین سزا
بلدے دھکھدے چھوڑ کے ٹر گئے کھیوے دا
وچ لاشاں سُٹیاں خالماں دتی اک لگا
چل سراج ہُن گھتیے دانہ باد کہا

☆☆☆

شاعر دامقوله تے عاشقاں داماتم

دُھپ گرمی وقت دوپہرا دارن بولے ساندل بار
ورم مٹائے ویریاں اپنے وار و وار
دوہاں دھراں نوں لاج سی آنہ جاوے ہار
عشق کماون دوستو لٹکن سولی سار
پاک جہاندی دوستی پاک جنہاں دا پیار
لذت سچے عشق دی جنہاں چکھ لئی ہک وار
عشق تحلی نور دی عاشقاں شوق دیدار
پاک نگاہاں والڑے عارف صاف شعار
آہے مرزا صاحبان جلویاں دے خریدار
کھیڈ رچا کے ٹر گئے کھیوے دے کھڈکار
کاواں چڑیاں لالیاں دتی گھت ککار
نیلی مرزے خان دی تک اکھیں ساری کار
پیر رنگیلے خان دے چٹے نال پیار

☆☆☆

دانہ باد وچ مرزے داماتم

کر سلام اخیر دا نیلی ہوئی روان
سنب رڑی تے بولیا چھتی لیا پچھان
وگدی لنگھی داریوں نیلی اپنے تھان
منہ دھریا دانہ باد نوں روندی تے حیران
بسم اللہ صدقے واریاں میرا آ گیا مرزا خان
تاڑ زمیں تے جھڑ پئی ہوئی مسافر جان

نیلی ویکھ الانی آوندی گل ساریاں لئی پچھان
چھتی لتھی دھوروں سن دنوں پئی دھر سان
ماں مرزے دی سندیاں بھل گئی ہوش پران
آ نیلی تے جھڑ پئی میں صدقے قربان
کتھوں تڑٹی غیب تھیں بجلی ہائے ارمان
چھتی وٹ وٹ مکیاں مار دی ہائے گڑا طوفان
میں ویرا رہی اڈیکدی تیرے راہاں تے قربان
بنھ سندلے بھیناں پٹیاں کر کر منہ اسمان
کر کر باہیں اُچیاں ویر پئے کرلان
چڑھ چڑھ نکلے کوکدے مارن سد بلان
اساں کیئے ترلے ٹردیاں واسطے رب رحمان
توں سہرا ساڈے دیس دا اسی پوند ہوندے قربان
سرجا وندا کوکدا حال اوئے مرزا خان
نال سراں سرداریاں مرزیا جگ اکھان
میر ثنائی کوکیا اُچے چڑھ مکان
ڈیوا ساڈے دیس دا کھراں دا جگ نشان
سُنج گلیاں وہڑے ماتمی نگر ہويا سنسان

حال دوہائیاں پے گئیاں ماریا مرزا خان
ہائے میں ماری اُجڑی اُجڑ گیا جہان
ڈھانڈی ڈگدی اپڑی دارے ناتوان
دس کتھے سٹیاں نیلیے میرا لال نشان
آ پئی بد نصیب تے بد نصیب پچھان
ہتھ گاناں مانیں کپڑے چھاتی لہولہان
شالا خیریں آویں دیس تے میرا پردیسی بلوان
ہو گئی نگری دانہ باد دی محشر دا میدان
پھر دے ڈھائیں مار دے بلی سگی ہان
کس پاسے ٹرگیوں مرزیا تروڑ ساڈے مان
سانوں نال لئی چل مرزیا تیرا کہڑ اسی نقصان
ساتھوں دور ہکلا ماریوں اہ جاسی نہیں ارمان
شالا کوئی نہ جاوے جگ تھیں اس موتے اس اڈان
میں اگے داخل مُردیاں تیری دیسی کون مکان
ملکھا سیالاں چدھڑاں ماریا مرزا خان
گُس گیا ساندل بار وچ راوی دا بلوان
کسے سُرَت سراج نہ رہ گئی بھل گیا کھان پکان



عاشقاں دا دفن ہونا

گُس گئے مرزا صاحبان دونویں ڈیکوں پار
سٹ سرائے پہنچ گئے گھوڑیاں دے اسوار
پٹھ جنڈورے جڑ گئی دنیا بے شمار

آ گھتی راہیاں پاندھیاں دانہ باد پکار
کھراں دہائیاں کیتیاں جوڑ بنا ہتھیار
نکلی دانہ باد تھیں خلقت بے شمار

پیاں مہکن لاشاں سہریاں سہریاں پھلاں ہار
 صحت سلامت کانیاں گٹھے پھیر مار
 سمجھ گئے اس گل تھیں مرزے آئی ہار
 باہیں کپن سورے روون زار و زار
 کس کم ساڈیاں چڑھتلاں کس کم بل بکار
 سر صدقہ تیرے عشق دا سر جاواں گے وار
 پئی گل کرہی پرتھی چر تک وچ سنسار
 سنگت تیری رلاں گے اپنے درم اُتار
 اگوں واج پوے گا لکھیا امر جویں جبار
 پٹھ جنڈورے خان دا چورا دیہن اُسار
 دُنیا کرے زیارتاں عاشقاں دا دیدار
 ہک جنازہ دوہاں دا ہکو کرن مزار
 گھریں آئے پرت سراج پھر پڑھ کلمہ رشتہ دار

ونج ڈھٹی سچ رنگیلوی خون کولوں رنگدار
 پھر ڈٹھا ٹنگیا جنڈ تے ترکش گل دا ہار
 خاطر ایسے گھڑی رکھے خان تیار
 سنگی مرزے خان دے روندے ڈھانیں مار
 خان ہکلا ماریا ساندل بے ہتھیار
 سن شہیدا غازیہ ہو گئی ہوون ہار
 انج کھیڈے گی مرزیا ہاٹھ تیری کھڈکار
 آئے سمجھیں اسی وی ہے کوئی رات دہنوار
 پھیرا کھیوے دیس تے آواں گے ہک وار
 پھر ڈاڈھ دلاں نوں دیکے چک لاشان لین سنوار
 لے آئے دانہ باد نوں کھراں دے دربار
 دتا فتویٰ مفتی عشق دے انہاں غسل نہیں درکار
 پردے اندر ہو گئے عاشق جگر فگار



کھراں دا اکھ تے چڑھائی

ڈیوا کسے نہ بالیا نہ کجھ کھا پکا!
 نتھیں گجرے چوڑیاں سٹیاں بھن وگا
 نیلا جھنڈا رڑی تے راء رحموں ٹھوکیا چا
 تری ملک وچ جنگ دی پھوک دتی کرنا
 لوکو لوکی پھر کے آیا اگ لگا
 آیا کھراں ساریاں دانہ باد بلا
 وچ گئے ڈونگے ماتمی ڈھول آئے گھرنا
 جوبہ گونجی دانہ باد دی تریاں پئی کہا

تن دن کیتیا ماہنیاں گھر گھر سوگ پیا
 رنڈیاں رون سہاگناں بھیناں رون بھرا
 دن ترتیجے اٹھے سورے قل شریف پڑھا
 دیس سارے وچ اپلی دتے اُہناں وگا
 اکی موہیاں نوں سو نسبتاں میر ثنائی جا
 دتی کھونڈی اپنی اوس نوں رحموں راء
 کٹک چڑھے چوہیریوں چھٹ گئی کرنا
 چونویں گھرو دیس دے آندے غیر چا

فولادی ترکش کانیاں ناوک اثر وہا
لاہ پگڑا سر تھیں آکھدا سُنیوں گل بھرا
اساں بدلہ مرزے خان دا کھیوے لینا کیں جا
سانوں مرزے پیچھے جا پدی اہ زندگی کسے نہ بھا
چکھے ننگ ناموس دے اہ زندگی کرو فدا
بن بدل لوہے گڑے دا جاؤ دیس کھیوے تے چھا
ساڈا پھیرا زندگی موت دا دسناں گل مکا
ہتھ سرجے گانا ماتمی بدھا کھراں چا
تازیاں دے ہنکار تھیں جنگل گونج گیا
کتیا کوچ سراج بہادراں جنگ دی تری وگا

لشکن سائگاں بجلیاں آندیاں سان چڑھا
تک جڑی برادری اٹھ کھلا راء رحموں دانا
ڈیوا ساڈے دیس دا گئے سیال بجھا
مر جاؤ کھرو ساہیو پر جاؤ گل بنا
جیون ہوندائے شان دا اسی بیٹھ شان کھھا
بخہ لٹو سرے تے کفنیاں اٹھو رب دھیا
جان پیاری جنہاں نوں نکلن اکھ بچا
ہتھ ہتھ اٹھائے ساریاں ہو گئی خیر دعا
کھل اٹھے دانہ باد تھیں سورے جنگ ازما
گج پائی گڑ گجیاں دتا طبق ہلا



ہاٹھاں دا کھیوے پونچناں

ڈھولاندے گھمگارتھیں جاگی جنگ پیاس
ہتھ جھنڈا گانا سوگ دا ماتمی پہن لباس
پٹی سبناں پر تھمی دھوڑ چڑھی آکاس
اُس زین سڈھے تے پالئی چھڈ زندگی دی آس
ہر پاسیوں غرلے لشکراں تیر جویں برجاس
پئی دس سراج شمیر نوں اُہدے اڈ گئے ہوش حواس

دھاں دھاں دھونسہ گجیا اٹھیا دھول ہراس
اول سر بے گھوڑا چھیڑیا یا مولا تیری آس
بخہ پالیاں تازی نترے بخہ چڑھتلاں جنگ شناس
اگے سر جا فوج دے پچھے راء رحموں الیاس
خیبر کھراں واسطے کھیوے دا روہتاس
ونج بھیراں شتریاں کڑکیاں نگرے کھیوے دے پاس



سیالاں دی گھبراہٹ

ایہہ کہی ہوندى آؤندی چوہر دھراہ دھراہ
سائگاں برچھے رکھلے بے حساب سپاہ

دارے بیٹھے کھیوے جٹ دا گیس دیاں نکل تراہ
چڑھ اُچی جائی ویکھدے ساندل ول مار نگاہ

آئے جانجی دانہ باد دے مرزے دا کرن ویاہ
رات سیالاں سک گئی مکدے دس گئے ساہ
صبح سراج مقابلہ دیوے جنہوں الاہ
جاتا سیالاں آ گئے ساڈے پیش گناہ
چڑھ چڑھ دیکھن عورتاں مل لئے کھراں راہ
رات گزاری ساہیاں مل جنگل کھاڑے پاہ

☆☆☆

کھراں تے سیالاں دا مقابلہ تے کھراں دی فتح

لیاں راتی خان شمیر وی سدواہراں بندہ گھل
رو برو مقابلہ پئے ہتھیار نکل
دس پئے وچ میدان دے سورمیاں دے بل
تیر چھٹے دو پاسیوں ترکشاں وچوں نکل
راء رحموں نعرے حیدری پا دتے تھر تھل
ساہیاں لاہیاں سدھراں خون وگائے ول
قتل کیتے بے اوڑکے کھراں نوں ول ول
پھر گھیریا واڑہ پنڈ دا کر بے حساب قتل
الاں گر جھاں گدڑاں عیداں شوق شغل
فتیامرزے خان دی ابے ساہیاں پوے نہ کل

فجری متھے جڑ گئے ہاٹھاں گکیاں رل
تیغاں تیغاں ٹکریاں ٹکرے برچھے پھل
ہانی ویکھ ونکار دے آ جونا! جھل
ڈھولاں دے گھمکار تھیں گئے کلجے ہل
مارن ہٹ ہٹ ٹکراں ٹکرن جیوں بدل
دھک نہ جھلی ماہنیاں دے کنڈیں نکلے چل
پھر زندہ خان شمیر نوں آند اراء رحموں دے ول
وڈھ وڈھ سٹن کھائیاں بھر گتے کھاتے ڈل
کتیا پایا ماہنیاں گڈیا چایا پھل
پڑ جت سراج بہادر اگ لائی رنگ محل

☆☆☆

کھیوے نگر دی تباہی

جت لیا پڑ ساہیاں سیالاں کھاہدی ہار
گجن مرزے خان دے بلی سنگی یار
جا وڑے وچ پنڈ دے علی علی ونکار
دارے کوٹھے بیٹھکاں ڈھاہ کیتے مسمار
راء رحموں سر جا چودھری لا بیٹھے دربار

جھلن کنڈیں برچھیاں ڈھبہ ڈھبہ موہندے بھار
اجے نہ بدلہ جاپدا گٹھے کئی ہزار
قتل کیتے ز ناریاں پھڑ پھڑ بے شمار
اگ لگاؤن نگر نوں چوپا سے ڈھواں دھار
جو قد میں لگے بچ رہے من لئی بھل ہار

کوئی نہ چھڈیا جیوندا کھیوے تھیں زنہار
 ندے بھجے پکڑ کے سٹن اگے وچکار
 ہانگر پھر دے مار دے ساہی کھرل اسوار
 لے آون خان شمیر نوں پیا کنبہ تھارو تھار
 سر جے بدلہ ویر دا ماری تیغ اُلا ر
 کھائی کوٹ برابری کیتی ڈھاہ ہنجار
 فتحیا پائی ماہیاں جگاں وچ وچکار

☆☆☆

کھرلاں دی واپسی

ہائے توبہ عشق مجاز دی میرے ساہمنے گل نہ چھیڑ
 اہ عشق ولوہناں اگ داجس نگری نوں لید اگھیر
 کیہ دساں کھیوے نگر دی ڈھبہ ٹبہ ہو یا ڈھیر
 کچھ مارے کچھ نس گئے کچھ پھڑ پھڑ کیتے زیر
 ونج ڈیرے مرزے خان دے لتھے ساہی شیر
 اک دو روز گزار کے چکیاں واگاں پھیر

کوئی لوٹی وقت دوپہر دی طوفان اُٹھیر اُٹھیر
 ڈھاہ ڈھیریاں ساڑا جاڑ کے اہ آہلی کرے دلیر
 پٹ ایرا ساہی پنڈا دا گئے سہاگہ پھیر
 وت پر تے دانہ بادلوں آوے گھر ناندی پھیر
 آکھن ورم نہیں لتھا مرزیا اساں ترلا کیتا ڈھیر
 کر سلام سراج اخیر دا گئے آپو آپ دلیر

☆☆☆

مقولہ شاعر

عاشقاں عشق کمایا کر کر گئے کمال
 لدھا جنہاں وپاریاں عشق الہی لال
 دُنیا شاہی خواب دی دولت تے زر مال
 دُنیا دے لو بھی لالچی کر گئے چنڈال
 یا رب تیری بارگاہ کیتا جس سوال

بدھے ہوئے میثاق دے گئے پرانے پال
 دوہیں جہانیں سرخرو عزت قدر جلال
 جہاں شوق سمہا لیا یار دا دو جگ رہے نہال
 جا سن خالی پلیوں منہ کالے بے حال
 طبع موافق اوسنوں دیویں دان سمہال

دے دے جگ دیا داتا مینوں اپنا عشق جمال دے دے خاتمہ خیر سراج دا کلمے طیب نال



خاتمہ کتاب تے تاریخ تصنیف کتاب

تیراں سو اٹھاٹھ سی ہجری وچ سنسار
چوتھی آہی جیٹھ دی وار آہا بدھ وار
چوداں دناں وچ ایسوں میں لکھیا دو وار
اچھا اس مرحوم نوں بخشے رب غفار
درد منداں دے واسطے تحفہ ایہہ تیار
مرزا صاحبان لکھ گئے اگے کئی مُصنّف یار
اول مرزا پیلو لکھیا پھر حافظ برخوردار
میاں محمد قادری سیف قلم جرار
پھر بوٹا گجرات تھیں اٹھیا خوشبو دار
میاں الہی بخش دے چند سنے اشعار
دو محمد دین بھی اس رستے راہ وار
ایہہ کرامت عشق دی عزت قدر وقار
جد تک گردش فلک دی جد تک لیل نہار
عاشق ہوندے جان فدا شاعر جگر فگار
گزرے شاعر اپنی بھلی نبھا گئے دار
شاعری ذوق سلیم ہے کیفیت دا اظہار
بوہے بوہے گاوندے پھر دے بد کردار
نہ توکل سکھیا نہ فقر دی سار
ایہو جیہاں چھوٹیاں کیتا فن خوار
ڈنگے سدھے مصرعے جس جوڑے دو چار

چن جمادی آخری لوئیں گرم بہار
اج ستاراں ہو گئی بیڑا لگا پار
فرمائش سی جس یار دی لنگھ گیا پتوں پار
اساں بھی اوسے طرف نوں جاناں آخر کار
بیٹھ پڑھن گے مجلساں یاد کرن گے یار
لڑیاں سخن پروتیاں چُن چُن پھل سنوار
کوئی کوئی مصرعہ سنی دا پر زہری تیراں ہار
اُہ بھی اس میدان وچ گئے نیں پھیرا مار
عطر محبت کھل تے چھڑک گیا عطار
کیا کہنے اس مرد دے چابک شاہ اسوار
اک دلاور چیمیاں دوجا بھجناں پار
اُٹھدے رہن حشر تک عاشقاں دے جسدہار
نذرانے چڑھدے رہن گے عاشقاں دے دربار
کیتا ہویا دوہاں نوں زنجی اک تلوار
مرد آہے سچیاں تے وقت آہے سچیاں
کسب سمجھ گل پا گئے آج کئی ترکھان لوہار
وار سنا کے آکھدے جی خیر حاضر سرکار
گرے ہوئے اخلاق تھیں سفلی بد اطوار
نام شہید دھرایا پا کپڑے رنگ دار
اُہ بھی لگ پیا پائلاں پاون موراں ہار

شاعری سوز دماغ دا لا علاج ازار
رات دنے وچ ذوق دے بجود تے سرشار
دمدم پیون جام لطف ساقی دے دربار
یا رب تیرے کرم دا نہیں کوئی اُنت شمار
میرے جیہاں مانگتاں اک نظر تیری درکار
بخش جنابوں والیا! عزت تے دستار
فضل تیرے بن آسرا توبہ استغفار
جو کھاؤ سو اتھروں سڑ سڑ رات دہنوار
بے پرواہ جہان تھیں اک نال ماہی دے تار
وچ حضوری ہووندے ظاہر لکھ اسرار
جس نوں چاہیں دیو نائیں خوبیاں گنج ہزار
بن تیرے کس در تے جاوے منگن ہار
توقیر تنویر وقار اقتدار بخت سدا بیدار
ختم سراج حضور دا کلمہ پاک چتار



از صوفی نور عالم بدر (مرحوم) مدرس جے دی چک ۶۱ سرگودھا

میرے پیر سراج قادری اُستاد الشعراء
صاحب ذوق سلیم دے سالک بے ریا
حضرت میراں پاک دا سیوا دار گدا
لکھ لکھ نامے عشق دے جگیں رہیا کھنڈا
اگے بھی تصنیفاں دی حد نہ رنگی کا
ہن لکھیا عارفاں واسطے تحفۃ الفقراء
سخن میری سرکار دے گوہر بے بہا
درد منداں دی بزم وچ نہیں بے درداں دی جا
جہاں کیتا رب نے عشق عرفان عطا
صاحبزادے باقدر خوش قسمت چار بھرا
جگ روشن دیوے باپ دے شالاروشن رہن سدا
ایہہ چشمہ فیض قادری جاری رہے سدا
برکت یمن کرامتاں عارف باخدا
خلق سلوک صفائیاں خوبیاں بے بہا
لے لے غوث خزانوں فیض رہیا ورتا
دُھماں دیں پنجاب دے ہر پاسیوں مرجبا
رب تاثیراں بخشیاں درد وگن دریا
پردہ پامجاز دا دسیا ذوق صفا
مُل پاؤن گے جوہری عارف تے دانا
اُنہیاں مُوریاں واسطے شیشہ کہڑے بھا
اُنہاں صاحبان واسطے تحفۃ الفقراء
توقیر تنویر وقار تے اقتدار ضیا
پان بلندیاں مرتبے دم دم فضل خدا
نور عالم دامن گیر دی کرے رب منظور دعا
(آمین)

صاحبانِ داحسن تے جو بن

صاحبانِ داقدر و بستانِ دا اوہدے وچہ نہ ول روال
اوہ نازک میرے فکر تھیں جویں بھولا بھال بال
اوہ جو بن وی متواڑی جدوں ٹردی ناز و کھال
جیویں کبک چمن وچہ ٹہلدے اوہدی وانگ طاؤساں چال
اوہ گلیاں موہندی آوندی اوہنوں تھیوے ویکھ خیال
اوہدی مانگ شہابی پرتوہ یا کھکشاں زوال
جیویں ریشم چین اقلیم دا اوہدے نرم متبر وال
اوہدیاں زلفاں پلمن ناگناں پیاں لنگن جیہ نکال
اوہ مست شباب نسیم تھیں جیویں سنبل برشگال
یا اوہ ہالہ چوہدویں چن وچہ زوراں بُرج اقبال
وت پلکاں تیر حذنگ دے دو ابرو عید ہلال
اوہدے نین سروہی برچیاں ترکھیاں تیغ مثال
اونہاں نت ونگارویں مورچے تارٹھ بہادران نال
اونہاں گٹھے لتاں دے کے کئی ماواں دے لال
اوہدے گوشے گوشے چن دے رخسار چمکن لال
جیویں نازک برگ گل تے کوئی بھورتے خوشحال
جیویں لکھ تعویذ لپٹا کر بد نظروں رکھوال
اوہدا نک کھنہ گردیز بزوا اوہدی وضع نرالی ڈھال
اوہدے لب عنابی لولوی یا لال بدخشی بھال
اوہ شیریں ہر بنات تھیں کوئی مشکل دین مثال
اوہدے دند پروتے موتیا وچہ کوثر نیر جھبال
اوہدی جیہ تریاق دا یا مائی آب زلال

جیویں بانکا رُکھ شمشاد دا فردوسی نونہال
یا وہ کوئی شاخ رویل دی پئی کنبدی وادے نال
اُس پیراں پٹھ لتاڑ کے کئی دل کیے پامال
کیہ طاقت جن انسان دی اوہدی ملک نہ جھلن جھال
ایہ حور ہووے فردوس دی یاں صاحبانِ کڑی سیال
یا اوہ رستہ آب حیات دا خضر ولی نے بھال
اوہدا تھا تختی شمس دی رت چہرہ بدر کمال
اوہ بوسے دیہن رخساریاں لیندیاں لطف جمال
دو کُنڈلاں والیاں ناگناں پیٹھیاں دھن سمہال
اوہدے بندے ماہ پروین سن یا لنگن ہیرے لال
یا اوہ خنجر استنبول دے اونہاں کرناں قتل حلال
توبہ فتنہ خیز فسادناں اوہناں پیشہ جنگ جدال
اونہاں ننگ کیے کئی خاندان کئی شاہ کیے کنگال
یا اوہ توپیاں بیڑیاں پاہرواں کوئی لنگھے کیہ مجال
اوتھے بیٹھا نیزے پکڑ کے اک زنگی کالا خال
یا اوہ دُرج مقفل اٹھبی بند کیتا جوہری مال
یا اوہ آیت پاک قران دی اوہدا سمجھن بھیست محال
یا اوہ الف سی نستعلیق دا ذرا لکھیا خم نکال
یا دھاگے سچے پٹ دے دھرے وٹ لطافت نال
جیویں غنچہ لہو ڈبیا ارغوان نڈھال
جیویں کنیاں در یتیم تھیں ونھ دھریاں پالو پال
وت ٹھوڈی سیب کشمیر دا غنغ چہانہال

اوہدی گردن مینا حلب دا باکی کونج مثال
صاحبان صاف تجلی ایہنی معجزہ ذی الکمال
توبہ غارت گرا ایمان دی او تھے ثابت رہن محال
آون کرن زیارتاں حوراں ماہ جمال
کھیوہ ثانی ہویا مصر دا یاوت شارتاں مثال
کوئی رانگے دیس چنہاں دے جاگ پئے اقبال
صاحبان نال سہیلیاں ہر ایک بدیع جمال
صاحبان جلوہ طور دا مظہر شان جلال
اگے سٹی قلم مصوراں اوہدی جھل نہ سکے جھال

☆☆☆

ایضاً

صاحبان حور چنہاں دی اوہنوں ویکھ وجود گلن
اوہدا گیسو لچھے عنبری نہ آپس وچہ رلن
جیویں چن رکھتے پرے تھیں پئے باشک ناگ بن
اوہ پوندا کھیں نوں ڈنگدے وت بکیاں ونج ملن
اوہدے نین جیویں عرش مجید تے دونور قندیل بن
یا اوہ جام شراب طہور دے پئے ڈل ڈل کرن ڈلن

☆☆☆

ایضاً

صاحبان قطب چنہاں دا اوہدی برکت وسدا دیس
لبیک لبیک پکارے دا اوہنوں کعبہ سمجھ چمسیں
اوہدے سر پھلکاری چاندنی اوہدے کیس بھنے کیس

ابدال زیارت آوندے پروان چڑھن درویش
تسلیمات گزار کے سر سجدے وچہ دھریس
اوہدی چال جہانوں اوپری پیماں حوراں ریس کر سیں

اوہدا متھا تختی چن دی پیا جو بن رنگ کڈھسیں کول سراج بہا کے پیا رتجھاں نال تکیس

☆☆☆

ایضاً

صاحبان پتی نور دی لکھ زینت زیب جڑی
اوہدا چہرہ جیونکر روبرو ہووے صادق صبح کھڑی
اوہدے دند دانے مروارید دے یا موتیا پری لڑی
پئی پلے ناگن زلف دی ایہ ڈنگیا سنے لڑی
اوہدے آتش بار رُخسار تھیں کوئی ایسی چنگ جھڑی
کسے اُستا کار اُستاد نے دھر حسن خرا د گھڑی
جیوں شفق نماشیں پھیلدی اوہدی مانگ سندھو بھڑی
صفتاں کر نہ رجدی اوہدے در بلقیس کھڑی
اوہدے ڈنگے گوریں جارہے نہیں وت بھی وس جھڑی
ایدھر سڑگئی جیہ سراج دی ہووے جاندی قلم سڑی

☆☆☆

صاحبان دے بندے

صاحبان دے بندے جھل جھلکدے وچ زلفاں پایا جھات
پئے بوسے دیہن رخساریاں بندے نیک برات
اوہ حاجی کعبہ رخ دے کھڑے وچ میقات عرفات
جیوں چڑھے مجاہد غزنیوں تروڑن سومنات
بندے جلوہ طور دا عین تجلا ذات
جیوں تارے ترنگڑ کھیتیاں وچ انھیری رات
گئے پونج نصیباں والڑے اُتے چشمے آب حیات
جیوں نمازی وچ رکوع دے یا بیٹھے التیات
یا اوہ لشکر ذوالقرنین دا چڑھیا دنیا مات
بندیاں دی دید سراج نوں جیویں مومنناں شب برات

☆☆☆

صاحبان دیاں ونگاں

صاحبان دی ہتھیں ونگاں پچیاں جیویں قوس قزح آسمان
رتیاں ساویاں پیلیاں نقرئی سنہری جان
کھنکن چھنکن چوڑیاں آپس وچ ٹکران
گنگا جمنی چوڑیاں لہراں چمک وکھان!
اوس رتجھاں نال چڑھایاں کارن مرزے خان
چمکن وانگ ٹٹانیاں پیاں پھلجھڑیاں برسان
جیویں حوض کوثر تے جوڑیاں پیاں ہس ہس جھپیاں پان
درد منداں دیاں دلاں تے مٹھیاں چوٹاں لان

اوہ ملدیاں جوئیں سہیلیاں وچھڑیاں ملن ملان
 کیا جاناں کس ویلے ہوسی وچھڑ جان
 رنگاں تے ٹیاریئے نہ کر ایڈا مان
 چھاں چھجن دی جوہناں جھٹ ہکی دی شان
 ٹر جا سی ونجارڑا کر کے بند دکان
 اٹھ پہر سراج گزار دا ایہ جوہن دا کر مان

☆☆☆

صاحبان دا بھنڈار

جشن جوئیں جمشید دا صاحبان دا بھنڈار
 یا وچہ کھیوے نگر دے اندر دا دربار
 پیڑھے چرنے رائگے صندل خوشبودار
 چڑتل گھڑتل اوپری شیشیاں دے چکار
 حللی چینی آئینے جڑت مٹلا کار
 نفرتی زمردی چمکن زر نگار
 ماہلاں پُھمن ریشمی ڈوراں تلے تار
 کتن بیٹھ سہیلیاں چوڑے بانہہ اُلاں
 صاحبان کول سہیلیاں خوباں خوش رخسار
 جوئیں دوالے چن دے تاریاں دا پروار
 توہ غارت گر ایمان دا شاہ پریاں دا ڈار
 یا کافر کعبے دلاں نوں کرن پئے مسمار
 نین دو گاڑے برچھیاں پھر کجے دی دھار

☆☆☆